

Longwe tru long Tabubil taun....Dispela man ya wantaim pikinini na famili bilong em i no stap klostu long long Tabubil taun. Ol i stap longwe tru long Tabubil taun. Ples bilong ol i stap namel long ol bikpela maunten insait long bik-bus long Not Tabubil. Ol i save kisim tupela de long wokabaut i go kamap long Tabubil taun. Taim ol i laik go bek, helikopta i save kisim ol i bek long ples bilong ol. *Poto: Godfried Yassafar*

## KOMANDA DADAMO KISIM BEK TOP WOK ...ripot bilong paul wok tu kamap

### CLEMENT MIRIA i raitim

LONG aste, Nesenel Kot long Mosbi i tokaut olsem Komanda bilong Papua Niugini Difens Fos, Brigidia Robert Dademo bai holim yet wok bilong em olsem komanda.

Nesenel Kot jas, Jastis Sheehan i tokaut olsem aninit long lo, taim bilong ol komanda bilong Difens Fos long ritaia nau i senis. Dispela senis i kamap bihainim ol senis insait long Difens Fos Ekt.

Aninit long ol senis em i kamap long ekt, nupela taim bilong ol komanda bilong Difens Fos long ritaia em long taim em i winim 55 kris-mas. Bipo taim bilong

ritaia em long 50 kris-mas.

Dispela senis i bin kamap long las yia. Na Brigidia Jenerel Robert Dademo yet i bin stap tu long dispela taim ol i wokim ol dispela senis.

Toktok bilong Nesenel Kot nau i min olsem Brigidia Robert Dademo husat i bin winim 50 krismas pinis long Desemba 25, 1993 bai stap yet olsem komanda.

Tasol Nesenel Eksekutiv Kaunsil inap rausim em long dispela wok sapos em i gat ol arapela as bilong mekim olsem i stap. Tasol long toktok bilong kris mas, Brigidia Jenerel Robert Dademo bai holim yet dispela wok.



• Komanda Dademo...laik stap yet long 5-pela yia.

Long taim kabinet i bin bung aste long moning bilong toktok long dispela hevi em i bin stat long las wik, ol loya bilong Brigidia Jenerel Robert Dademo, ol lain bilong Pato Loyas : askim kot long givim oda olsem em bai holim yet wok komanda inap long olgeta toktok i stret.

Bihainim dispela, Jastis Sheehan i givim wanpela kot oda na stapim NEC, ektong praim minista Sir Julius Chan, wantaim ektong minista bilong Difens, Andrew Baing long no ken wokim moa senis.

Dispela tingting bilong skruim taim bilong Brigidia Jenerel Robert Dademo long holim dispela wok i kamapim tu planti bel pen namel long ol bikman bilong Difens Fos.

Ripot Wantok Niuspepa i kisim i tok olsem tingting bilong skruim taim bilong Brigidia Jenerel Robert Dademo i no bin go long Difens Kaunsil. Ripot i tok tu olsem inap long sampela taim nau, wok lida insait long fos i wok long pundaun.

Dispela ripot i tok tu olsem i mas gat haitwok i stap taim ol i rausim gutpela wokman, Paul Bengo olsem Seketeri bilong Difens na makim gen Brigidia Dademo olsem komanda.

Ripot i sutim tu toktok olsem sampela waitman insait long opis bilong minista i stap baksait long ol dispela samting.

Long Tunde, ektong minista bilong Difens Fos, Andrew Baing i tok olsem ol dispela toktok i tru. Ol ausait lain nau i wok long opim tu maus long wok bilong PNG Difens Fos.

Ripot i bin askim tu long sampela kain wok painimaut i mas kamap namel long Ombudsmen Komisen na NEC.

Long wankain taim, lida bilong Oposisen, Chris Haiveta tu i laikim wok painimaut i kamap long dispela. Bikos dispela kain samting inap bagarapim gutpela wok sekyuriti bilong kantri.

## Sik TB bruk nau long Tabubil

### GODFRIED YASSAFAR i raitim

WANPELA sik nogut ol i kolim sik TB i wok long kamap bikpela nau long Tabubil. Na planti manmeri na pikinini i wok long kisim dispela sik.

Sief Medikel Opisa (CMO) long Medikel Dipatmen bilong Ok Tedi, Dokta Paul Spicer i tokim Wantok Niuspepa long dispela samting long las wik.

Dokta Spicer i tok planti manmeri na pikinini bilong ol

ples insait long Tabubil i wok long kisim dispela sik. Em i tokaut long dispela samting bihainim long planti manmeri na pikinini i go long medikel sevis bilong kampani wantaim helt senta bilong gavman long kisim sut na marasin.

Em i tok as na planti manmeri na pikinini i wok long kisim sik TB bikos ol i nogat gutpela ples bilong stap long en. Em i tok planti bilong ol i save stap long ol setelmen klostu long Tabubil taun.

Spicer i tok ol i kisim sik TB

bikos ol haus long setelmen i stap klostu klostu long wanpela na arapela. Na tu i no gat gutpela toilet.

Em i tok long stapim dispela sik long kisim ol, ol pipel i mas wokim gutpela haus na i mas stap longwe long wanpela na arapela na tu i mas gat gutpela toilet. Na tu i moa gutpela olsem planti manmeri na pikinini i no ken pulap na stap long wanpela setelmen.

Spicer i tok long traim na daunim dispela sik, ol i wok long karimaut ol aweanes program bilong skulim ol

manmeri na pikinini long wanem ol samting bilong mekim long abrusim dispela sik. Ol i wok long go raun long wan wan ples na givim sut na marasin long ol liklik pikinini long banisim kain kain sik long kisim ol.

Dokta Spicer i tok sapos ol manmeri na pikinini i kisim ol skul toktok bilong ol na bihainim wanem samting ol i laikim ol long mekim, sik TB i no inap kisim ol. Long wankain taim tu, dispela sik i no inap kamap bikpela long Tabubil.



## COASTER BAS

EM NAU... NAMBAWAN PMV BAS LONG  
PAPUA NIUGINI NAU ILUK SMAT MOA!



PORT MORESBY 229400 LAE 422322 RABAU 921988 MADANG 822188  
GOROKA 721844 MT HAGEN 521888 WEWAK 862255 KAVIENG 942132  
KIMBE 935155 TABUBIL 589060 VANIMO 871254 PORGERA 579367  
ALOTAU : WALTERS WORKSHOP PH 611174

**Ela Motors**  
OLGETA HAP

**Ol Bogenvil ripot long dispela wik**

# Ol pipel bilong Eivo wokabaut as nating

VERONICA HATUTASI i raitim

OL pipel bilong Eivo insait long sentrel Bogenvil nau i no gat ol klos samting olgeta.

Ol ripot i tok olsem sampela bilong ol i wokabaut as nating tasol.

Eivo em i wanpela long ol hap em i stap yet aninit long han bilong ol lain Bogenvil Revolusineri Ami (BRA).

Ol dispela toktok i stap insait long ripot bilong wanpela pasto bilong SDA Sios long Bogenvil husat i bin go lukluk raun long ol dispela hap long mun Desemba na Janueri.

Em i sori na sem nogut tru long lukim olsem ol bikipela man na meri tu i no gat klos wantaim trausis na i wokabaut raun as nating. Long taim ol i wokabaut, sampela i save traun long haitim bodi bilong ol wantaim han tasol.

Planti papamama bilong ol hap em i stap aninit yet long BRA i wari tru long ol pikinini bilong ol. Ol papamama i wari bikos ol i no gat rot bilong kism ol klos samting bilong karamapim skin bilong ol pikinini bilong ol.

Ol i tok sapos hevi long Bogenvil i go het moa, ol famili bai bruk nabaut bikos ol i sem long stap bung wantaim na wokabaut as nating nabaut.

Na dispela pasto i autim dispela olgeta samting insait long ripot bilong em.

Em i tok olsem moa long 90,000 pipel i stap insait long ol kalabus eria bilong sentrel na ol liklik hap bilong saut Bogenvil. Na ol i kism taim stret bikos ol i sot tru long marasin wantaim ol klos samting.

Long wokabaut bilong em i go long ol kalabus eria, em i bin kism sampela klos na marasin i go long ol pipel. Tasol ol samting i no inap long olgeta man, meri na pikinini.

Ripot i tok tu olsem long dispela taim, 5-pela sik i bagarapim tru ol pipel long ol dispela hap. Ol dis-

## Rihebilitesen program kirap long Wakunai

PLANTI pipel husat i kism taim long hevi bilong Bogenvil i laikim helpim nau bilong stretim sindaun na laip bilong ol.

Dispela em i bikipela samting tru bikos God Papa tasol em i as bilong gupela laip na sindaun long graun.

Bihainim dispela tingting, wanpela spirituel rihebilitesen program bilong ol pipel husat i stap long hap bilong Wakunai insait long not sentrel Bogenvil bai stat long Februeri 20, 1994.

Dispela program em i hap bilong rot long bringim gupela sindaun i go bek gen long Bogenvil.

Wanpela ripot bilong *Bogenvil Tude* nius i tok olsem sampela olpela memba bilong Bogenvil Revolusineri Ami (BRA), ol komyuniti lida wantaim ol yut lida na ol sios lida bai bung bilong kirapim tru dispela program.

Dispela bung bai kamap long Arrow Klub senta long Wakunai yet.

I no longtaim i go pinis, not is Interim Atoriti i bin oraitim ol yangpela wantaim ol pipel bilong Wakunai long yusim dispela hap olsem rihebilitesen senta bilong ol.

Kodineta bilong program, Matthew Kusa i tok bikipela lotu bai kamap long taim ol i kirapim tru dispela program. Bihain long lotu bai i gat ol kain kain pilai na ol arapela samting olsem bilong makim dispela program.

Long wankain taim, sampela bikman bilong Wakunai, ol yut na ol sios lida tu bai toktok liklik long dispela taim. Toktok bilong ol bai sut long pasin bilong kirapim bel isi na pasin wanbel.

Em i tok tu olsem dispela em i namba wan hap bilong ol program em Not Is Distrik Pis komiti i laik kamapim bilong traun aninit ol hevi na bagarap em ol pipel wantaim ol yangpela i bin bungim long taim bilong Bogenvil hevi.

Sampela lain long Dipatmen bilong Not Solomons bai givim han tu bilong lukim olsem dispela program i kamap na ran gut.

pela sik em lepa, tit i bagarap, sik sotwin, hevi bilong ol mama i karim pikinini na sik bilong lewa.

Sik bilong lewa i kilim dai pinis 15 pipel insait long wanpela ples.

Ripot bilong pasto i tok moa olsem planti pipel i stap hait nabaut long ol maunten. Ples i kol na long sampela taim, ol i no inap dring wara inap long tripela o 4-pela de. Olsem na oltaim ol i painim tu sik bel i pen.

Planti liklik pikinini wantaim ol lapun i kism taim na dai long ol dispela sik. Bikos ol i no gat marasin bilong kism na helpim ol.


Long nau yet, ol pipel bilong ol kalabus eria i stap hait nabaut long maunten antap long Sipuru, Kongara na Panguna. Na ples i kol nogut tru tasol ol i no gat klos, blanket wantaim laplap olsem na kol wantaim sik i bagarapim ol stret.

Long ripot bilong em tu, dispela SDA pasto i tok olsem long Bovo Veli, wanpela liklik boi husat i gat 9-pela krismas i gat sik lepa. Na ol lain bilong sios welfea grup i tok i gat planti moa pipel i kism dispela sik. Bikos i no gat marasin.

Sik bilong tit (pen na bagarap) i kilim pinis sampela pipel long ol dispela hap. Wanpela nasing sista bilong hap i tok wanpela kain kaukau i wok long givim pen na bagarapim nabaut ol tit. Bikos dispela kaukau i gat planti suga tumas insait long en.

Ripot i tok tu olsem planti man, meri na pikinini husat i kism sik sotwin i dai pinis.

Planti mama tu i bin dai taim ol i laik karim pikinini. Blkos ol i bungim kain kain hevi.



*Sainim pepa...Wanpela bikman bilong Halia i putim mak bilong em bilong bel isi long las bung em i bin kamap long Buka las mun. Dispela em taim ol resisten paitman i givap long pait.*

## Wok bilong viles kot tu kamap bikipela nau

ALOYSIUS SAMI i raitim

LONG taim planti hap bilong Bogenvil i wok long kamap orait isi isi, wok bilong ol kot tu i go insait nau long ol ples.

Buka ailan wantaim ol liklik ailan na sampela hap long bikiples Bogenvil i kirapim pinis ol viles kot. Pastaim long dispela taim ol hevi i stap bikipela yet, ol sief wantaim ol bikman bilong ples i save stretim ol hevi long ples.

Bihainim dispela wok kamap, han bilong provinsal Viles Kot i helpim nau ol mejistret bilong olgeta hap long skul long wok bilong harim kot.

Ol lain bilong Viles Kot Sekreteriet long Mosbi i save go ranim ol dispela kos.

Tripela provinsal kot opisa i helpim long skulim ol mejistret. Ol dispela lian em Viles Kot mejistret bilong Buka, Morris Semoso wantaim sinia kot mejistret, Jacob Toroken. Narapela mejistret em wanpela meri, Patricia Tivese.

Long tupela wik i go pinis, ol Viles Kot mejistret bilong Siwai i bin pinisim wanpela kain kos olsem. Ol lair bilong Viles Kot long Buka i biranim dispela kos na ol i laik holim moa wankain kos long hap bilong Nagovis.

Long mun Novemba bilong las yia, moa long 20 pipel i bin go skul.

### Buk bilong intelijens ami opisa redi pinis

MOA long 2,000 kopi bilong wanpela buk i gat stori bilong Bogenvil i kamaut long dispela wik long Australia. Nem bilong buk em "Bougainville Company Diary." Na em i gat 200 pes.

Mau husat i raitim dispela buk em Kepten Yauka Liria bilong ples Tunda insait long Sauten Hailans provins. Em i bin wanpela Difens Fos intelijens opisa tasol em i risain na nau i skul long Yunivesiti bilong Papua Niugini long Mosbi.

Em i bin wok wantaim ol sekyuriti fos long Bogenvil long 1989 long traun stapim ol hevi long ailan. Na bikipela wok bilong ol lain bilong Kepten Liria long dispela taim em bilong traun winim ol BRA rebel na stretim hariap ol hevi long Bogenvil.

Buk ya i autim ol tingting na samting i kamap long wok na lukluk bilong Kepten Liria yet.

# PLIS RIPOT



**HAGEN, Westen Hailans:** Sampela man i bin stilim K20,000 bilong Highlands Distributors kampani.

Provinsal Plis Komanda, Sief Inspekta John Wakon i tok long Mande bilong dispela wik, sampela man i bin brukim mani bokis bilong opis na kism olgeta mani na ranawe.

Stilpasin i bin kamap namel long 12 klok bikenait na 3 klok long moning. Mobil Oil Niugini Limited em i papa bilong dispela kampani.

Sief Inspekta Wakon i tok sampela wokman bilong kampani yet i stap tu long wokim dispela stilpasin.

Long wankain taim tu, plis long Hagen i sasim wanpela risiv plisman long stilim plis sotgan.

Dispela man i bilong ples Ruaing long hap bilong Anglimp long Westen Hailans. Ol ripot i tok olsem long mun i go pinis, dispela man i bin stilim sotgan insait long wanpela plis ka long Bans plis stesin. Na em i salim long K800 i go long narapela man.

Tasol ol plis i bin painimaut long dispela na kism bek gan. Plis i holim dispela man long ples bilong em long las wik Trinde.

**BOROKO, Nesanel Kapitl Distrik:** Tripela man i kamap long ai bilong Boroko Distrik Kot long las wik long tupela sas. Namba wan em long stil na narapela em bilong kilim wanpela wokman bilong Boroko Motors long las wik Trinde.

Ol dispela man em John Siko husat i gat 25 krismas bilong Sina Sina long Simbu provins, Peter Kaupa husat i gat 25 krismas bilong Gumine long Simbu provins wantaim Leonard Kaika husat i gat 25 krismas bilong Ihu long Galp provins. Ol bai stap long Boroko haus kalabus inap long narapela kot bilong ol long Mas 22.

Kot i sasim ol long kilim dai narapela man, stil na yusim ka bilong narapela lain wantaim no gat tok save. Plis i holim pinis na sasim narapela poro bilong ol husat i bin ranawe long taim ol i holim ol arapela tripela. Dispela man em Arua Ikupu husat i gat 43 krismas na i bilong Bereina long Sentrel provins.

Ol lain ya i bin kilim Henry Popo. Henry i gat 35 krismas na i bilong ples Inawi long Sentrel provins. Henry i bin dai bihainim ol bagarap em i kism taim ol dispela lain man i sutim em long bros bilong em. Ol i bin ranawe wantaim 1,000,000 tasol ol plisman i kism gen olgeta mani.

**HAGEN, Westen Hailans:** Nesanel Kot i kalabusim pinis wanpela man long 8-pela yia long sas bilong bagarapim narapela man.

Jastis Robert Woods i painim olsem Mark Polowa bilong Baiya Riva i asua long paitim Kunjil Paia wantaim naip. Sapos Paia i no bin go hariap long haus sik, em inap dai long ol bagarap em Polowa i kamapim long skin bilong em.

Birua i bin kamap long mun Mas long las yia bihain long tupela i bin go dring wantaim ol arapela poro bilong ol. Kros i bin kamap long dispela taim na Paia i kism bagarap.

Bihain long tupela de bilong kot, jas i painim olsem Polowa i rong na kalabusim em inap long 8-pela yia wantaim bikipela mekim save.

**HAGEN, Westen Hailans:** Nesanel Kot long Hagen i salim wanpela plisman long kalabus long 5-pela yia wantaim bikipela mekim save. Bikos em i kilim narapela man.

Plisman ya em Iminik Ikamata husat i gat 27 krismas bilong ples Ulutuya long Milen Be provins.

Kot i painim Ikamata i rong long kilim dai Philip Muri bilong Moge wanpinis long Westen Hailans.

Kot i harim olsem long mun Oktoba las yia, plis i bin kism Muri i wokabaut raun wantaim wanpela plis baret. Long taim ol i larim Muri i go em bin tok nogutim ol plisman. Dispela i hatim bel bilong Ikamata na em i paitim Muri i go na em i dai.

# Ol Wutung banisim boda haiwe pinis

**BONNY ANDO i raitim**

OL pipel bilong Wutung insait long Wes Sepik provins i pinis dispela rot i go long Jayapura.

Dispela samting i kamap long wanem gavman i no harim ol toktok na tingting bilong ol long dispela samting.

Ol tripela bikman bilong ples husat em ol papa graun tu i givim toktok long ol pipel na ol i pasim dispela rot arede long ples Wutung.

Dispela rotblok i stap 15 kilomita klostu long boda bilong PNG na Indonesia. Na em bai stap olgeta sapos ol lain long Wutung i winim kot.

Man husat i makim ol pipel bilong Wutung, Mark Ando em ol plisman i holim em long las mun na sasim em. Long wanem ol i bilip olsem em i go pas long banisim dispela rot.

Mista Ando bai sanap long kot long Fraide Februari 19. Plis i was gut tu olsem Mista Ando i no ken ranawe. Olsem na ol i save sekim em long olgeta Mande na Fraide.

Wanpela man klostu long Mista Ando i tok, sapos Mista Ando i winim dispela kot, rotblok ya bai stap olgeta.

"Sapos mipela i winim dispela kot, mipela bai toktok wantaim Indonesia gavman na ol bai wokim rot i kam. Na tu mipela bai was gut long dispela rot. Long wanem gavman bilong PNG i no harim toktok na tingting bilong mipela," man ya i tok.

Ol sampela samting em ol pipel bilong Wutung i laikim gavman i mas lukluk em long kompensesen na ol narapela samting ol i mas kisim long sait bilong wok bisnis sapos gavman i wokim rot. Ol pipel i tok nesanel gavman yet i oraitim dispela rot bilong go het na em i no lukluk long toktok bilong ol pipel.

Long ol narapela samting, ol pipel bilong Wutung i no inap yusim ID kat bilong go long hapsait bilong boda. Long wanem ol i save go i kam planti taim na ol soldia bilong Indonesia i tok orait long ol long mekim dispela. Ol i sainim tu wanpela tok orait wantaim ol Indonesia atoriti long mekim dispela.



• Ol dispela lain pikinini bilong ples Wutung i sindaun antap long ol ston na diwai samting em ol papa na tumbuna bilong ol i yusim long banisim rot i go long boda bilong Jayapura. Bihain long ol i mekim olsem, ol plisman i kamap na holim mausman bilong ol pipel, Mark Ando. Klostu em bai kamap long kot. Ol pipel i no amamas bikos gavman i no toktok wantaim ol long sampela samting pastaim long em i go het na bungim rot bilong Jayapura na PNG long hap graun bilong ol.

## Gavman bai strong long Palamen senisim lo bilong provinsal gavman

**GODFRIED YASSAFAR i raitim**

PRAIM Minista Paias Wingti i tokaut pinis olsem long kibung bilong Palamen long narapela mun, Nesenel Eksekutiv Kaunsil bai putim kamap wanpela bil ol i kolim Ogenik Lo bilong Provinsal Atoriti na Lokol level Gavman.

As tingting bilong dispela bil, Mista Wingti i tok em long kamapim sampela senis long provinsal gavman sistem long kantri. Em i tok tu olsem sapos Palamen i paitim toktok na tok orait long dispela bil, bil ya bai kisim ples bilong Ogenik Lo bilong Provinsal Gavman em Papua Niugini i wok long yusim nau.

Dispela bil bai kamapim planti bikpela senis. Dispela bai bringim gavman i go long ol pipel. Na ol pipel i no inap long wetim o painim gavman long kamap long ol.

Praim Minista Wingti i tok aninit long dispela bil, nesanel gavman na lokol level gavman wantaim bai gat pawa long wokim kamap lo. Na provinsal atoriti bai stap olsem wanpela was o lukaut bodi bilong tok orait long provinsal baset. Na tu long lukim olsem ol polisi bilong nesanel gavman na lokol level gavman i ron gut. Lokol level gavman bai putim kamap lo long ranim ol lokol komyuniti.

Praim Minista Wingti i tokaut olsem aninit long nupela sistem, ol nesanel memba bilong wan wan

provins, ol hetman bilong lokol level gavman, wanpela memba bilong ol meri na arapela bilong ol sios bai stap olsem ol memba bilong provinsal atoriti. Na tu bai i nogat ol minista long provinsal level. Bai i gat ol pemenen komiti tasol. Wok bilong dispela komiti em long stiaim Provinsal Eksekutiv Kaunsil na ol lokol level gavman.

"Dispela ol senis bai kamapim wanpela nesanel Provinsal Pablik Sevis. Na pablik sevis bai i no inap wankain long nesanel Pablik Sevis. Astingting em long mekim ol pablik sevan em ol i wok aninit long provinsal atoriti na lokol level gavman long mekim wok long kamapim developmen long ol ruel eria. Long sait bilong administretiv senis, bai i nogat moa ol provinsal dipatmen. Distrik administresen bai kamap long wan wan ilektoret na bai kisim ples bilong ol provinsal dipatmen, Mista Wingti i tok.

Em i tok senis bai givim pawa bilong kisim takis i go long provinsal atoriti. Wanpela takis ol i kolim Guds na Sevis takis bai kisim ples bilong Ritel Sels Takis. Wanpela arapela takis ol i kolim Dveloped Propeti Takis bai kisim ples bilong Len Takis. Nupela takis bai kamap em Komyuniti Het Takis.

Konstitusinel Komisen i putim kamap dispela nupela ogenik lo bihainim ol tingting bilong Palamentari Bai Patisen Komiti bilong Provinsal Gavman.



• Ol liklik pikinini bilong Wutung i soim liklik hap hanrot bilong bus i go na bai bungim stret dispela bikpela haiwe bilong Jayapura na PNG long boda.

## Kanawi salim nau tok lukaut

**PIUS IKUMA i raitim**

EDMINISTRETA bilong Madang, Wep Kanawi i tokim olgeta pablik sevan long olgeta dipatmen olsem ol i mas stap stret long ples bilong wok.

Mista Kanawi i tok long wanpela ripot olsem planti dipatmen na distrik menesa i save pilai laki long taim

tokim ekting deputi seketeri bilong edministresen, Ivan Mulul long sekim olgeta pablik sevan long olgeta dipatmen olsem ol i mas stap stret long ples bilong wok.

Mista Kanawi i tok long wanpela ripot olsem planti dipatmen na distrik menesa i save pilai laki long taim

bilang wok. Em i tok dispela i no gutpela tumas na ol i mas stapim kain pasin olsem.

"Mi i no inap larim ol i mekim dispela na bai mi sasim ol aninit long lo," Mista Kanawi i tok

Mista Kanawi i tok em i laik lukim olsem olgeta pablik sevan i mas bihainim stret lo.



**WANTOK**  
NIUSPEPA BILONG OL PAPUA NIUGINI STRET

# Las toktok bilong Wabeg

## Krai bilong ol meri

Long dispela wik, ol meri insait long kantri i holim bikpela bung bilong ol long wanpela ples klostu long Mosbi.

Wanpela bikpela samting ol bai toktok long en em long givim nem bilong wanpela meri husat bai makim ol long Palamen. Na NEC bai skelim dispela nem long taim Palamen i bung long neks mun.

Bikpela wok tru bilong dispela nau i stap long han bilong ol meri yet. Ol i mas tingting gut nau long husat tru em inap holim wok na makim maus bilong ol meri.

Ating ol yet i mas luksave tu olsem em i no ken wanpela meri bilong pairap na wokim nois nabaut olsem wanpela emti dram. Nogut bai ol meri wantaim ol pikinini na yangpela i no inap kisim helpim.

Krai bilong ol meri bilong bipo yet i kam inap nau i karim kaikai. Tasol ol meri i no ken lukim dispela olsem sans bilong go insait long Palamen na kisim biknem na namba.

I tru olsem planti meri i no gat dispela kain tingting na pasin. Tasol i gat wan wan bilong ol kain lain olsem i stap. Olsem na i mobeta olgeta wan wan deleget memba bilong ol provins husat i kamap nau i skelim gut olgeta kendidet pastaim.

Bikos wanpela vot bilong wanpela meri tasol bai kamapim bikpela senis taim maus-meri bilong ol i sindaun long Palamen.

JEFFREY APAKALI i raitim

MEMBA bilong Wabeg na Lens minista Albert Kipalan i tok olsem em i gat strongpela tingting long pasim Wabeg taun na surikim i go long narapela distrik.

I gat ol narapela taun olsem Wapenamanda, Surinki, Kandep na Pogera i stap. Na em

i givim ol 4-pela wik long stretim tingting bilong ol.

Mista Kipalan i bin mekim dispela toktok long wanpela miting bilong ol papa graun long las wik.

Mista Kipalan i tokim ol pipel bilong em olsem em i sem olsem i no gat wanpela

developmen i kamap long Wabeg. Na em i sutim tok i go long kros i save kamap long ol papa bilong graun na gavman.

Em i tok olsem em i laik bai taun i surik i go long narapela distrik we i ken kamap bikpela.

Wabeg taun i bin lusim hap graun bilong em i go long ol papa graun long 1986 taim kros i kamap namel long gav-

man na ol papa graun. Ol pipel i kisim bek graun na ol haus bilong gavman em ol i tokim ol wokman bilong gavman long baim bikpela mani.

Ol samting bilong gavman i lus olgeta na bagrap pinis. CIS haus kalabus em wanpela bilong ol samting bilong gavman i no moa stap.


Sir Kipalan i tokim ol papa bilong graun olsem ol pik i save raun long taun tu na em i givim ol 4-pela wik tasol long tingting gut na salim graun bilong ol long gavman.

Mausman bilong ol papa bilong graun, Clement Nala i tokim Mista Kipalan olsem ol pipel i no laik holim bek graun. Tasol ol i laikim gavman i mas baim gut. Em i sutim tok i go long ol narapela gavman husat i no bin harim tok na bihainim tingting bilong ol.

Mista Nala i tok olsem tupela lapun man tasol i stap husat bai witness taim ol waitman i kisim dispela graun. Na mipela laikim toktok i mas stret bipo long ol dai.

Long 1986 Komisen bilong Lens i tok olsem olgeta samting bilong gavman i stap long dispela graun em bilong gavman.

Tasol Mista Nala i tok olsem ol papa graun i laik kisim bek dispela graun na askim kompensesen long gavman.



• Edministreta bilong Enga, Anderson Aipit (sanap wantaim aiglas) i wok long toktok long ol papa graun long Wabeg long las wik Fonde. Long raithan kona tru em Seketeri bilong Lens Dipatmen, Joseph Aoa.

**WANTOK**  
NIUSPEPA BILONG OL PAPUA NIUGINI STRET

P.O. Box 1982 BOROKO  
Telepon Namba: 25 2500  
Feks Namba: 25 2579

### PE BILONG WANPELA YIA 52 NIUSPEPA

PLES	AIR
Mosbi	K30.00
Arapela PNG eria	K60.00
Australia na Nu Silan	K92.00
Esia pasifik na Japan	K123.00
Amerika na Yurop	K180.00

## NCDC redi long wokim haus bilong ol pasindia

I NO LONG taim nau Nesanel Kapitel Distrik Komisen ( NCDC) bai singautim tenda bilong sanapim 1,500 ol lo kos haus bilong ol skwata setla insait long Mosbi siti.

NCDC siaman David Unagi i tok dispela samting bai helpim tru ol skwata setla long Mosbi i painim gutpela sindaun long famili bilong ol. Pe bilong ol

haus bai stap namel long K6,000 na K7,000 tasol. Na ino bikpela mani tumas.

Mista Unagi i tokaut long dispela samting long dispela wik. Em i tok NCDC bai i go het wantaim ol wok plen bilong em long painim hap graun bilong sanapim ol haus na putim ol setla long en. Na ol i ken stap gut wantaim tu gutpela

sevis i go long ol.

Em no biliv long pasin bilong rausim ol setelmen wantaim long buldosa. Olsem Primia Sinai Braun na ol bikman bilong Is Nu Briten provinsel gavman i mekim long ol skwata long Rabaul.

Em i biliv olsem plenim gut hap bilong putim ol setla long en wantaim gutpela haus na sevis bai i helpim tru ol lain setla.

Pe bilong ol haus long kantri i antap tumas. Na pe bilong planti man husat i wok long taun i no bikpela. Olsem na ol no igat sans long kisim haus.

O kamap memba bilong hom onasip skim bilong Nesanel Hausing Komisen. Olsem na planti long ol woka husat i kisim namel long K2,000 na K5000 insait long wanpela yia i painim hat tru long kisim haus long famili bilong ol. Na ol i stap long ol setelmen eria long taun na siti.

Planti kamapani na gavman ino helpim ol wokman bilong ol wantaim haus. Nogat. Habitat for Housing em i wanpela volunta grup tasol long Mosbi husat i mekim samting long helpim ol lain

wokman na famili husat i kisim liklik pe, Mista unagi i tok.

Sapos NCDC i bihainim pasim bilong ol bikman long Rabaul long rausim ol setla, bai yumi bagarap olgeta. Bikos planti long ol sevis bai ino inap long go het gut.

Long wanem ol opis kiina na ti boi, ol sekyuriti gad, ol draiva na leibra, plis, paia-man, tisa, wokman-meri bilong hausik na planti moa i stap long ol setelmen eria.

Sampela biktaun na siti long wol i plenim gut ol setelmen bilong ol.

## PNG gat graun na maket bilong rais

I NO longtaim i go pinis, sampela saveman bilong wok didiman bilong Saina i bin kam long Papua Niugini. Long dispela wokabaut bilong ol, ol i bin go lukluk raun tu long bikpela faktori bilong Rice Industries long Lae.

Ol i bin opim dispela bikpela faktori long 1988. Na em i bin namba wan faktori bilong Rice Industries long stretim rot bilong groim na wokim yet rais insait long kantri.

Man husat i go pas long ol dispela saveman bilong wok didiman bilong Saina em Dokta Anchor A.C. Lin. Na long taim ol i stap long Papua Niugini, ol bai kamapim ol wok sekap long

kain kain kaikai em inap gro long PNG.

Na wanpela bilong ol dispela kaikai em ol bai sekap gut long en em rais.

Menesing Dairekta bilong Rice Industries, Paul Davis i bin askim Dokta Lin wantaim ol lain bilong em long go lukluk long wanem samting i kamap long Rice Industries.

Kain askim olsem i bihainim tu tingting bilong gavman long kirapim ol wok didiman projek na oi arapela wok olsem.

Long narapela 6-pela yia, Rice Industries i tokaut pinis long tromoi K15 milien long ol kain kain developmen projek.





■ Kanage i bilong Simbu na em i wanpela sumatin long Tusbab haikul long Madang taun. Wanpela taim em i go waswas long solwara long masin gan nambis. Em waswas pinis na sindaun antap long wanpela bikpela ston na hatim skin i stap. I no longtaim na sampela meri Yauro bilong Madang Tisa Koles i wokabout i go klostu long Kanage i sindaun long en na ol i wok long tok Inglis na stori i go. Ol i stori i go na wanpela bilong ol i dropim kom bilong em long komim gras. Taim susa ya i nildaun long kisim kom bilong em, laplap em i pasim i bruk. Sem taim Kanage i lukluk i go na wanpela bikpela lait olsem lait bilong smuk balus bilong Siapan i kukim tupela ai bilong em. Mekim na ai bilong Kanage i pas long samting olsem 15 minit. Em nau ol arapela wanskul bilong meri ya i givim em wanpela arapela laplap na em i pasim. Na ol i lukim Kanage na ol i lap nogut tru. Kanage kirap na askim ol meri Yauro ya olsem: "Hei, em wanem samting ya mi lukim na em i kukim ai bilong mi? Lait bilong balus o lait bilong liklik tos i gat tupela batri long en." Wanpela bilong ol meri ya kirap na bekim: Yu bin go long Rabaul pinis o nogat? Sopos yu go bai yu lukim maunten Tavurvur. Na sopos yu go antap, yu bai sotwin. Dispela samting nau yu lukim na ai bilong yu i pas i wankain olsem maunten Tavurvur. Kanage harim olsem na tokim ol: Yupela i skul na mi tu mi skul. Yu mi lainim kain kain samting. Olsem na inap mipela traim dispela sabjek nau yupela toktok long en. Ol meri Yauro ya kirap na tokim Kanage: Mipela i save les long kaikai kaukau ya. Mipela i save laikim saksak. Bikos nangu em i save wel isi tasol na go insait long maus. Na tu i swit moa yet. Kanage harim ol meri Yauro ya i tok olsem na em i sem pipia stret.

Bara Dixon Bensie  
MADANG

□ Wanpela taim meri bilong Kanage i givim K2 long Kanage na tokim Kanage long go long stua na baim koton (tret) bilong samapim ol laplap. Kanage kisim K2 ya long meri bilong em na givim siksti i go long stua. Em i go kamap long stua na tokim wanpela yangpela meri i wok i stap long stua olsem: Plis susa, inap yu hariap liklik na givim mi kondom. Meri bilong mi i laik yusim na em i salim mi kam long baim. Plis, yu kisim mani na givim mi kondom hariap na mi laik go bek long haus. Nogut mi stap longpela taim na meri bilong mi bai kros. Stuakipa meri ya kaikaim tit na kisim kondom na givim long Kanage. Kanage i laik tok koton tasol em i abrus na tok kondom. Kanage siksti i go bek long haus na givim dispela kondom long meri bilong em na tok: Em ya. Kisim na pinisim laik long samapim ol laplap. Meri bilong em lukim na askim em: Kanage, em wanem samting ya yu baim? Kanage bekim na tok: Na yu askim mi gen long wanem. Samting yu yet tokim mi long baim na mi baim. Yu les na yu laikim wanem kain koton gen. Meri bilong em toktok tumas na Kanage i tokim em: Mi les long toktok ya. Sopos i nogat wok bilong dispela samting orait lusim i stap. Bihain, long nait orait yumi traim lukluk- sopos i gat sampela wok orait yumi ken yusim.

Max Pondaie  
WEWAK

moa tok pilai long pes 20

# Yut bos laikim olgeta yangpela bilong Morobe wokbung wantaim

## ARI GUH DANDEE i raitim

BOS bilong ol yut long Morobe provins, Suma Andum i askim nau olgeta wanlain bilong em long bungim tingting na wok wantaim.

Dispela long wanem planti hevi long nau yet, i wok long kamap long wok bilong ol yangpela. Na tu long dispela yia, gavman i brukim mani na

skelim i go pinis long wan wan distrik bilong olgeta provins insait long kantri. Na dispela bai mekim isi long ol yangpela long mekim ol wok bilong ol.

Mista Andum i askim ol yut siaman bilong ol wan wan distrik long kamapim ol plen bilong wok bilong ol. Na ol i mas bihainim tru ol dispela plen bikos nau i gat mani i stap long distrik bilong ol.

Olsem na long mekim wok i kamap isi, em i tok, yut kaun-

sil i mas daunim namba bilong ol memba bilong ol. Bikos planti memba i save kosim yut kaunsil bikpela mani tumas.

Em i tok sapos ol i daunim namba bilong ol kaunsil memba, dispela bai mekim isi long kaunsil long lukluk long sampela arapela hevi em ol i gat tingting long stretim.

Bikos long dispela as, em bai tokaut long dispela tingting bilong em long namba wan yut miting bilong dispela

yia long Siassi. Na bai i gat 10-pela distrik yut siaman tasol bai bung long kamapim Morobe Provinsal Yut Forum.

Bihain long ol i wokim dispela forum, ol i ken salim tingting na plen bilong wok i go long wan wan distrik yut kaunsil.

Em i tok long las yia, em i luksave olsem i gat planti hevi tumas. Na emi gat tingting nau long stretim ol dispela hevi.

# Skul bilong CODE bruk nabaut long Buka ailan

## ALOYSIUS SAMI i raitim

ROT bilong skruim save long Koles bilong Disten Edukesen (CODE) i wok long pulim planti pikinini nau long Buka ailan.

Bikos ol i painimaut olsem dispela em i wanpela gutpela rot bilong go het na skul.

Long Buka ailan yet nau i gat tupela skul

bilong CODE. Ol dispela skul em Gagan na Hanahan. Planti sumatin husat i no winim gret 6 long las yia nau i wok long go insait long ol dispela skul.

Planti papamama wantaim ol gret 6 skul liya tu i amamas tru bikos dispela fri edukesen polisi bilong nesenel gavman i helpim ol tru. Long

wanem long nau yet bihainim ol hevi bilong ailan, planti papamama i painim hat tru long kisim mani bilong baim skul fi. Olsem na samting em gavman i wokim i givim bikpela helpim tru long ol.

Supavaisa bilong Hanahan CODE, John Limein i tok olsem inap long taim skul i kirap long 1992 i kam, ol i kisim pinis samting

olsem 170 sumatin. Na long dispela yia i gat 88 sumatin i givim nem pinis.

Em i tok long olgeta dispela lain husat i bin skul long Hanahan, 19 bilong ol nau i go

skruim skul bilong ol long Rabaul na ol arapela hap insait long kantri.

Tripela bilong ol i stap

skul long kamap nes long Lemakot Nasing Koles long Nu Ailan provins. Tripela i go stap skul long Ulapia Semineri long Rabaul na narapela tripela i go skul long wok bisnis long Rabaul. Wanpela bilong ol i stap skul nau long Divain Wod Institut long Madang. Ol narapela i go skul long ol vokesenel senta long Rabaul.

# peim hap prais long NAMBAWAN

# FE

**Mt. HAGEN GOROKA**  
**K132 K114**

Port Moresby return  
Conditions apply

Sapos yu laik go long ples na malolo, flai long Tunde, Trinde o Fonde na peim hap prais tasol long tiket. Yu ken go stap long ples long 14 pela dei o moa, tasol inoken moa long tripela ten dei. Yu yet makim taim yu flai tasol yu mas flai long Tunde, Trinde o Fonde.

Air Niugini igivim ol gutpela diskaunt long yu iken go na lukim ol biknem ples. Kain olosem: Long Pot Mosbi igo na kam long Madang K129, Lae K95, Simbu K113, Gurney K101, Popondetta K58 na Rabaul -K187 tasol. Ol narapela ples i wankain tasol.

Lukim Air Niugini na bukim hap prais tiket bilong yu nau.



Offer subject to Government approval. Conditions apply

Lukim Air Niugini o narapela ples long bukim na stretim tiket.

## TU MINIT TINGTING

### BRET LONG BAIBEL

TUDE yumi tingim Gutnius stori i save kirapim taim bilong Len. Em i stori bilong Seten i traim Jisas na i pulim em. Jisas i bin tambu long kaikai inap long 40 de na em i hangre. Nau Seten i kamap na askim em long tanim ol ston i kamap bret. Ating em i bikos bret em i namba wan kaikai bilong ol man bilong dispela taim; na sapos man i hangre, em i hangre long kaikai bret.

Namba wan lo bilong bodi na skin bilong yumi em i bilong sevim laip bilong yumi. Sapos yumi no kaikai, bai laip bilong yumi i pinis. Long tingting bilong ol Juda bilong bipo, bret em i namba wan kaikai.

Dispela tok "bret" i kamap 261 taim long Baibel. Em i stat long stori bilong Paradais yet, long Buk Jenesis 3:19 God i tokim Adam olsem: "Bai yu hatwok tru long painim bret bilong yu." Planti taim bret em inap long biknem "kaikai."


Long Jen. 21:14, Ebrahim i yusim bret. Na long taim Moses na ol Isrel i wokabout long ples wesana nating, dispela "mana" i pundaun long heven em i gat nem: bret i kamdaun long heven. Sam 105:40 i ting long

dispela na i tok: "Em i pulapim ol wantaim bret bilong heven." Na dispela aidia gen i makim Yukaris bilong Nupela Testamen.

Long taim ol Juda i gat bikpela haus lotu bilong ol na ol i givim olkain ofa, long olgeta de i mas i gat wanpela tebol i pulap long nupela bret.

Baibel i tok long ol manmeri i go wok bilong winim bret. Long 1 King 13:15 yumi rit olsem: "Kam long haus bilong mi bai mitupela i kaikai bret." Em i mak bilong pren bilong kaikai bret wantaim. Long planti kantri, long PNG tu, kaikai wantaim em i mak bilong wanbel. Sen Pol i gat dispela sem tok long Yukaris. Em i tok long 1 Kor 10:17 olsem: "I gat wanpela bret tasol, na yumi olgeta i save kaikai dispela bret. Na maski yumi planti manmeri, yumi stap wanpela bodi tasol."

Long 2 King 18:32 i gat dispela tok long Isrel em i "kantri bilong wit na wain, bilong bret na ol diwai i karim prut." Sam 104:15 i tok olsem: "wel na bret i strongim bel bilong man." Na



FRANK MIHALIC i raitim

Aisaia 58:7 i tok yumi mas serim bret wantaim ol manmeri i hangre."

Long Nupela Testamen Maria i karim Jisas long Bethlehem. Bethlehem em i min: "haus bilong bret." Jisas yet i bin skulim yumi long pre long Papa bilong kisim bret inap long wan wan de. Wanpela taim Jisas i wokim mirakel we em i givim bret long 4,000 manmeri; na narapela taim em i givim bret long 5,000 manmeri. Jon sapta

6 i pulap long tok bilong bret na Yukaris. Hia Jisas i tok olsem: "Mi bret i givim laip. Mi bret i bin kam daun long heven." (J 6:35-41).

Dispela aidia bilong Jisas long stap wantaim yumi insait long bret long taim yumi kisim Yukaris, em i wanpela klewa aidia moa. Namba wan, Jisas i yusim wanpela samting olgeta wantok bilong em i save yusim long olgeta de; em bret tasol. Na namba tu samting: yumi save kaikai bret na em i save tanim long bodi na bun bilong yumi. Olsem tasol na Jisas i save kam insait tru long bun na blut na mit bilong yumi long rot bilong bret bilong Yukaris. Yukaris i hangamap long bret tasol. Sapos i no gat bret, i no gat Yukaris.

Tude yet, olsem long taim bilong Ebrahim, pasin bilong sindaun kaikai bret wantaim, em i mak bilong belgut na pasin gutpren.

Long taim yumi kaikai bret, yumi save wokim wanpela mirakel, em ol bikpela saveman na sayentis i no inap wokim.

Yumi save givim laip long samting i dai pinis. Yumi save daunim bret i dai pinis, na yumi save givim laip long en, long wanem, nau dispela bret i kamap hap bilong bodi bilong yumi.

I gat wanpela stori bilong bret. Em i go olsem: Wanpela Sister, nem bilong em Mama Kabrini, i laik helpim ol pikinini i no gat papa na mama. Orait, nau wanpela meri i gat planti mani, i givim wanpela bikpela naispela haus long Mama Kabrini bilong mekim dispela wok. Tasol bisop i no belgut long dispela haus na dispela wok na em i krosim manmeir ya na i tokim em olsem: "Yu bin givim planti mani long dispela wok; tasol bihain long wanpela yia bai dispela mani i pinis; na wok bai pundaun."

Manmeri ya i bekim tok long bisop olsem: "Bisop yumi no ken wari long tumora. Long taim yumi pre yumi save askim God Papa long bret (kaikai) bilong tude tasol; na i no bilong wanpela yia."

Em tasol sampela aidia bilong bret long Baibel.

## Skul bilong ol famili kamap long Mosbi

DISPELA yia long wol em i Intanesenel Yia bilong Famili.

Planti sosol welfea grup, ol Kristen wantaim ol sios na ol narapela grup long olgeta hap bilong graun i gat samting bilong mekim long tingim na amamasim dispela.

Gutpela famili em i as bilong strongpela na

strepela Kristen kantri.

Ol papamama tu i wok wantaim bilong givim gutpela skul long ol pikinini bilong ol. Olsem bai ol inap gro wantaim gutpela save na rispek long man na God. Sapos sindaun long famili i orait, bai no gat bikpela hevi i kamap long ol komyuniti, ples na long kantri.

Tasol long nau yet, ol kain kain hevi i wok long kamap. Planti famili i no sindaun gut wantaim, ol marit i bruk, hevi bilong strongpela dring i kamap bikpela namel long ol yangpela wantaim ol bikpela manmeri i kamap bikpela moa. Planti yangpela tu i gat hevi bilong

kisim, baim na salim spakbrus na ol arapela marasin nogut olsem.

Bihainim dispela tingting bilong famili yia, lotu Katolik insait long Nesenel Kapitel Distrik i laik strongim gutpela sindaun bilong famili long kantri.

Olsem na ol peris insait long siti i go inap long Sogeri i kirapim Famili Laip Apostolet progrem. Dispela i bilong givim semina na skul long ol famili na ol yangpela bilong Mosbi.

Sister Lucy bilong ol lain RVM i go pas long Asdaiosisien Famili Laip progrem.

Em i tok ol i kirapim pinis ol mama grup insait long wan wan peris bilong helpim long wok bilong bringim Jisas i go insait klostu long ol famili. Ol dispela grup bai go tu long ol skul bilong Mosbi na toktok long ol sumatin. Ol ripot i tok toktok bilong ol dispela grup

bai sut long pasin bilong soim rispek long wanpela na narapela. Na tu bilong skulim ol long ol hevi na bagarap em spabus, strongpela dring wantaim pasin pamuk i save kamapim.

Sampela toktok bilong ol tu bai sut long toktok bilong famili laip na lukluk bilong wan wan manmeri wantaim wok bilong famili plening.

Long nau yet, Mosbi, Sogeri na Hanuabada peris tasol i no gat ol dispela mama grup yet. Ol narapela peris i kamapim pinis ol grup bilong ol.

Askim i go tu long husat manmeri i gat laik long helpim dispela wok progrem i ken go lukim Sister Lucy. Dispela progrem tu i no bilong lotu Katolik tasol, ol narapela lotu tu i ken kambung wantaim ol lain Katolik bilip man na meri.

## Yunited Sios singaut gen long holim bel isi bung

PLANTI toktok bilong holim bel isi bung bilong pinisim ol hevi long Bogenvil hevi i kamap i go na pinis nating.

Tasol dispela em i gutpela rot bilong stretim olgeta hevi. Bung i mas kamap namel long ol gavman lida wantaim lotu bilong PNG na ovasis.

Wanem ovasis lotu i gat wari long dispela hevi bilong Bogenvil i ken kambung wantaim na autim tingting bilong ol long dispela. Na i no gutpela long lukluk long wanpela sait tumas oltaim.

Seketeri bilong Yunited Sios long PNG na Solomon Ailans, Demas Tongogo i bin autim dispela tingting bilong em bihain long em i lukim olsem hevi bilong Bogenvil i stap yet. Na em i amamas olsem Prais Minista Paia Wingti i oraitim wanpela palamen grup bilong Australia long go long Bogenvil.

Ol ripot i tok olsem dispela grup bai go long Bogenvil long mun Epril. Na ol bai go long hap bilong glasim ol bagarap em PNG Difens Fos wantaim BRA i kamapim long ol pipel bilong Bogenvil.

Tasol Mista Tongogo i laikim dispela wokabout long stap olsem wanpela bel isi wokabout.

Em i tok hevi bilong Bogenvil i stap longpela taim pinis. Na planti pipel i karim hevi na pen na ol arapela i dai pinis. Olsem na em i gutpela long olgeta grup long wokbung wantaim na pinisim ol dispela hevi.

## Mosbi redi long bikpela Katolik yut semina

EDDIE SAUNDERS i raitim

WANPELA bikpela yut semina bilong ol Katolik yut bai kamap long Mosbi. Semina bai stat long Februari 20 na pinis long Mas 5. Na ol lain bilong Mosbi Katolik Asdaiosis bai go pas long en.

As tingting bilong holim dispela semina em bilong skulim ol yangpela man na meri long kamap gutpela Kristen lida insait long lotu, ol komyuniti bilong ol na tu bilong kantri.

Ol yangpela bilong Popondetta, Kep Rodni, Rigo, Bereina na Kerema Daiosis bai kamap long dispela bung.

Ol saveman wantaim ol arapela opisa bilong lotu katolik yet bai givim skul long ol yut long dispela bung.

Anna Solomon em i wanpela savemeri stret long

wok bilong nius na pablik rilesen wok. Na em i bos bilong dispela kain wok long Word Publishing kampani husat i save wokim PNG Times, Wantok, PNG Business na Weekend Sports niuspepa. Em bai wanpela long ol lain husat bai toktok long dispela bung.

Long wankain taim tu bai i gat ol lain i makim. Dipatmen bilong Hom Afeas na Yut long dispela bung.

Long Mande, Februari 21, nesanel memba bilong Nesenel Kapitel Distrik na Spika bilong Palamen Bill Skate bai givim toktok long ol yut taim em i opim dispela semina.

Katolik Asbisop bilong Mosbi na siaman bilong Asdaiosis Katolik Yut Konprens (ACYC), Sir Peter Kurongku i laikim ol papamama wantaim peris kaunsil bilong ol long kamap tu long dispela semina.



**Givim presen...**Het bisop bilong Luteran Sios bilong Papua Niugini, Bisop Getake Gam i givim ol presen i go long Bisop Nassar bilong Jodan Luteran Sios long taim bilong bikpela sinod long dispela yia. Bisop Nassar i bin kam bilong lukluk tasol long dispela namba 19 sinod.

# AIR NIUGINI EXPLORER FARES

# AIR NIUGINI SLASHES FARES AGAIN



**BRISBANE**

EX POM RETURN

**K399**

*Was K846 Save 52%*

**SYDNEY**

EX POM RETURN

**K499**

*Was K1,036 Save 52%*

Let's get moving, Brisbane and Sydney have never been so close. This amazing return airfare offer is just too good to refuse. Along with the already generous domestic fare offers, Air Niugini is making it easier for you to experience the exciting cities of Sydney and Brisbane.

Your return fares have been heavily slashed and are now the lowest in years. Air Niugini is committed to the development of tourism in Papua New Guinea, the land of adventure and excitement as well as making international travel more accessible to

Papua New Guineans, our ambassadors to the world. All you have to do is book through Air Niugini Telephone Sales on 27 3444 or 27 3555 or your travel agent, and pay for your ticket within 48 hours.

Travellers from other PNG ports may take advantage of a special 30% domestic discount or our existing domestic special fares, to make travel even more affordable.

This offer applies to travel between 22.2.94 and 21.5.94.



**Air Niugini**

*Conditions apply. Subject to Government Approval.*

*Phone Air Niugini Telephone Sales 27 3444 or 27 3555 or your travel agent for full details.*

# Ol papamama no amamas nau long komyuniti skul projek fi

**FELIX RAMRAM i raitim**

PLANTI papamama bilong Vanimo i no amamas long baim skul projek fi bilong dispela yia. Ol i tok mak bilong mani bilong dispela yia i bikipela tumas.

Fi bilong dispela yia i karamapim tu mani bilong P&C fi. Na dispela em inap long K80.

Ol papamama husat em ol pikinini bilong ol i save go skul long Vanimo komyuniti skul i tok olsem projek fi bilong dispela yia i winim tru bilong las yia na 1992. Olsem na planti i tok ol i no inap baim dispela mani.

Projek fi bilong ol papamama husat i gat wanpela pikinini tasol i go long skul bai wankain tasol olsem bilong ol dispela lain husat i gat moa long wanpela pikinini.

Dispela tu i mekim na planti papamama i no amamas. Ol i tok dispela kain pasin marimari skul i bihainim i no stret.

Ol ripot i tok olsem projek fi bilong skul long dispela yia em K50. Na P&C fi em K30.

Olsem na ol papamama i tok i mobeta olsem antap long dispela projek fi, ol papamama husat i

gat moa long wanpela pikinini i go skul i baim sampela moa ekstra mani. Na dispela i no inap kamapim tumas moa hevi.

Wanpela lista bilong Bod ov Menesmen i soim olsem i gat 5-pela wok projek em skul i mas kirapim long dispela yia. Na kos bilong ol bai inap long K53,500.

Namba wan projek em haus buk bilong skul (K20,000), ol tebol bilong ol sumatin long yusim (K1,500), wok bilong stretim ol haus, klasrum, opis na ol arapela samting bilong skul (K6,000), ples bilong pilai basketbal (K1,000) na banis bilong skul (K25,000).

Ripot i tok olsem bikipela hap mani bilong wokim haus buk bilong skul bai kam long ol projek fi em ol papamama i baim.

Long dispela yia, Vanimo komyuniti skul i autim baset bilong en inap long K70,120. Long dispela mani, wok edministresen yet bai kaikaim samting olsem K16,600.

Bihainim dispela baset, skul i skelim dispela kain mani bilong kamap long ol wan wan wok: projek fi - K22,500; P&C fi - K13,500; skul kentin - K3,600; fan resing - K5,000; rent (haus tisa) - K520; na helpim bilong ol memba em K25,000.

**Pil yusim  
K47,000 long  
helpim Madang**

## Politisen autim tingting bilong kirapim komyuniti gavman long E.S.P

**BEN TAUMAI i raitim**

**CHARLES MALENKI i raitim**

PLIS minista na memba bilong Madang, Stanley Pil i givim pinis ripot bilong mani nesanel gavman i givim long em long las yia bilong yusim long ilekret bilong em.

Mani Mista Pil i yusim i bilong rurel sektorel fan, komyuniti developmen fan na rurel developmen fan.

Long dispela tripela hap, komyuniti developmen fan i kisim bikipela mak bilong mani inap long K23,000, rurel developmen fan i kisim K15,000 na trenspot i kisim K5,000.

Mista Pil i yusim tu K2,000 long taim bilong amamasim independens long las yia.

Mak bilong olgeta mani Mista Pil i yusim em K47,000. Na em i yusim long stretpela rot.

Pil i givim dispela ripot i go long edministreta bilong Madang, Wep Kanawi. Na Mista Kanawi bai givim i go long Asisten Seketeri bilong Dipatmen bilong Fainens na Plening long Madang.

Long las yia, memba i baim 5-pela spitbot, tupela wokabaut somil, tupela ambulens na tripela ka. Em i givim ol dispela samting i go long ol pipel long ilekret bilong em.

WANPELA provinsal memba bilong Is Sepik, Raphael Digi i tok olsem long narapela mun taim provinsal asembli i bung, em bai askim ol arapela memba long sapotim em na senisim olgeta lokol gavman kaunsil i go kamap olsem ol komyuniti gavman.

Dispela long wanem, planti konstituensi insait long provins i kam aninit long wanpela lokol gavman kaunsil. Olsem na mani wan wan lokol gavman i save kisim long mekim wok bilong ol kaunsil projek i no bikipela tumas. Na tu em i no inap long helpim olgeta pipel bilong wan wan konstituensi.

Mista Digi i tok planti liklik projek olsem rot na bris i save kam aninit long ol kaunsil wantaim ol pipel bilong lukautim na stretim. Na mani provinsal gavman i skelim long ol dispela kain liklik projek i no bikipela. Dispela mani em inap tasol long ranim ol edministresen wok.

Is Sepik provins i gat 22 lokol gavman kaunsil. Ol dispela lokol gav-

man kaunsil i save kisim mani bilong olsem helpim mani long provinsal gavman long wan wan yia. Na tu ol i save kisim mani i kam long nesanel gavman aninit long Nesanel Gavman Rurel Impruvmen Progrem Gren. Dispela em samting olsem K500,000 long olgeta yia.

Wanpela gutpela piksa bilong dispela em long Wewak But Lokol Gavman Kaunsil.

Dispela kaunsil i gat 4-pela konstituensi bilong lukautim-Wewak Lokol, Wewak Ailan, But/Dagua na Boiken. Dispela 4-pela konstituensi i bikipela tumas long wanpela lokol gavman kaunsil bilong lukautim.

Em i tok sapos provinsal gavman i lukluk long kamapim wan wan konstituensi olsem wanpela komyuniti gavman, wok bilong kirapim wan wan hap bai stap long han bilong wan wan konstituensi.

Dispela i min olsem, memba bilong wan wan konstituensi bai kamap sianan bilong komyuniti gavman. Na olgeta projek bai kam aninit long komyuniti gavman.

Dispela sistem i wankain olsem ol lain bilong Is Nu Briten na Manus i wok long bihainim nau.

## Memba tok lukaut long ol bisnis

**ARI GUH DANDEE i raitim**

NESENEL memba bilong Bulolo, Samson Napo i askim nau ol bisnis oganaisesen bilong ol arapela kantri insait long Bulolo na Mumeng long kisim ol pipel long dispela tupela hap long wok wantaim ol.

Mista Napo i mekim dispela toktok bihain long em i luksave olsem ol pipel long ol arapela hap i save painim hat long go bek long ples bilong ol. Dispela em long taim kampani i pinisim ol long wok.

Em i tok dispela pasin i bin kamap long taim bipo. Planti waitman i kisim

ol manmeri bilong ol arapela hap bilong go wok long ol. Taim ol i rausim ol long wok, ol dispela waitman i no save salim ol i go bek long ples bilong ol. Na dispela i save kamapim bikipela hevi tru long dispela lain.

Mista Napo i tok dispela kain ol waitman i tingting tasol long pulimapim poket bilong ol. Na ol i no gat tingting bilong helpim ol pipel husat i save wok long ol.

Napo i tok em i save les tru long lukim na harim kain kain toktok ol bisnis oganaisesen long Bulolo na Mumeng i mekim long ol pipel bilong ilketret bilong em.

## Ol meri Hoskins kisim moa buk bilong skul

OL meri bilong Hoskins Girls Vokesenel Senta long Wes Nu Briten i amamas nau olsem wanpela ovasis gavman bai helpim ol.

Gavman bilong Japan i tok orait pinis long givim sampela buk i go long haus buk (laiberi) bilong ol meri long vokesenel senta. Kos bilong dispela em moa long K19,000.

Aninit long dispela projek em gavman bilong Japan i kamapim long 1989, ol meri bai inap yusim ol dispela buk bilong helpim ol long skul bilong ol. Bikos gavman bilong Japan i luksave tu olsem insait long Papua Niugini tude, ol meri tu i gat bikipela wok o inap mekim bikipela samting bilong kirapim kantri.

**BUY NEW**

**Scratch LOTTO**

**HERE IS WHAT YOU CAN WIN**

**ONLY K1.00 A TICKET**

**TOP PRIZES**

**TOYOTA UTES**

**WORTH OVER K12,000 EACH**


**CASH PRIZES**

**K1000, K500, K25, K5, K3, K2, K1**



# YAMAHA

Marine




## Powering the Nation



### NIUELA NAMEL CONSOLE

I kam wantaim olgeta samtim, mekim olgeta samtim i wok long wanpela hap tasol na i gat ful stia sistem, dispela nupela console inap givim yu bikpela hap bilong lukluk, hevi bilong ol kago bai go long olgeta hap, na yu no inap wari long bot i tantanim nabaut. I gat i stap nau bilong ol 14ft, 19ft na 24ft model long olgeta stua bilong Ela Motors long Kantri.



### HAMAMAS TRU LONG WOKIM LONG PNG

Sampela bilong ol eksperiens man stret bilong Kantri i save wokim ol dispela Yamaha FRP Bot long Milen Be Provins aninit long Yamaha Laisens bilong Japan, wantaim ol nupela Senta Console yunit. Mipela i hamamas tru long sapotim ol lain bilong yumi yet husat inap wokim ol top kwaliti samtim em mipela i save yu olsem yu ken hamamas long kisim na pinisim laik wantaim.

**YAMAHA**  
Marine

# Ela Motors

# Oposisen wantaim gavman sapota egensim tingting bilong rausim ol EDF mani

**RODNEY KAMUS i raitim**

TINGTING bilong gavman long rausim dispela K300,000 ilektrol developmen fan (EDF) mani bilong ol memba na givim i go long Dipatmen bilong Praim Minista i kamapim planti bel hevi nau.

Gavman i laik rausim dispela mani long wanem baset bilong kantri long rot bilong kisim mani i pundaun. Bikos prais bilong salim wel tu i go daun.

Sampela memba bilong Palamen i lukim olsem olgeta promis bilong ol i go long ol pipel long ilektret bilong ol bai lus nating sapos gavman i rausim dispela EDF mani.

Long wanpela bung long Tunde, sampela oposisen memba wantaim wanpela bek bensa bilong gavman i autim tingting bilong ol long dispela samting gavman i laik mekim. Na ol i bilip olsem kain kain hevi bai kamap sapos gavman i rausim dispela mani bilong ol.

Ol lain husat i tokaut olsem ol i no wanbel long dispela tingting bilong gavman em memba bilong Sendaun John Tekwie, memba bilong Aitape/Lumi Paul Mambei, memba bilong Kundiawa Joseph Ongulo na memba bilong Bulolo Samson Napo.

Mista Napo i tok em bai kisim gavman i go long kot sapos ol i mekim dispela. Bikos olgeta memba i oraitim

pinis dispela EDF mani long baset long Palamen.

Em i tok dispela K300,000 ilektrol fan em ol memba i lukim olsem wanpela rot bilong helpim ol pipel long wan wan ilektret bilong ol. Em i bilip olsem i gat narapela tok hait i stap na gavman i laik mekim dispela.

"Ol lain husat bai kisim taim long dispela em ol bek bensa bilong Palamen. Long wanem ol i no inap givim sevis bilong wok edukesen, helt, wantaim ol narapela developmen wok i go long ilektret bilong ol," Mista Napo i tok.

Mista Ongulo i tok olsem gavman i mas tokaut stret long ol pipel bilong wanem na em i rausim mani em ol pipel i

plenim pinis long kirapim ol projek insait long ilektret bilong ol.

Memba bilong Aitape/Lumi Paul Mambei i tok planti hevi bai kamap namel long ol pipel na ol memba bilong wanem ol i no givim mani bilong mekim wok developmen long hap bilong ol.

Mista Tekwie i tok olsem dispela kain pasin gavman i laik mekim i soim olsem em i rabisim ol narapela memba bilong Palamen.

Planti memba ya i bilip olsem gavman i laik yusim ol dispela mani long baim ol memba. Long wanem em i pret long vot bilong nogat bilip em bai kamap long mun Mas taim Palamen i bung gen.

## Toktok bilong Bogenvil stap namba wan tru

**VERONICA HATUTASI i raitim**

PRAIM Minista Paias Wingti wantaim sampela sinia gavman minista na opisa i bin go lukluk raun long Australia stat yet long Trinde las wik, Februari 9 i go inap long de namba 14.

Long nau yet, Mista Wingti na ol lain bilong em i stap long Nu Silan bilong toktok wantaim ol bikman bilong gavman long hap.

Mista Wingti na Praim Minista bilong Australia, Paul Keating wantaim ol arapela sinia gavman opisa i bin toktok long ol samting i karamapim wokbung bilong tupela kantri. Moa yet long sait bilong wok bisnis.

Mista Wingti i bin bung wantaim ol bisnisman bilong Australia na toktok long wok bisnis insait long PNG.

Tasol nius bilong Mista Wingti long Australia i bin pulap long ol Bogenvil Revoluseneri Ami (BRA) sapota i protes. Stat yet long taim em i kamap long Australia long Trinde las wik i go inap taim em i go long Nu Silan.

Rosemarie Gillespie na Moses Havini i bin go pas long grup ol i kolim long Bogenvil Fridom Muvmen. Ol i wokim ol kain toktok long bringim i kam long ples kliia dai bilong planti Bogenvil pipel insait long pait na hevi long ailan. Ol lain ya i sutim tok long ol PNG Difens Fos soldia long bagarap na dai bilong ol Bogenvil pipel. Dispela grup i no laik long Panguna kopa main i op gen.

Ol i yusim ol spika bilong tromoi ol kain kain toktok i go long Mista Wingti.

Sampela long ol toktok em "Wingti go long ples," "Bogenvil marasin na i no mota," "Nogat blut long kopa, nogat blut long mani," "Fridom long Bogenvil," "Australia na PNG rausim han bilong yupela long Bogenvil" na ol planti arapela kain tok olsem.

Long taim Mista Wingti i stap malolo long Regent Hotel long Sidni, wanpela grup i wokim ol kain kain toktok long spika na singaut long Mista Wingti olsem em i wanpela raskol na as bilong planti dai bilong ol pipel long Bogenvil.

Long las Fraide nait tu, tripela BRA sapota i bin go insait long em Mista Wingti i bin go bilong toktok wantaim ol bisnisman bilong Australia. Ol hotel sekyuriti i no lukim ol taim ol i wokabaut i go insait. Ol i kisim nem bilong sampela lain long hotel na yusim long go insait long rum em Mista Wingti wantaim ol bisnisman i bung long en.

Ol lain ya i bin bikmaus na sutim tok long Mista Wingti na gavman bilong em long ol hevi long Bogenvil.

Tasol sekyuriti bilong hotel i holim ol pastaim long ol i kamapim trabel.

PNG Foren Afeas seketeri Gabriel Dusava i no bin amamas long dispela samting. Na em i askim Hai Komisina bilong PNG long Australia long lukluk long dispela.

Tasol Mista Wingti i no wari long ol dispela samting. Em i tok ol lain BRA sapota husat i protes i no planti. Na ol i no gat bikipela sapot.

## Australia kisim tok orait bilong go long Bogenvil

WANPELA palamen grup bilong Australia bai go lukluk raun long Bogenvil long mun Epril.

Praim Minista Paias Wingti i bin tokaut long dispela samting long las wik long Australia.

Mista Wingti i bin go stap long 5-pela de lukluk raun long Kenbera, Melbon na Sidni bilong toktok wantaim wanwok bilong em long Australia, Paul Keating na ol bisnisman bilong Australia.

Ol bikipela toktok i bin karamapim ol wok bisnis namel long tupela kantri.

PNG gavman i bin kisim askim bilong wanpela grup bilong Australia long go long Bogenvil long mun Desemba las yia.

Long las wik tasol, Mista Wingti i oraitim askim bilong ol bihainim toktok bilong em wantaim Mista Keating.

Grup bai sekap tu long ol bagarap na indai em ol soldia bilong PNG Difens Fos

wantaim ol lain BRA i kamapim.

Wanpela ripot i kam long opis bilong minista bilong Bogenvil Afeas, Michael Ogio i tok em i no laikim Rosemarie Gillespie long suvim het long strongim tingting bilong Mista Keating long dispela lukluk raun i go long

Bogenvil.

Sapos tupela bikman bilong PNG na Australia i pasim toktok long laik bilong ol yet, em i gutpela. Bikos long nau, Mista Ogio i tok, em i luk olsem Misis Gillespie i sanap bak-sait long ol sampela gavman polisi i karamapim PNG em gavman bilong Australia i mekim. Piksa em dispela luksave ol i givim long wanpela meri Bogenvil long kamap olsem wanpela refuji bilong Australia.

Mista Ogio i no bin amamas long tingting bilong refuji traibunel bod. Em bai moa gutpela sapos komiti i kisim tingting bilong

sampela bikman bilong PNG gavman pastaim long dispela tok orait.

Em i tok tu olsem ol pipel bilong Bogenvil i no moa sapotim BRA.

Ol i les pinis long bagarap na taim nogut ol BRA i kamapim long ol. Na pasin em Gillespie i wok long mekim i sapotim ol BRA long pait bilong ol long bruk lusim PNG. Dispela pasin i strongim dai bilong ol pipel bilong Bogenvil long pait namel long ol yet. Na Gillespie i no kliia long asua em i kamapim long taim em i sapotim ol BRA, Mista Ogio i tok.

Em i tok i mobeta sapos sampela bikman bilong Australia i toktok long ol boi Bogenvil husat i kam malolo long Mosbi. Na kisim ol trupela stori long sindaun long ailan long dispela taim. Maski long harim wansait toktok bilong Havini na Gillespie. Meri ya i laik apim nem bilong em tasol, Mista Ogio i tok.

## Inglan givim wokabaut haus sik long PNG

PAPUA Niugini i gat wanpela nupela kain stail haus sik.

Dipatmen bilong Helt i bin kisim long las wik. Dispela haus sik i stail long wanem em i no inap stap long wanpela hap tasol. Nogat. Em bai go nabaut.

Dispela haus sik i olsem wanpela liklik haus na i ken stap antap long ka bilong karim i go long olgeta hap.

Nem bilong dispela stail haus sik em POD. Na Hai Komisina bilong Inglan i bin givim dispela haus sik i go

long Dipatmen bilong Helt long Mosbi haus sik.

Ol dokta na nes inap yusim dispela kain haus sik long taun na ples wantaim.

Dispela stail haus sik i ken kamap olsem ambulens tu na karim ol sikman o wanpela liklik edpos na i gat planti arapela wok bilong em long mekim.

Helt Minista Francis Koimanrea i tok tenkyu long Hai Komisina bilong Inglan, John Guy husat yet i bin givim dispela haus sik i go

long Papua Niugini.


"Dispela bai helpim gavman long bringim ol gutpela helt sevis i go stret long dua bilong ol manmeri long taun na tu long ples husat i save wokabaut longpela hap tru long painim sut na marasin," Mista Koimanrea i tok.

Em i askim tu ol memba bilong Palamen long yusim hapbilong dispela K300,000 EDF mani bilong ol long baim wanpela kain haus sik olsem bilong hap bilong ol yet.

Mista Koimanrea i bin lim-

limbur i go long Inglan long las yia na i lukim dispela liklik stail haus sik. Na gavman bilong Inglan i givim dispela long Helt dipatmen. Prais bilong dispela POD em inap long K14,000.

Mista Guy i tok olsem gavman bilong Inglan i amamas long givim dispela helpim i go long ol pipel bilong Papua Niugini. Long wanem dispela bai givim gutpela sevis i go long ol pipel husat i save painim sik na hevi insait long ol ples na taun.



**KIMBE, Wes Nu Briten:** Provinsal Plis Komanda bilong Wes Nu Briten, Sief Inspekta Titus Pamben i kamap long ai bilong kot las Fraide long sas bilong stilim mani.

Kimbe Distrik Kot i tokim em long baim K200 olsem bai em i no inap stap insait long kalabus na wetim kot. Em bai kot gen long dispela wik.

Bos bilong ol plisman long Niugini Ailan rijon, John Toguata i tok Pamben i no inap mekim wanpela wok inap kot bilong em i pinis.

Ol ripot i tok olsem ol plisman i bin sasim Sief Inspekta Pamben long stilim K140 long ain bokis bilong Plis Dipatmen. Dispela em i hap bilong ol stilmani em ol kot prosekyuta i putim long ain bokis bilong wetim kot. Tasol taim ol laik kisim bek dispela mani, em i no stap. Bihain long sampela taim, ol i painim gen dispela mani.

Wok painimaut i kamap long dispela na ol i painim olsem Pamben i rong. Long Fonde las wik, ol i stapim em long wok bihain long ol plisman i sasim em. Inspekta Samuel Niba i holim nau wok olsem ekting bos bilong ol plisman long Wes Nu Briten.

**MAPRIK, Is Sepik:** Kot i salim pins wanpela man Maprik i go long kalabus inap long taim em i dai bihain long kot i painimaut olsem em i rong long kilim wanpela plisman. Kot i kalabusim tu tripela poro bilong em long planti yia.

Plisman husat i dai em Joe Mohave husat i gat 28 krismas. Na em i bilong Wes Nu Briten provins. Long taim em i stap mekim wok long Maprik, em i bungim birua long mun Desemba, 1992.

Ripot i tok ol tripela ya i bin laik stilim mani bilong bikipela bakstua bilong Garamut em ol i laik bringim i go long ples balus. Tasol long hap rot, dispela birua i kamap na plisman ya i dai.

Man husat bai go long laip yia kalabus em Collin Silkimbiak husat i gat 37 krismas na i bilong ples Warakum long Is Sepik. Kot jas Warwick Andrew i salim Silkimbiak long laip yia kalabus. Long wankain taim, em i salim tu Skipper Wanda husat i gat 23 krismas long kalabus inap long 15 yia. Oxley Ati na Leo Yui wantaim i gat 23 krismas. Na tupela tu bai go kalabus inap long 15 yia.

Pastaim long dispela birua, Silkimbiak i bin kilim tu wanpela sumatin bilong Hayfield vokesenel senta long 1978.

Jastis Andrew i tok em i no gutpela long kain man olsem Silkimbiak i stap raun nating insait long komuniti. Kain man olsem i mas stap long kalabus.


**BOROKO, Nesenel Kapitel Distrik:** Plis i mekim wok sekap nau long dai bilong wanpela waitman. Man ya em Douglas Max Day bilong Australia na em i maritim wanpela meri PNG. Em i bin dai long Februari 3.

Plis i wetim yet ripot bilong dokta bilong sekap gut long dai bilong Mista Day.

Sampela ripot i tok olsem Mista Day i bin hangamapim em yet long rop na i kilim em. Em i no dai inap long taim ol i rausim em long rop na bringim em i go long haus sik. Long hap rot, em i dai.



*Birua long Thiland ...* Tupela tren bilong karim ol man i bam na planti man i kism bagarap. Ol plisman i traim long rausim bodi bilong tupela man husat i dai.



*Klostu tru ...* Wampela man France husat i save painim pis i laik paitim wampela plisman. Tasol plisman i hait long sil bilong em. Ol i kros long wanem gavman i no baim gut ol pis bilong ol.




*Gutbai Kenel ...* Ami bilong Amerika ya wantaim ol narapela i tok gutbai long bos bilong ol taim ol i lusim Somalia na go bek long Amerika.

# Mortein


## save kilim binatang hariap

LUKAUTIM GUT OL FAMILI BILONG YU LONG FIVA NA OL KAINKAIN SIK EM OL BINATANG NOGUT I SAVE KAMAPIM.

HRD 14752



*Giaman tu orait ...* Presiden bilong Saut Afrika Mista de Klerk i harim toktok bilong wampela liklik mangi. Ol manmeri husat i stap klostu i singaut antap long Presiden taim em i mekim dispela.



*Traim tasol ...* Wampela soldia bilong Sebla i wok long traim wampela pawa gan bilong sutim ol bulus. Bikpela palt i stap yet long Bosnia.




*Lukaut ..* Soldia ya i sanap was long stopim palt namel long ol Inkatha na ol sapota bilong ANC long Saut Afrika.



*Berlin Wol pinis nau ...* Dispela wol is save brukim is na Wes Jemeni namel. Tasol nau i bruk pinis. Wampela wokman i redi long brukim las hap bilong dispela wol na mekim wampela haus.



*Was gut ...* Paltman ya i was long wampela meri Muslim taim meri ya i go long matmat long wampela olupela taun long Sarievo.



*Sanap Longwe ...* Wampela mangi bilong Kantri Somalia i lukluk long wampela ami bilong Yunaited Nesen husat i wok long banisim wampela kem bilong ol UN.



**Smatwan anti...** Em nau, ol kum katim ya bilong BMS opis long Vanimo, Wes Sepik provins i solm nupela yunifom bilong ol. Ol i bin go long Jayapura na balm ol dispela yunifom bilong yusim long wok. Bikos long lukluk bilong ol, ol i laikim olsem ol gavman woka i mas dresap gut oltaim. *Poto: Felix Ramram.*

## Australia televisen grup stap nau long Bogenvil

WANPELA televisen grup na niusman bilong Australia i stap nau long Bogenvil bilong kisim piksa na stori long ol wok gavman i mekim bilong stretim ples na sindaun bilong ol pipel long ailan. Ol lain ya i bilong Sanel 9 televisen kampani long Melbon.

Grup i lusim Mosbi long Tunde apinun wantaim Minista bilong Fainens na Plening, Masket langalio.

Bos bilong PNG Difens Fos, Brigedia Robert Dademo na namba tu Spika bilong Palamen Ben Okorro i stap tu wantaim dispela grup i go long Bogenvil.

Tasol pastaim long balus bilong ol i pundaun long Buka, pailot i kisim tok save long nius seketeri bilong praim minista, Peter Spencer long stapim raun bilong ol na tanim i kam bek long Mosbi.

Bikos ekting praim minista na minista bilong Foren Afeas na Tred, Sir Julius Chan i bin gat sampela bikpela toktok long wok mani wantaim Mista langalio. Na tu, grup i no bin kisim tok orait pastaim long Stet Minista bilong Bogenvil Afeas, Michael Ogio bilong go long Bogenvil.

## Sapot progrem bilong Wol Helt Oganaisesen

WOL Helt Oganaisesen i tokaut pinis long progrem bilong en long sapotim ol pipel insait long Papua Niugini.

Dispela progrem i bilong yia 1994 na 1995. Kos bilong dispela progrem em inap long K650,000. Na em bai sut long wok bilong givim inap skul long ol ekstensen helt woka bilong helpim ol pipel bilong ples insait long kantri.

Long taim em i tokaut long dispela, man husat i lukautim wok bilong Wol Helt Oganaisesen (WHO) long PNG, Dokta Steve Karel i tok WHO wantaim Dipatmen bilong Helt i gat bikpela taim bilong lukluk na helpim ol kain wok progrem olsem. Bikos pipel em i bikpela samting tru, olsem na ol bai amamas tasol long givim helpim.

Ol dispela toktok i kamap taim em i givim tiket bilong balus na ol pepa bilong skul i go long Wasii Manda, wanpela meri husat bai go skul long wanpela

yunivesiti long Australia.

Long hap, Mis Manda bai skul long wok bilong Helt Saiens long wok olsem Nes.

Long 1993 i kam inap long dispela yia, WHO wantaim Helt Dipatmen i bin oraitim 63 helt woka bilong go kisim moa trening na skul long dispela wok.

I gat sans bilong ol dokta, ol nes, ol helt ekstensen opisa, na ol helt inspekta long go skul na kisim moa save long wok bilong ol. Na skul bilong ol bai karamapim ol kain kain samting insait long wok bilong helt, komyuniti na famili laip.

Ol lain husat i w... m skul bai go stadi long Australia, Nu Silan, Amerika, Malesia, Ingran, Fiji na Filipin Ailan.

Seketeri bilong Helt, Dokta Issac Ake i bin givim bikpela tok tenkyu i go long WHO long dispela luksave na helpim bilong ol.

# Napo amamas long sapot bilong pipel

### ARI GUH DANDEE i raitim

**SAMSON** Napo, nesenel memba bilong Bulolo i givim bikpela tok amamas i go long ol pipel bilong em bihain long em i go lukluk raun long Australia.

Mista Napo i tok em i gat bikpela amamas tru long ol pipel bilong em i givim em olgeta sapot long las yia.

Em i tok long olgeta projek long ilektret bilong em long las yia, Kombiak rot projek i bin wanpela bikpela na gutpela projek. Bikos klostu nau bai olgeta wok i pinis. Na rot bai redi bilong ol pipel long yusim.

Narapela tupela bikpela projek

bilong las yia klostu bai stat nau em namba 8 fut bris kos bilong en em inap long K40,000 na Buang komyuniti haus em i kos inap long K10,000.

Em i tok olgeta plen bilong dispela tupela projek i redi pinis. Na klostu nau bai ol kontrakta kampani i statim wok bilong ol.

Wanpela kampani long Lae ol i kolim Kum Gie Konstraksen bai go pas long wokim dispela namba 8 fut bris long Bulolo sab distrik. Wok bai stat long tupela wik taim.


Napo i givim tok amamas bilong em i go tu long Monzup kampani long wokim na pinisim Kombiak rot.

# SAPODERM

MEDICATED SOAP

## Bilong gutpela na helti skin waswas olgeta taim wantaim Sapoderm

Dispela sop igat marasin bilong klinim gut skin na kilim ol jem bilong kamapim sik long skin



# Ol boskru na ensinia bilong Luteran Siping wokim pasin pamuk

Dia Edita,

Mi wanpela memba bilong Luteran sios na mi stap long Mosbi. Mi laik autim tingting bilong mi long ol hetman, pasta na ol bos bilong Luteran sios. Tu long ol Luteran manmeri insait long Momase rijon na long Niugini Allan we ol sip bilong Luteran Siping i save ron long en.

Nau het opis long Ampo long Lae wantaim ol Kristen manmeri mas lukluk gut. Bikos planti wokman bilong Luship i mekim wok wantaim bikpela

pasin pamuk.

Mi ron pinis planti taim long sip bilong Luteran Siping i go olsem long not Morobe, Buki, Monemba, Wasu, Madang na Wewak.

Mi lukim long ai bilong mi stret olsem ol boskru na ensinia i save paulim ol yangpela na marit meri na lokim ol long rum bilong ol na karim ol raun long sip.

Orait long wanpela raun bilong sip, mipela i go daun long Wasu. Man, kain kain meri i putap tru long rum bilong ol boskru. Na

mipela i paul tru long dispela samting. Wanpela long ol meri i kisim solap long pes bilong em long Wasu bris. Mipela manmeri long bris long dispela taim i semim stret ol dispela meri.

Mipela i laikim gutpela Kristen man i ronim Luteran Siping. Na taim em i wok, buk Baibel i mas stap wantaim em. Tok bilong Bikman antap i kalapim lo bilong sios. I moa gut long senisim bosman na kisim nupela man. Luteran Sios i gat planti save-man husat i stap nat-

ing.

Mi autim hevi bikos long bodi bilong sip, nem LUTERAN i sanap wantaim sain bilong Luteran sios. Yumi no ken bilasim nem Luteran nating long pablik ples. Ol narapela gutpela Kristen manmeri bilong ol arapela sios i save ron tu long Luteran Siping. Yumi mas soim gutpela pasin bilong Luteran Sios. Na tu soim rispek long ol man bilong ol arapela sios husat i ran tu long sip.

Mathias Moteng  
MOSBI

# Wes Sepik primia no ronim gut provins

Dia Edita,

Plis givim mi liklik spes long *Wantok Niuspepa* long autim wari bilong mi.

Long lukluk bilong mi na bilong planti ol arapela lain insait long Vanimo taun, mipela i no amamas long primia bilong Wes Sepik, Pien Aloitch. Mipela i bilip olsem em i no ronim gut provins long dispela taim. Planti samting bilong provinsal

administresen, Kapitel Woks na ol bikpela wok i bagarap.

Mipela ol pipel bilong Vanimo distrik i luksave olsem Mista Aloitch i no gutpela man long holim wok olsem primia.

Nau mi laik mekim tripela askim i go long Mista Aloitch. Namba wan: Watpo yu no stretim kampani bilong David Risosis we i stap wok nau long provins? Namba tu: Watpo na

yu laik rausim bos bilong Sandaun Yuni- vesiti? Laspela askim bilong mi i go long pablik na primia. Mi laik save olsem inap bikman olsem Mista Aloitch i baim wanpela 25 sita bas na wokim bisnis long en?

Mi putim kamap ol askim na wari long makim planti pipel bilong Sandaun provins.

Jackson Pori  
VANIMO

# Komplen maski . . . lukim na tokim

Dia Edita,

Mi wanpela manki Nembi Plateau insait long Sauten Hailens. Tasol nau mi stap long Rabaul.

Olgeta taim mi baim *Wantok Niuspepa* na ritim ol pas i go long edita. Mi save lukim ol man i save komplek tumas long ol meri husat i save putim longpela trausis na hai

hil su. Ol Simbu long Tiawu long Kimbe no mekim gutpela pasin

Dia Edita,

Mi laik autim wari bilong mi long ol lain lida bilong ples Matarunu insait long Bialla eria long Wes Nu Briten.

Mipela i no amamas tru long pasin ol man Simbu long Tiawu welpam projek long Bialla i wokim.

Orait, samting tru em i kamapim dai, hevi na bikpela bagarap long dispela welpam blok em paikros bilong tupela marit yet. Meri i tromoi ston long man bilong em na man i dai. Bikos man i gat sik splin.

Nau ol lain bilong man i kirap na kamapim bikpela hevi na bagarap. Ol i kukim sampela haus. Ol i bagarapim tu ol gaden kaikai, haus kakaruk na ol arapela samting moa. Ol laikim tu K20, 000 kompensesen mani wantaim tupela bikpela pik long dai bilong dispela man.

Long nau yet, ol i paitim na pretim ol lain bilong meri. Na planti long ol i nogat ples bilong slip.

Mi laikim pis komiti bilong Bialla distrik i lukluk long dispela hevi. Bikos dispela hevi i stap yet long 5-pela mun nau.

Long 1992, wankain hevi i bin kamap namel long sampela blokman bilong Mendi na wanpela kampani ol i kolim Shin.

T. Demas  
BIALLA

hil su.

Ol brata, planti taim yupela i save rait i go na ol save ritim tasol ol i no save harim tok bilong yupela na bihainim. Mi laik tokim yupela olsem no ken westim taim bilong yupela nating long rait i go na komplek olgeta taim.

Sopos yupela lukim wanpela meri putim longpela trausis na

wokabaut long ai bilong yupela, orait tokim em stret na em bai sem na i no nap mekim kain pasin olsem gen.

Ol wokman *Wantok Niuspepa* tu no ken printim kain ol pas olsem. Nogut yupela pasim spes bilong prinim ol narapela gutpela pas.

Max Makip  
RABAU

# Sande i no holi

Dia Edita,

Mi bekim pas bilong bJunior Pilake i bin kamap long *Wantok Niuspepa* namba 1022. Het tok bilong pas ya em "Stapim Maket long Sande."

Brata, mi no wanbel long dispela tok yu mekim long Sande olsem em i de holi bilong olgeta man. I no bilong yumi olgeta.

Mi tokim yu olsem Sande em i de holi bilong man. Na i no bilong God. Atng yu no save olsem man i senisim dispela de tru bilong God long Sarere na putim i go long Sande.

Wanpela bikman bilong Katolik sios Pop Pius i bin kamapim dispela senis ya. Sopos yu ritim gut histori bilong sios, yu bai inap save. Narapela samting tu brata yu inap lukim long Eksodos 20: 8: Em long namba 4 lo i tok long Sabat de. Na wanem dispela de tru; Sarere o Sande?

Long klaim tingting bilong yu, lukim Ista o Paska. Long Gut Fraide, Jisas i dai. Long Sarere em i stap long matmat. Na long Sande em i kirap bek long matmat. Lukim long Luke 23:54-56.


Wanem long ol tripela de em holi de? Mi tokim yu stret Sarere. Lotu long Sarere na malolo long olgeta wok long Sarere. Bilong senisim lo, ritim Daniel 7:25.

Brata Pilake, mi no lukim wanpela hap long buk Baibel i tok long Sande i de bilong lotu. Na tu em i holi o santu de. Lukim Matyu 15:9 i tok long no ken lotu long komanem o lo bilong man.

Mi salensim Pilake na ol arapela brata na susa husat i save lotu long Sande i ritim dispela pas bilong mi. Ritim gut Baibel bilong yu stat long Genesis i go inap long Revelesen. Bai yu klia olsem trupela de bilong lotu em long Sarere. Kipim dispela de holi. Na yu ken maket o mekim ol narapela wok bilong yu long Sande.

Taim yumi olgeta pikinini bilong God i gat wanpela tingting, bilip na lotuim God bilong yumi long trupela de bilong em, em bai sotim taim na salim pikinini bilong em Jisas i kam bek long kisim yumi.

Kenny Sindum  
WEWAK



# Ol meri ken bargarapim skul eksam

Dia Edita

Mi wanpela olpela sumatin bilong Pausa haiskul long Enga provins na nau mi stap long Kwinslen. Mi laik tokaut long olgeta yangpela sumatin olsem mi yet.

Taim mi stap long haiskul na mi wekim gret 7, 8 na 9, mi bin wanpela save manki stret na mi save kisim prais olgeta taim.

Tasol long wankain taim, mi save mekim pren wantaim planti ol gutpela skul meri. Mi save laikim ol na ol i save givim mi mani. Long apinun nabaut, mipela save kiss i go kam insait long klasrum.

Na long las yia, 1993, taim mi bin mekim gret 10 na bai mi mekim bikpela eksem bilong mi, mi no bin sindaun gut na wokim eksam bilong mi. Bilong wanem bikpela tingting bilong mi i pas long ol gelpren bilong mi.

Olsem na ol brata bilong mi, yumi mas no ken mekim pren wantaim ol yangpela pipia meri taim yumi stap long skul.

Em tasol liklik tingting bilong mi long yupela ol sumatin.

Derrick Reuben  
Australia.

# Ol wera manmeri save klinim Rabualtaun

Dia Edita,

Mi wanpela mangi long Nembi Plateau long sauten Hailans. Tasol nau mi stap long Rabaul.

Mi no amamas long provinsal gavman bilong Is Nu Briten i mekim long rausim ol skwata setelmen arere long Rabaul taun.

Gavman bilong Primia Sinai Brown i ting olsem dispela i wanpela gutpela we bilong daunim hevi bilong lo na oda long provins. Tasol dispela bai kamapim moa hevi.

Mi laik tok olsem ol wera man i stap na taun bilong yupela i klin na stap gutpela.

Mi laik askim wanpela kwesten. Ol asples

manmeri i nap karim baket na holim ol brum olsem ol wera man i save mekim? Long lukluk bilong mi yet, ol Tolai i no nap mekim dispela kain wok. Ol weira manmeri husat i save mekim dispela wok i save slip long wanem hap na mekim ol dispela wok?

Ol i save slip long ol skwata setelmen na mekim dispela wok. Mi laik askim Primia Sinai Brown long yusim het bilong em na stretim sindaun bilong ol lain bilong mekim kain ol doti wok olsem pastaim na bihain yusim fos long rausim ol skwata setelmen.

Max Makip  
RABAU

# Em laik bilong ENB provinsal gavman

Dia Edita

Mi laik bekim pas bilong brata Lus Kire i bin kamap long *Wantok Niuspepa* long Februari 3, 1994. Brata Jeffrey i bin tok tok long Is Niu Briten provinsal gavman i laik

brukim yuniti bilong Papua Niugini.

Brata mi laik tokim yu olsem em laik bilong E.N.B provinsal gavman.

Richy Koi  
WEWAK

# Wau-Bulolo rot nogut gutpela PMV bas sevis

Dia Edita,

Nau Wau-Bulolo rot i kamap gutpela bikos ol i putim kolta pinis long en.

Wanpela samting dispela rot i nogat gutpela PMV bas i ron long en.

Gavman i tromoi bikpela mani long dispela rot. Orait, ol man bilong dispela eria i mas strong nau long ronim PMV bas bisnis.

Wau-Bulolo eria em i ples bilong gol. Na planti man i wok long dispela hap. Orait, planti taim ol i save raun i go long Lae siti.

Ol save kalap long ol PMV ka. Ol PMV ka i no gutpela tumas. Ka i save seksek tumas na ol pasindia i save pilim pen.

Mi laik strongim tingting bilong ol man long Wau-Bulolo eria long baim ol PMV bas na ronim long dispela rot. Pe bilong ol PMV ka i go antap stret tu ya. Olsem long K5 na K6.

Husat i sapotim tingting bilong mi, rait i kam tasol long *Wantok Niuspepa*. Na mi ken lukim.

Jeneto Awamu  
LAE

# Memba bilong Daulo wansait stret

Dia Edita

Komplen bilong mi i go long nesnel memba bilong Daulo long Isten Hailans provins Sowa Gunia. Mi komplek bikos em i no stretim gut ol wok long Watabung. Na em i wok long mekim wok yet long Lowa na Apa Asaro.

Long las nesnel ileksen, ol pipel bilong Watabung i givim 101,000 vot i go long Mista Gunia. Tasol em i lusim tingting pinis long ol. Na tu em i lusim tingting long ol ileksen kodineta bilong em. Em i no baim ol yet long mekim ileksen wok bilong em.

Mista Gunia, dispela lain tasol i bin mekim ileksen wok bilong yu na yu win long ileksen. Tasol nau yu lusim tingting long ol.

Long taim bilong kempen long ileksen, memba i kra i long kisim pawa. Nau em i kisim pawa pinis na em i lusim tingting long ol pipel bilong Watabung na ol ileksen kodineta bilong em.

Ol samting memba i wokim long wokim long Asaro em: (1) wokim wanpela dabol klasrum long Maidu skul, (2) wokim wanpela haus lotu bilong Luteran sios long Maidu, (3) baim wanpela ka na givim i go long Asaro kaunsil, (4) baim wanpela ambulens na givim i go long Asaro, (5) wokim wanpela viles kot na etpos long Asaro, (6) Wokim Daulo haiskul long Asaro na (7) baim wanpela ka na givim i go long ol pipel bilong Korepa.

Mista Gunia, ol pipel bilong Watabung i bin votim yu tu o nogat? Sopos yes, orait watpo na mipela i no lukim wanpela sevis yu givim long mipela? Yu makim tasol ol pipel bilong yu long Asaro na stap olsem wanpela memba o yu stao olsem memba bilong Daulo. Maski long wansait tumas. Traim na helpim olgeta pipel insait long ilektoret bilong yu.

Watabung Pipel  
GOROKA

## Nogat man tokim yu long kamap plantesen woka

**Dia Edita**  
Mi laik bekim pas bilong Tony Hara bilong Rabaul. Pas bilong em i bin kamap long Wantok Niuspepa long Jenueri 27 long dispela yia.

Mi wanpela long ol hevi Tony i bin autim long pas bilong em. Na tu mi gat bikpela sori long ol leba husat i wok long ol plantesen long olgeta hap bilong kantri.

Tasol mi askim yu long luksave olsem em i laik bilong yu yet na yu lusim gutpela ples bilong yu. Na i go wok long wanpela plantesen long arapela ples o provins insait long kantri.

Brata, i nogat wanpela man i askim o tokim yu long go long arapela provins na kamap olsem

### No ken strongim kona nating

**Dia Edita**  
Mi wanpela manki Sepik. Tasol long nau yet, mi stap long Kerevat insait long Is Nu Briten provins.

wanpela yia pinis. Dispela i soim ples klia stret olsem ol man long Hailans i save strong nating tru long

ol meri olsem meri tru bilong ol. Dispela i soim olsem yupela i save gat laik long ol meri long nambis.

Tasol i no save laikim yupela. Olsem na yupela i mas yusim strong bilong yupela long kisim ol meri long nambis. Ples bilong yupela i nogat meri na yupela i save mekim olsem. Wankain samting i bin kamap tu long Kimbe.

Plis tru traim na yupela i lusim dispela kain pasin bilong strongim nating kona.

Yu no wanpela dok man. Yu pikinini bilong man ya. Sopotim meri bilong yu tru orait yu ken strongim kona bilong yu.

**Hems Sallias RABAU**

Mi laik autim wanpela bel hevi bilong mi long wanpela samting em mi lukim na i no stret long ai bilong mi. Mi bilip ol arapela man-meri tu bai sapotim mi.

Yes, mi bin lukim long ai bilong mi wanpela Hailans man i strong nating long wanpela meri Tolai olsem meri bilong em. Dispela man Hailans i bin strong tru na tok olsem dispela meri Tolai em i meri bilong em. Dispela samting mi toktok long en i bin kamap long Lakunai.

Dispela meri Tolai ya i no meri bilong dispela man Hailans. Man ya i bin strong nating tru na tok olsem meri Tolai ya i meri bilong em. Bikos tupela i bin marit na stap wantaim long

wanpela animol ol i kolim donki. Yu inap long stap long ples bilong yu na yusim bus graun bilong yu long mekim wok.

Gutpela brata bilong mi, Tari em i wanpela ples i gat gutpela graun long kamapim kain kain wok bisnis. Na bilip olsem sopotim yu go bek long ples bilong yu, mi ken tokim yu stret olsem yu bai wok long laik na taim bilong yu yet. Na dispela pipia K30 o K40 yu wok long kisim nau bai samting nating. Sopotim yu les long ples bilong yu, orait maski long komplek, stap isi tasol na wok olsem wanpela plantesen woka.

**Aro Wabu Tiki LAE**

### Minj plis prosekuta save helpim ol trabelman

**Dia Edita**  
Mi wanpela manki asples Minj. Mi laik autim komplek bilong mi. Mi laikim olsem OIC bilong Plis Prosekuta long Westen Hailans provins na tu Dairekta bilong Prosekusen Seksen long Plis hetkwata long Mosbi i mas skelim dispela komplek bilong mi.

Komplek bilong mi i olsem wanpela sinia opisa em husat i wok long Minj plis stesen na kot haus i no save mekim gut wok bilong em. Planti taim em i save giamanim ol majistret. Na rausim kot bilong ol trabelman.

Em i save tokim kot olsem ol witness man-meri i no kamap long kot long givim witness toktok bilong ol. Em nau majistret i save rausim ol trabel man-meri i go long ples.

Dispela prosekuta i no save tok klia gut long ol witness o pipel husat i putim komplek

long wanem taim na de kot bilong ol bai kamap. Oli save paul nabaut i stap na man ya i save go insait long kot haus. Na giamanim majistret na tokim em olsem ol lain bilong givim evidens i no kamap long kot. Em nau majistret i save rausim kot bilong ol trabel man-meri.

Mi luksave olsem ol trabelman i save grisim man ya long bia na mani na em i save helpim ol. Wanpela taim mi lukim long ai bilong mi dispela man ya i laik mekim pasin nogut long susa bilong wanpela trabel i stap long rumgat. Em nau man ya i go na rausim brata bilong dispela meri long rumgat. Tasol wanpela plisman i lukim na tokim dispela man ya olsem em i nogat rait long rausim wanpela man long rumgat.

**Wagi Ngai Kes Minj, HAGEN**

## Rausim ol pipel bilong ol arapela provins long Vanimo

**Dia Edita**  
Mi wanpela pikinini bilong Sandaun provins. Long nau yet, mi stap long Vanimo taun.

Mi yet, mi no amamas tumas long lukim dispela lain i mekim dispela samting. Oli mas sem long dispela pasin ol i wok long mekim. Bikos em i no ples na graun bilong ol.

Mi raun long Wewak Madang, Lae na tu long ol Hailans provins pinis. Taim mi raun long ol dispela provins, mi no lukim wanpela man o meri long Sandaun provins i ranim

kain ol bisnis wok olsem tred stua, PMV na bas sevis. Bikos ol pipel bilong Sandaun i luksave olsem sopotim ol kirapim dispela kain ol bisnis wok, ol asples pipel bai kros na bagarapim bisnis bilong ol. Sopotim nogat ol bai rausim ol long graun bilong ol.

Mi askim nau ol provinsal na nesenel lida bilong Sandaun provins long luksave

long dispela samting. Mi laik olsem ol lida bilong Sandaun provins i mas toktok na rausim ol pipel bilong ol arapela provins em ol i stap long Sandaun provins. Wankain long wanem samting Is Nu Briten provinsal gavman i mekim nau long Rabaul.

**Adolf Paritel VANIMO**

## Woda plisman mekim pasin nogut long ol kalabus man

**Dia Edita**  
Mi wanpela kalabus man long Kerevat haus kalabus long Rabaul. Mi laik autim wanpela wari bilong mi.

sampela liklik manki em ol i kalabus na stap i go long bus. Na dispela woda plisman ya i save askim ol long wokim pasin nogut. Sampela taim em i save askim ol kalabus man long mekim pasin nogut long em. Na bihain em bai mekim nabaut long ol dispela kalabus man.

Mi ken tok stret olsem dispela pasin i kamap planti taim pias. Tasol nogat wanpela opisa i mekim wanpela sam-

ing long stretim dispela hevi.

Wanpela taim dispela woda ya i kisim wanpela kalabus man i go ong bus. Na em i wok long stori long ol muvi nogut. Bihain nau em i askim dispela kalabus man sopotim em (woda ya) i ken mekim pasin nogut long em (kalabus man). Tasol kalabus man ya i tok nogat.

Long dispela taim, dispela woda ya i tokim dispela kalabus man ya olsem em i mekim pasin nogut long 5-pela

arapela kalabus man pinis. Long nau yet, dispela woda ya i wok long mekim yet dispela pasin nogut long ol kalabus man.

Olsem na mi askim nau ol bikbos long hetkwata long Mosbi i mas mekim wanpela samting long stretim dispela hevi. Bikos mipela ol kalabus man i no meri na dispela woda bai mekim pasin nogut long mipela.

**Kalabus Man Kerevat, RABAU**

## Mi painim famili bilong brata bilong mi

**Dia Edita**  
Nem bilong mi em Daniel Weno Pausu. Mi bilong ples Piaku insait long Lumi distrik long Wes Sepik provins. Tasol nau mi stap long Wewak, Is Sepik provins.

Mi raitim dispela pas long painim ol pikinini bilong brata bilong mi. Brata bilong mi ya em wanpela plisman tasol em i dai pinis. Nem bilong brata bilong mi em Yoma.

Brata bilong mi i bin lusim ples taim mi stap liklik manki yet. Em i go long Lae na kamap wanpela plisman. Em i wok i stap i go na maritim wanpela meri long

ples Sialum long hap bilong Finsafen long Morobe provins. Brata ya wantaim meri bilong em i gat ol pikinini.

Em i wok i go na pinis long wok olsem wanpela plisman. Orait taim em wantaim famili bilong em i laik kam long ples, em i dai long Wewak. Na ol i planim bodi bilong em. Orait famili bilong em i no kam long ples. Oli go bek long ples bilong meri bilong em long Sialum.

Olsem na mi raitim dispela pas long painim meri na ol pikinini bilong brata bilong mi. Mi bilip olsem ol pikinini bilong

brata bilong mi i mas bikpela pinis. Na sampela Tmas pinisim skul pinis na wok.

Sopotim yu husat man o meri i save long brata bilong mi o save long famili bilong em, plis inap yu tokim ol olsem mi wok long painim ol. Sopotim nogat orait tokim ol long raitim pas long mi. Adres bilong mi em: Daniel Wendo Pausu, P O Box 176, Wewak, Is Sepik Provins.

Bikpela Papa God i ken blesim yu husat brata o susa i helpim mi long painim famili bilong brata bilong mi.

**Daniel Wendo Pausu WEWAK**

## Projek fi bilong komyuniti skul antap tumas

**Dia Edita,**

Mi laik autim wari bilong mi long toktok bilong fri edukesen insait long kantri. Em i olsem wanem? Em bilong ol haikul sumatin tasol? Na i no karamapim tu ol komyuniti skul sumatin?

Sopotim samting ya i karamapim tu ol komyuniti skul, watpo tru ol pikinini i baim prosek fi em i winim K10 na go antap. Sopotim olsem, fri edukesen i no bilong ol komyuniti skul. Long wanem bipo long fri edukesen polisi i kamap, skul fi i

wankain olsem prosek fi tasol. Na i bin stap namel long k7 na K20.

Long tingting bilong mi, i gutpela long prosek fi i stap aninit long K10. Fri edukesen sistem em i bilong husat i laik kisim save.

**John Di MT HAGEN**

## Em i moa gutpela long stap long ples

**Dia Edita**  
Mi wanpela manki Tolai na mi stap long Mosbi siti. Mi sapotim Is Nu Briten provinsal gavman long rausim ol skwata setelmen long Rabaul taun.

Mi stap long Mosbi na mi lukim long ai bilong mi stret olsem ol dispela lain i save pulim bek, pik poket na stil nabaut.

Mi laikim yupela ol lain i mekim skwata setelmen long ol taun

na yupela i no wok mas tingting gut na go bek long ples bilong yupela. Yupela mas go bek long ples bilong yupela na wok long graun bilong yupela yet. Sopotim yu stap long taun i go na yu lapun, i no gutpela long yu sindaun long strit na askim long mani. Dispela ating bai kamap long Rabaul taun tu sopotim gavman i no rausim ol skwata setelmen.

Sopotim yu stap long ples na wok long graun bilong yu yet, yu no nap sot long mani taim yu lapun. Oli wantok bilong yu bai lukautim yu.

Em tasol liklik toktok bilong mi. Sopotim yu husat i laik sapotim o egensim mi, rait i kam tasol long Wantok Niuspepa na bai mi ken lukim.

**Emmanuel Kei MOSBI**

## No ken kamap olsem haibiskes plawa

**Dia Edita**  
Mi laik bekim pas bilong Maria Alois bilong Kimbe. Pas bilong susa ya i bin kamap long Wantok Niuspepa long Jenueri 20 long dispela yia.

Olgeta toktok long pas bilong Maria i gutpela. Na mi amamas long ol dispela toktok.

Tasol wanpela hap toktok em i tok olsem em i mekim long tingting bilong em na em i long long. Dispela em i gutpela sopotim yu skul long Baibel. Mi ting bai yu stadi long laip bilong Apostel Paul. God i kisim em olsem wanem? Apostel Paul i no skul olsem ol arapela 11-pela disaipel bilong Jisas Krais.

Long mi yet, mi ken tokim yu stret olsem mi no bin go long wanpela Baibel skul. Tasol God i kisim mi long pasin bilong em yet.

Susa, yu bin toktok tu long olpela bel. Dispela mi bai tokim yu stret olsem God wanpela

tasol i save long bel bilong mi. Bikos mi haus holi bilong em stret.

Yu bin toktok tu long Baibel ves ya Apostel 16: 31. Mi bilip olsem dispela em testimoni oilong yu yet. Bipo yu bin lus tasol nau yu kam insait long banis bilong God. Bikpela tenkyu long Papa God i kisim yu bek.

Toksava bilong mi long yu susa Maria: Yu no ken kamap olsem wanpela plawa nem bilong en haibiskes. Long moning ol plawa bai kamap na stap. Tasol long nait ol plawa i save pundaun.

Baibel i tok olsem Jisas i krungutim het bilong snek. Tasol olsem wanem ong tel bilong snek? Yu mas luksave olsem pawa i stap long tel. Nogut yumi pundaun long sin.

Yu poinim wanpela

pinga long mi. Tasol olsem wanem long tripela pinga i go bek long yu? Nogut dispela tripela pinga bai kotim yu. Tenkyu. Mi strongim bilip bilong yu.

Olsem na gutpela susa bilong mi, nem bilong yu Maria em i wanpela gutpela na holi nem. Yumi no ken sasim yumi yet. Dispela wok em i bilong Bikpela Jisas Krais tasol. Tenkyu tru na Bikpela Papa God i ken blesim yu.

**Nidac Manaring RAMU**



# PABLIK NOTIS

## PNG FORES INDASTRI ASOSIESEN (F.I.A) I BEKIM TOKTOK BILONG OL NGO OLSEM FIA I NO BOSIM TINGTING BILONG GAVMAN.

*Insait long Times of PNG niuspepa, Februeri 10, 1994, long pes 26, tripela non gavman oganaisesen (NGO) i putimaut wanpela tok save. Na dispela tok save i traim long bagarapim tingting bilong ol investa insait long PNG fores industri we i bin mekim kain kain toktok bilong hatim bel na ol toktok bilong ol i wok long sut i go long wan wan kampani tasol.*

*F.I.A i pilim olsem em i mas sanap pas long holim tingting bilong industri. Mipela i no inap tok orait long ol lain husat i tok baksait long ol tingting bilong mipela na long wok bilong mipela long givim tingting long ol lain bilong gavman.*

*Ol toktok em ol NGO i bin mekim i traim long mekim ol dispela toktok i kamap bikpela gen. Long givim bekim bilong mipela i go long ol toktok em ol NGO i givim long niuspepa, mipela i laik tokaut olsem:*

1. F.I.A i bilip long demokratik gavman bilong Papua Niugini na i no inap mekim toktok olsem (ol NGO i tok) gavman i no inap long ranim kantri.
2. F.I.A i no inap tru long mekim wanpela toktok olsem praim ministra o gavman bilong em i no inap long mekim ol toktok i kamap stret bilong ol pipel bilong kantri.
3. F.I.A i bilip na i bihainim olgeta as tingting bilong mama lo bilong kantri na tu i bilip long nem bilong kantri, Papua Niugini.
4. Mipela i bilip olsem ol pipel bilong Papua Niugini i gat rait bilong toktok long wanem i gat planti kampani i wok wantaim ol pipel insait long kantri. Ol NGO husat i mekim ol dispela toktok i mas save olsem mipela PNG yet i kisim ol timba kampani i kam insait long kantri. Dispela i bihainim tingting bilong ol papa graun long developim ol fores risos bilong ol.
5. F.I.A i no wanpela politikel oganaisesen. F.I.A i rejista long kantri long makim ol timba kampani husat i laik wok insait long PNG timba industri. Mipela i no tok olsem gavman i no gat pawa long ranim kantri. Na sapos mipela i mekim dispela kain toktok, em mipela i bagarapim nating nem bilong gavman. Mipela bai i no inap mekim dispela toktok.
6. F.I.A i mekim wok bilong em long tokaut long wanem ol hap bilong nupela National Forestry Guidelines i no gutpela. I no gat wanpela samting i rong long dispela. Bilong wanem ol NGO i save mekim dispela kain wok tu long sampela taim.
7. Dispela tok save ol NGO i putim i traim long bagarapim nating nem bilong mipela. Long wanem ol i bin kisim ol mak bilong mani i kamap long timba long mun Oktoba 1993 na makim wantaim mani em ol papa bilong graun i kisim. Dispela samting ol i kamapim i no stretpela. Na dispela i soim olsem ol i no save gut long dispela samting na wok bisnis tu. Mani em ol kampani i kisim i bihainim ol dispela samting:

- mani ol papa bilong graun em gavman yet i save lukautim;
- ol takis bilong salim ol diwai i go long ovasis em kastoms i save kisim;
- ol primium mani ol kampani i baim i save go stret ol kampani bilong ol papa bilong graun;
- i gat ol narapela wok bai ol i kamapim long bringim ol samting na sevis i go long ol pipel taim kampani i salim ol diwai na tu stretim ol narapela samting we i bagarap;
- i save go long kos bilong ol samting bilong wok bilong katim diwai;
- ol "penalty freight" nau i save kamap insait long timba Bisnis.
- takis i save go antap long ol man i nogat wok.

Olgeta bisnisman i save olsem wanem winmani i kamap long wok bisnis i mas mak wantaim hamas mani yu putim i go insait long dispela wok bisnis. Na tu hamas mani yu putim olsem mani bilong was sapos wanpela bagarap i kamap. Sapos ol pipel i save long dispela, ating ol dispela kain rabis toktok bai pinis.

8. Long olgeta toktok bilong mipela long ol niuspepa, mipela i no save bagarapim ol narapela lain olgeta. Mipela i bilip olsem long bihain taim, olgeta toktok bilong ol narapela long mipela bihainim dispela polisi bai kamap gut na i no wansait.

9. Long tok save bilong ol NGO, ol i lus tingting long tokaut olsem samting olsem K5-6 milien i go long ol ol papa graun. Na tu wankain mani i go long takis bilong gavman long taim kampani i salim diwai, i kamap olsem K5-K6 milien.

10. Ol NGO tu i no tokaut olsem i gat samting olsem 10,000 wokman na meri husat i wok long timba industri na tu i gat 100,000 pipel em bus bilong ol kampani i katim diwai wantaim ol pikinini bilong ol. Na dispela ol lain i save kisim strong long sindaun gut long wanem timba industri i stap.



Authorised by J. Belford, Secretary F.I.A.

# F.I.A.

FOREST INDUSTRIES ASSOCIATION  
P.O. BOX 4037, BOROKO, N.C.D. PHONE: 25 9458



# Ol meri soim pawa bilong ol long Pari

VERONICA HATUTASI i raitim

SAMTING olsem 150 wimens lida i bung nau long ples Pari klostu tasol long Mosbi siti.

Ol i kam long olgeta provins bilong kantri long toktok long ol wok kamap na ol wok projek long sait bilong ol meri insait long dispela yia.

Nesanel Kaunsil bilong ol Meri (NCW) i go pas long dispela bung. Bosmeri bilong NCW, Josephine Abaijah i tok grup bilong em i kisim dispela bung i

go long ples long soim ol meri na ol arapela lain olsem ol i tingting long helpim olgeta meri long kantri. Maski ol i stap long ples kanaka o taun.

Wanpela long ol bikpela samting bai kamap long dispela bung em long ol i makim wanpela meri lida husat bai i sanap makim ol long Nesanel Palamen. Bikos long nau i nogat meri lida long Palamen long makim ol.

Ol bai toktok tu long wok bilong NCW. Bikos planti meri long ol provins i no klia gut wanem wok tru NCW i wokim. Sampela i no save long NCW i sanap olsem maus bilong olgeta meri long kantri.

Tude ol meri bai i makim wanpela meri i sanap makim ol long Palamen. Deim Abaijah i tok ol bin gat inap taim long makim wanpela meri long rijon bilong ol i sanap resis long dispela wok. Deim Abaijah i no bin givim aut nem bilong ol kendidet bikos em tu i

no save husat stret ol meri i makim bilong sanap long dispela resis.

Em i tok tu olsem wanem meri ol i makim mas save long wok bilong em. Na em i mas makim wok bilong ol meri long komyunit, ples na kantri.

Long nau tu Nahau

Rooney i wok long stretim ol pepa bilong makim sia na wok em dispela meri ol i makim bai mekim.

Gavman i bin putim K2.5 milien long Rurel Dvelopmen Beng bilong helpim ol meri, ol yut, ol sios na ol NGO grup long ol wok projek. Ol grup inap kisim

dinau mani bilong go hetim ol wok prosek bilong ol.

Planti meri i no klia wanem rot ol i mas bihainim na kisim dinau mani. Long tok klia long dispela samting sampela opisa bilong wan wan beng long Mosbi na Fainens na Plening Dipatmen i bin go long Pari na toktok long ol

meri.

Hom Afeas minista Andrew Posai i bin singautim tu ol meri long wokbung wantaim dipatmen bilong em, ol lain bilong provinsal kaunsil bilong ol meri na ol NGO. Dispela rot tasol bai helpim ol meri i go het long painim gutpela sindaun long kantri.

## Birua bilong soldia long Mosbi stap hait yet

NO GAT wanpela tok klia i kamap yet long birua em i bin kamap long las wik Sarere bikmoning long Mosbi.

Insait long dispela birua, wanpela soldia bilong Papua Niugini Difens Fos i bin dai. Ripot i tok wanpela ka i bin bamim em long samting olsem 10 minit i abrusim 3 klok long morning taim em i wokabout long Waigani Draiv.

Plis ripot i tokaut tu olsem ka we i bin bamim dispela soldiabo i no bin stop. Em i bamim pinis na karim em i go longwe tru. Na dispela soldia i bin dai stret long hap em i pundaun na slip long en.

Narapela ripot i tok tu olsem long dispela taim, i bin gat tupela meri i stap wantaim dispela man.

Tasol bihain tasol long ol plisman i toktok wantaim tupela, ol soldia bilong Mari Bareks i go na stilim dispela tupela meri long haus bilong ol. Long nau yet, no gat man i save long wanem hap tru em ol i stap long en.

Long dispela taim yet, klostu bai i gat pait i bruk tu namel long ol soldia na plisman long Taurama trefik lait. Tasol ol plisman i lukim olsem trabel

bai kamap na ol i lusim i go.

Suprintenden George Buka i bin wokim tu wanpela bel isi singaut i go long ol soldia bilong Mari Bareks long lusim dispela samting long han bilong ol plisman. Bikos ol i kisim sampela ripot pinis bilong kamapim ol wok sekap. Na samting ol i mekim bai stapim tasol dispela wok.

Long wankain taim, Mista Buka i tok em bai amamas tasol long wokbung wantaim ol soldia long dispela samting bilong painim ol trabel man.

Long ripot bilong ol plisman, ol i tok olsem dispela soldiabo husat i dai i bin stap danis long Moonlight danis haus na wokabout i go bek long Waigani taim em i bungim dispela birua.

Pastaim tasol long dispela birua i kamap, wanpela plis patrol ka i bin abrusim dispela soldiabo long rot. Na ol i tok em i bin luk amamas bikos em i wok long singsing antap stret.

Plis nau i askim olgeta man na meri husat i ting ol i gat sampela ripot bilong wokim long go lukim ol long Boroko Plis Stesin.



• Sampela memba bilong ol lain meri husat i bung long ples Pari ausait tasol long Mosbi. Ol i toktok nau long makim wanpela meri long Palamen.

## PSA baim mani bilong ol lain pablik sevan husat i dai bipo

DANIEL MONA i raitim

LONG las wik, PSA Sevings na Lon Sosaiti i bin givim sampela sek bilong ol pablik sevan husat i dai pinis.

Ol dispela pablik sevan em ol memba bilong olpela MBF medikea skim. Na mak bilong dispela olgeta mani em inap long K56,000.

Ekting Jenerel Menesa bilong fan, Ivan Gutai i bin givim ol dispela sek mani i go long Pablik Kureta, Rulf Lahui bilong salim i go long ol famili bilong ol dispela lain pablik sevan.

Ol dispela sek i bilong ol pablik sevan olsem Paul Sowni (K25,000), Robert Peniauka (K10,000 wantaim narapela K1,000 bilong stretim matmat na rot bilong bokis), Ronie Benson (K10,000) na Komara Kila (K10,000).

Long dispela taim, Mista Gutai i tokaut klia olsem dispela mani bai go stret long meri bilong ol dispela man husat i dai pinis. Na ol pikinini bilong ol tru inap kisim na yusim sampela hap bilong dispela mani.

Tasol em i no karamapim ol pikinini husat em ol i lukautim.

**MR BOSMAN  
BILONG STOA**

**1 gat  
FRI  
WRIGLEY'S  
JUICY FRUIT  
CHEWING GUM  
Moni Bag  
bilong  
yu!**

10t  
WRIGLEY'S  
ARROWMINT  
CHEWING GUM

10t  
WRIGLEY'S  
P.K.  
CHEWING GUM

10t  
WRIGLEY'S  
JUICY  
FRUIT  
CHEWING GUM

10t  
hubba bubba

10t  
tasol

5t  
BIG BOY  
CHEWING GUM

**taim yu baim  
5 PELA BOKIS long wanpela  
long dispela prodak long  
COLLINS & LEAHY o BROMLEY & MANTON  
Long Lae o Hailans brans  
Long Feb 14 - March 18 tasol!  
(6 pela Moni Bag long wanpela balk)**

# BISNIS LONG PAPUA NIUGINI

## Dipatmen kirapim nau wok didiman long ol kea senta

**VERONICA HATUTASI i raitim**

OL pipel bilong ol kea senta insait long Bogenvil i kisim pinis ol kaikai samting bilong planim long gaden, ol umben na ol pikinini kakaruk bilong lukautim.

Dipatmen bilong Ekonomik Sevises long Not Solomons i kirapim dispela program long olgeta kea senta long Bogenvil. Bikos em i laik bai ol pipel i mas senisim kain kaikai em ol i save kisim insait long ol kea senta.

Long nau yet, ol ripot i tok planti i les pinis

long kaikai tasol rais wantaim tinpis.

Provinsal Seketeri bilong Ekonomik Sevises, Patrick Koles i tok dispela program bai helpim tu ol pipel bilong ol kea senta long no ken wetim tasol ol saplai bilong gavman. Ol bai gat sans nau bilong planim na kisim kaikai bilong ol yet klostu long hap em ol i stap long en.

Mista Koles i tok dipatmen i laik kirapim tu wanpela didiman projek bilong planim rais insait long ol kea

senta. Dipatmen bai givim ol pipel masin bilong rausim pipia bilong rais na redim bilong kaikai.

Dipatmen i kisim pinis tripela kain masin olsem bilong klinim rais i kam long Dipatmen bilong Egrikalsa na Laipstok long Mosbi.

Long skruim wok didiman, Mista Koles i tok tu olsem dipatmen i givim pinis ol pikinini kabis, ol arapela sayor na rais i go long ol lain bilong ol kea senta long planim. Long wankain taim tu, ol i givim pinis samting olsem 20 umben bilong ol pipel long painim pis long ol kea senta klostu long


nambis bilong Loloho, Arawa, Wakunai na Buin.

Kos bilong dispela program em i stap namel long 5 na 6 tausen kina.

Mista Koles i skruim toktok olsem dipatmen i tingting tu long kirapim ol kakaruk projek long ol kea senta bilong ol pipel long lukautim na wok na bihain kisim mit bilong kaikai.

Mista Koles i askim tu olgeta pipel bilong Not Solomons husat i stap ausait long Bogenvil long givim helpim wantaim ol samting bilong planim long gaden. Salim bekim wantaim ol

helpim samting i go long dispela adres: **Care centre Fund, Division of North Solomons, C/- Radio North Solomons, Buka, North Solomons Province.**



*Kokonas timba...Plantl hap bilong PNG i no save olsem strong bilong diwai kokonas i moa moa yet. Na em i gutpela bilong wokim haus. Long Bipi ailan insait long Manus, ol pipel i save sapim kokonas na yusim long wokim. Tasol strong bilong em tu i winim diwai ton. Olsem long poto, yangpela Godfried Ramram wantaim kandre bilong em Steven Kupe i hatwok long sapim kokonas i stap. Poto: Felix Ramram.*

### KOPRA

Pe bilong kopra i go antap nau long K50 long wan wan tan long dispela yia. Pe bilong ol bikpela depo olsem Mosbi, Alotau, Lae, Madang, Wewak, Kavieng, Toboi, Kimbe na Kieta i stap olsem:

Smoke	K250
F.M.S	K250
Hot Air	K255

Na pe bilong kopra long ol liklik depo i stap olsem:

SAMARAI	Smoke	K218
	F.M.S	K220
	Hot Air	K203

KANDRIAN na NAMATANAI	Smoke	K215
	F.M.S	K217
	Hot Air	K220

BUKA	Smoke	K214
	F.M.S	K216
	Hot Air	K219

FINSCHHAFEN	Smoke	K210
	F.M.S	K212
	Hot Air	K215

LORENGAU	Smoke	K205
	F.M.S	K207
	Hot Air	K210

KARKAR	Smoke	K215
	F.M.S	K217
	Hot Air	K220

CMB nau bai i no inap long kisim moa prais sapot long Gavman. Dispela i stat long Janueri 1, 1994.

### KAKAO

PRAIS bilong drai kakao long wanwan tan long Rabaul long Mande inap long Fraide long las wik.

Mande	Tunde	Trinde	Fonde	Fraide
30/1	1/02	2/02	3/02	4/02

Pe ol baiya sasim long papa bilong fementri	K713	K711	K719	K719	K707
---	------	------	------	------	------

Sapot prais	K500	K585	K585	K585
-------------	------	------	------	------

Prais ol papa bilong fementri i kisim  
K1213 K1296 K1304 K1304 K1292  
Sapot prais bilong kakao long dispela mun em K628.95. Dispela prais i no wankain olsem pe bilong kakao long ol narapela hap bilong kantri.

### RABA

Gavien faktori (ESP) - 21 1/2 kg  
Doa faktori (Sentrel) - 36 1/2 kg inap long 39 1/2 kg

### KADAMON

Prais bilong kada on em A. T. Agri Agency Pty Limited long Madang i tokaut long en i stap olsem:  
Drai long san K1 40  
Hot Air Drai Yelo/Wait - K2 25  
Hot Air Drai Grin - K3 25  
Pikinini Kadamon K2 50  
Lombo gret wan K1 60  
Lombo gret tu K1 40  
Lombo gret tri K0 80  
A. T. Agri i lukautim Kobum Spice em i stap long Buni we planti ol kadamon i save kam long en.

### KOPI

Pe bilong drai arabika na robusta kopi long wanwan kilogram long Feb 7, 1994. Dispela i karamapim prais bilong kopi long dua bilong faktori, na i no long sait bilong rot.

Arabika :	
National	K120 to 150
Kainantu	K150
Goroka	K145 to 146
Kundawa	K135
Minz na Banz	K120 to 130
Wapenamanda	
Mendi	
Hagen	K120 to 133
Lae	K110 to 125
Erap	K120
Mumeng	NQ
Wau/Bulolo	K110
Madang	K110
Wasu	K120

Ol ripot i kam long Kopi Industri Kopresen. Mipela i no kisim ripot bilong Kundawa, Wapenamanda, Mendi, Erap, Aseki, na Wasu.

Robusta :	
Is Sepik	K80 to 90

Ripot bilong ol arapela senta husat i save groim robusta kopi i no kamap.

### PE BILONG AIR NIUGINI LONG PNG TASOL

KISIM LONG I GO LONG PE BILONG	BALUS	PE BILONG	KAGO
POM Alotau	K101	K101	K1.01
POM Daru	K117	K117	K1.17
POM Goroka	K114	K114	K1.14
POM Hoskins	K140	K140	K1.40
POM Kavieng	K234	K234	K2.34
POM Kundawa	K113	K113	K1.13
POM Lae	K96	K96	K0.96
POM Madang	K129	K129	K1.29
POM Manus	K206	K206	K2.06
POM Mendi	K136	K136	K1.36
POM Misima	K155	K155	K1.55
POM Mount Hagen	K132	K132	K1.32
POM Popondetta	K58	K58	K0.58
POM Rabaul	K187	K187	K1.87
POM Tabubil	K189	K189	K1.89
POM Tari	K153	K153	K1.53
POM Vanimo	K234	K234	K2.34
POM Wapenamanda	K141	K141	K1.41
POM Wewak	K180	K180	K1.80

Ol kago em hevi abrusim 16kg bai gat pe

### Exchange Rates

PNGBC		
Bank buys at:	Notes	T/T
Australia	1.5075	1.4761
USA	1.0755	1.0487
Bank sells at:		
Austria		12.43
UK		0.6930
USA		1.0387
Solomon Islands		3.3360
China		
Fiji		1.5416
Hong Kong		7.9806
India		31.904
Japan		105.42
New Zealand		1.7961
Philippines		28.139
Singapore		1.6277
Switzerland		1.5008
Germany		1.7783
Gold rates (in US\$):		
per ounce		383.88
per gramme		12.34

## Ripot tok wok bisnis gat nem nogut

**RODNEY KAMUS i raitim**

OL bisnis insait long PNG i gat sampela samting i rong long ol wok bilong ol em Nesenel Insitute of Standards na Industrial Technology (NISIT) i painimaut. Na dispela ol rong i wok long bagarapim gutpela nem bilong PNG bisnis industri long ovasis.

Dispela ol toktok i kamap long taim memba bilong Tred na Industri, David Mai i opim Nesenel Insitute bilong Standards na Industrial Technology long las wik.

Nesenel eksekutiv Dairekta bilong NISIT na namba wan Asisiten Seketeri bilong Komes na Industri i bin tokaut long dispela samting.

Gavman i luksave long ol dispela samting na kamapim pinis wanpela polisi bilong stretim ol dispela hevi long ol bisnis industri.

Dispela ol samting i rong long ol industri insait long PNG em:

- gat sampela bisnis tasol i wok long mekim wok bilong ol stret na i givim stret gutpela sevis na ol samting long ol pipel;

- i no gat ol gutpela saveman bilong lukim olsem ol samting na sevis ol pipel i kisim long ol bisnis i gutpela na i no nogut we bai giamanim ol pipel tasol;

- ol level bilong menesmen i no save lukluk gut long makim olsem olgeta samting ol i wokim i mas wankain na bihanim stret laik bilong manmeri bilong Papua Niugini;

- planti samting ol bisnis industri i save mekim i save bagarap na ol i save tromoi. Na dispela ol samting ol i save tromoi, ol i save putim prais bilong em antap long ol narapela samting. Taim ol i putim prais bilong dispela ol samting i go long ol narapela samting ol i wokim, ol kastoma i save painim taim stret long baim dispela ol samting. Bilong wanem prais i antap tru.

- ol bisnis industri i no save harim tumas wari bilong ol kastoma bilong ol; na.



• Minista bilong Komes na Industri David Mai i sindaun long namel wantaim ol bikman bilong NISIT. Dispela em long taim em i opim NISIT.

# Tras fan givim gutpela helpim long Ok Tedi/Flai Riva

## GODFRIED YASSAFAR i raitim

LONG 1990, Ok Tedi Maining kampani i statim wanpela tras fan bilong helpim ol pipel i stap long ol ples bilong tupela wara long Ok Tedi.

Tupela wara ya em Ok Tedi na Flai. Nem bilong dispela tras fan em Lowa Ok Tedi/Flai Riva Developmen Tras (LOTFRDT).

Dispela lain pipel i stap ausait long hap bilong Ok Tedi Main. Na ol i no save kisim royelti na len lis mani i kam long kampani.

Ok Tedi Maining kampani i save givim mani long wok bilong dispela tras fan.

Nesanel gavman wantaim provinsal gavman bilong Westen provins i save helpim Ok Tedi tu long ranim ol wok bilong dispela fan.

As tingting na Ok Tedi Maining kampani i kirapim dispela tras fan em long givim gutpela sevis long wok bilong sosol welfea, edukesen, spot, helt, bisnis

na tu long helpim na kirapim ol bisnis long ples. Long dispela rot, ol pipel bilong Ok Tedi na Flai Riva inap kisim sampela kain helpim i kam long kampani.

Aninit long dispela tras fan, Ok Tedi Maining kampani i save givim helpim i go long ol pipel bilong 101 ples long Lowa Ok Tedi na Flai Riva. Long las tripela yia i go pinis (1990-93), kampani i bin yusim samting olsem K7.9 milien bilong kirapim ol komyuniti infrastraksa projek na ol liklik bisnis insait long ol dispela ples. Long olgeta projek, helt na edukesen i stap namba wan long lista bilong dispela tras fan.

Namel long 1990 na 1992 aninit long dispela tras fan, kampani i bin kirapim 529 projek bilong ples. Sampela bilong ol dispela projek em teng wara, haus win, komyuniti hol, klab bilong ol meri, klasrum, edpos, haus maket,

haus wara bilong waswas na masin bilong samapim laplap.

Long las yia, kampani i bin kirapim 189 projek bilong ples aninit long dispela tras fan.

Aninit long dispela tras fan, kampani i helpim tu ol pipel bilong ples long statim ol Viles Developmen Fan (VDF). Olsem bai ol inap kirapim ol liklik bisnis long ples.

Wan wan ples i makim ol eksekutiv long lukautim mani bilong ol dispela VDF.


Long 1992, Lowa Ok Tedi/Flai Riva Developmen Tras i baim K497,750 i go insait long ol dispela VDF.

Stat long 1990 i kam inap long las yia, kampani i baim mani inap long K1.4 milien i go long ol VDF.

Stat long 1990 i kam inap long las yia, mak bilong mani Ok Tedi Maining kampani i yusim long wan wan yia long dispela tras fan em: 1990-K2.5 milien, 1991-K2.625 milien, 1992-K 2.756 milien. Na long las yia, kampani i yusim samting olsem K2.894 milien.



*Amamas long lukim helikopta....Dispela ol skul pikinini i kam bung taim wanpela helikopta i pundaun arere long skul bilong ol. Olsem na ol i kam bung na sanap i stap long husat tru bai lusim helikopta na i go ausait. Ol i ting olsem ol bai lukim sampela lain bilong ol. Tasol tingting bilong ol i popaia na ol i lukim tripela waitman na tupela blakskin man i kam ausait long helikopta. Dispela em long wanpela ples long Lowa Ok Tedi Riva long Westen provins ol i kolim Komokim. Ripota Godfried Yassafar i kisim dispela poto taim em i raun wantaim wanpela redio niusman bilong kantri Jemeni.*



*Sepik basket i stap tu long Tabubil....No ken ting olsem i nogat Sepik basket long Tabubil. I gat Sepik basket i stap tu long Tabubil. Sopus yu go raun long Tabubil na yu go insait long liklik stua bilong YWCA bai yu lukim ol i salim ol Sepik basket i stap. Tasol sopus yu laik baim wanpela, em bai kosim yu bikpela mani tru ya. Poto: Godfried Yassafar.*

## Rais projek bilong Ramu kisim sapot bilong Japan

GAVMAN bilong Japan i tokaut pinis long sapotim wok bilong Korosi Rais Developmen Projek long ples Sanai insait long Ramu distrik bilong Madang provins.

Dispela projek i bin stat long 1989 na nau i gat samting olsem 296 fama i stap insait long wok bilong planim rais.

Tok orait bilong dispela i bin kamap long Februari 7, 1994 namel long mausman bilong gavman bilong Japan long Papua Niugini; Tadashi Masui na Asisten Seketeri bilong Egrikalsa na Laipstok long Madang, Lawrence Daur.

Kos bilong dispela projek bai go antap moa long K31,000.

Inap long planti yia nau, ol lain bilong lukautim wok didiman long Madang i bin sapotim na kirapim wok bilong planim rais long Ramu. Tasol nau dispela wok i go kamap bikpela na ol i stat planim rais tu long taim bilong san.

Olsem na taim gavman bilong Japan i lukim olsem ol i laikim moa helpim, em i tok orait long givim ol trakta, ol masin bilong planim na tromoi pikinini rais na ol speapat bilong ol masin em ol bai yusim long Korosi.

Provinsal rais kodineta bilong Madang, Felix Bau i tokaut tu olsem em i amamas tru long dispela helpim bilong Japan.

# taim bilong kirap wantaim kakaruk! na peim hap prais

**LAE K95 Mt. HAGEN K132**  
Port Moresby return Conditions apply

Narapela taim yu raun, kisim nambawan flait long moning na kisim hap pras tasol. Yu ken flai long olgeta dei long wik na "Kirap Wantaim Kakaruk" flait igo long narapela hap bilong kantri.

Long kisim ol dispela spesol tiket yu mas stap inap 7 pela dei o moa long ples tasol inoken moa long tripela ten dei.

Air Niugini igivim gutpela diskaunt long yu go na kam long ol biknem ples. Kain olosem; Long Pot Mosbi igo na kam long Madang K129 tasol, Rabaul K187, Simbu K113, Gurney K101, Popondetta K58 na Goroka-K114, tasol. Ol narapela ples i wankain tasol.

Lukim Air Niugini na bukim hap prais tiket bilong yu nau.



Offer subject to Government approval. Conditions apply

Lukim Air Niugini o narapela ples long bukim na stretim tiket.

CRAFTY, OPIK/2886/F.V.

# Tupela blut brata kilim pinis nogut

BIPO, bipo long Finschafen, i gat wanpela liklik ailan ol i kolim Tami i stap. Na tu i gat wanpela meri i stap husat gat bel na stap wantaim ol lain bilong em.

Ol i save stap gut olgeta taim. Tasol wanpela samting em ol i no save kuk long san. Ol i save kuk long nait tasol. Bikos i gat wanpela traipela pisin i save stap long hap bilong ol. Sopot ol i kuk long san na pisin ya i lukim simok bilong paia, em bai kam daun na kaikaim ol.

Olgeta taim ol i no save kaikai gut long san olsem na ol i pasim tok long ranawe i kam long bikples em ol i ken kuk na kaikai gut long san.

Olgeta man i wokim kanu bilong ol pinis na ol i laik ranawe i go long bikples. Ol i kism olgeta samting bilong ol olsem pik, dok, pusi na ol kago wantaim ol pikinini bilong ol na ol i puli go long bikples.

Taim ol i ranawe i go, ol i lus tingting long dispela meri husat i gat bel na ol i lusim em i stap. Bikos taim em i laik kalap long wanpela kanu, dispela kanu i go daun. Wokim i go no gat na em i stap bek long ailan na olgeta manmeri i go long bik-

ples.

Turangu meri ya wan i stap long ailan i go na wanpela taim em i laik go sekim gaden bilong em. Em i go long katim suga na lip bilong suga i katim han bilong em. Taim blut i ran i kam daun long han bilong em, em i dikim wanpela hul na putim ol blut ya i go insait. Em i mekim i go na hul ya i pulap. Orait em i dikim wanpela hul moa na mekim wankain samting gen. Taim tupela hul wantaim i pulap, em i karamapim na em i go bek long ples.

Em i stap tupela de pinis long ples na em i laik go sekim gaden bilong em gen. Tasol taim em i kamap long gaden, em i lukim olsem ol banana bilong em i luk olsem ol man i kaikai pinis.

Dispela ol banana ya em tupela pikinini bilong em i kaikai na i no ol man. Tupela pikinini ya i kamap long blut bilong em taim em i planim long graun. Orait mama bilong tupela pikinini ya i kism gut tingting pinis na em i karamapim em yet long lip bilong banana na sanap i stap i go inap apinun. Apinun nau na tupela manki ya i hangre na laik kam painim kaikai.

Tupela i kam ausait na



taim tupela i lukim mama bilong tupela i sanap i stap, tupela i ting wanpela diwai. Tupela i ran i go stret na kalap i go antap long mama bilong tupela. Mama i lukim olsem na holimpasim tupela.

Taim em i holimpasim tupela, tupela i singaut nogut tru. Tupela i singaut i go na bikpela i tokim liklik olsem tupela i mas pasim maus. Na harim tok bilong mama bilong tupela.

Em nau mama bilong tupela i tokim tupela olsem, olgeta kandre bilong tupela i ranawe i go pinis long bikples na em wanpela tasol i stap. Em i tokim

tupela olsem em wanpela tasol i stap na em i laik rausim lip bilong suga tasol lip i katim em. Na em i planim blut bilong em na tupela manki ya i kamap.

Em i toktok long tupela i go na tupela i tok orait long bihainim em i go long haus bilong em.

Ol i kam stap wantaim mama bilong tupela i go tasol ol i no save kuk na kaikai long san. Mekim olsem tasol i go na wanpela taim tupela i askim mama bilong tupela olsem wanem na ol i no save kuk na kaikai long san.

Orait mama i tokim

tupela olsem taim tupela i no kamap yet, olgeta manmeri husat i ranawe i go pinis i save stap olsem tasol na kuk long nait.

Em i tokim tupela olsem taim ol i save kuk long san, wanpela pisin nogut i save lukim smok bilong paia na kam daun kism ol manmeri i go na kaikaim ol. Olsem na ol i no save kuk long san. Mekim i go na olgeta manmeri i ranawe na lusim em tasol i stap.

Taim tupela i harim pinis, tupela i stat long wokim ol samting bilong pait olsem spia, bunara na tamiok nabaut.

Long wanpela de, tupela i tokim mama bilong tupela olsem, em i mas brumim ol pipia, kukim na em i mas go hait long bus. Mama i harim tok bilong tupela na em i bihainim tasol na go hait long bus.

I no longtaim, pisin nogut ya i lukim smok bilong pipia na i kamdaun long kilim tupela. Tasol tupela i strong nogut tru na sanap redi i stap. Taim pisin ya i laik kam daun, liklik brata i taitim bunara na sutim pisin ya i stret long kru bilong em. Bikpela brata i kism tamiok na katim nek bilong em na pisin ya i dai olgeta. Mama bilong tupela i kam na ol i stap amamas wantaim. Ol i salim tok i go long bikples na olgeta manmeri i kam na ol i stap gut wantaim gen.

Kaliu Jacob  
FINSCHAFEN



•Plis kar painim bagarap...Dispela plis kar i bin raunim wanpela PMV kar long Mosbi tasol draiva i abrus liklik long rot na kapsaltim kar long wanpela baret long Wards Strip. Photo: Anna Solomon



Kanage i save wok olsem wanpela wokboi bilong wanpela kiap. Dispela Kiap em i wanpela man bilong dring. Na em i save baim wiski na ram. Tasol em i save dring ram tasol. Wiski em i save putim logng givim long ol arapela manmeri em ol i save go long haus bilong em long lukim em. Wanpela taim kiap ya i painim olsem wanpela botol ram bilong em i stap long namel. Bikos em i save olsem em i no bin dringim dispela botol long tupela de olgeta. Em nau em i kism tingting olsem Kanage tasol i dringim sampela ram bilong em. Em nau kiap ya i tokim em yet olsem: "Wanem mi longlong bilong dispela kanaka ya. Bai mi pispis i go insait long botol na em bai dringim." taim kiap ya i pispis i go insait long botol, botol i save pulap. Bihain i save surik i go daun gen. Mekim i go na em i pilim sori long Kanage long pasin nogut em i save mekim. Wanpela taim em i tokim Kanage olsem: "Kanage, yu save wok gut tru long mi. Na mi gat bikpela amamas tru long yu. Tasol watpo na yu save hait na dringim ram bilong mi?" Kwiktai tru Kanage i bekim: "Masta, mi no save dringim ram bilong yu. Bipo mi save wok long wanpela arapela masta, em i save tokim mi long putim liklik ram i go insait long sup kaikai bilong em. Olsem na mi save wokim wankain samting long kaikai bilong yu." Kiap ya harim olsem na em i no toktok moa. Bikos em i save olsem 3em i save dringim pispis bilong em yet.

Alexander Weston  
MADANG

□ KANAGE ritim ol stori bilong wol long niuspepa na painim olsem wanpela meri bilong kantri Amerika i katim brata bilong man bilong em. Long narapela stori, wanpela meri Filipin Ailan i joinim waia long lektrik pawa na mekim save long man bilong em. Kwiktai tasol em i spit i go long haus na tokim ol poro, "Lukautim gut brata nau, bikos ol meri tu bikhet na gat rot bilong salim bikpela brata na liklik wantaim long matmat."

Saunders Soul,  
Port Moresby.

## Pikinini nogat papa givim bikpela hevi long mi

Dia Laipain,

*Mi gat 20 krismas. Na mi gat wanpela pikinini i no gat papa long en. Mama bilong mi save lukautim dispela pikinini taim mi go long wok. Dispela hevi i bikpela moa na mi no save slip o kaikai gut.*

*Las yia papa bilong mi i go paul wantaim wanpela arapela meri. Olsem na mi save spenim mani bilong mi long lukautim mama na ol arapela brata na susa bilong mi. Tasol mama bilong mi i save krosim mi.*

*Long nau yet, mi no kism sik mun bilong mi. Olsem na mi pret na ting olsem mi mas kism bel gen. Boipren bilong mi i moa yangpela long mi. Na em i no amamas long mi no kism sik mun bilong mi. Olsem na em i no amamas long dispela samting na em i laik lusim skul na go long ples. Em i les long lukim pes bilong mi gen. Tasol mi no laikim em.*

*I luk olsem olgeta samting bai kamap hat tru long mi. Olsem na mi pilim olsem mi mas kilim mi yet. Sopo nogat orait mi mas kilim dispela pikinini i stap long bel bilong mi.*

TWICE UNWANTED

Dia Pren,

Laipain i save kism planti pas long ol yangpela meri olsem yu em ol i bungim wankain hevi nau yu gat long en. Mipela i luksave olsem yu pret na i no amamas long bungim kain hevi olsem.

Laipain em i wanpela Kristen oganaisesen. Olsem na mipela i no save amamas long wanpela man na meri i slip wantaim na mekim pasin nogut taim tupela i no marit. Na tu mipela i no save amamas long yu toktok long kilim pikinini o yu yet. Yu tokim mipela pini long hevi bilong mi. Olsem na mipela bai traim long givim yu sampela kain helpim.

Yu tok long mekim tupela samting-kilim yu yet o pikinini. Lo bilong kantri i no givim tok orait long wanpela man o meri long mekim dispela tupela samting. Olsem na mipela i no inap sapotim yu long mekim dispela tupela samting.

Em i moa gutpela long yu mas go wantaim dis-

pela hevi na stap wantaim mama bilong yu. I tru olsem em i hat long mekim dispela samting. Tasol em tasol i rot. Bikos i nogat arapela rot o samting em yu ken mekim.

Traim na tingim wanem samting yu bin mekim taim yu kism bel namba wan taim. Maski yu bin pret na tu papamama bilong yu i no bin amamas long yu. Tasol yu bungim dispela hevi na nau mama bilong yu i wok long lukautim dispela pikinini. I tru olsem mama bilong yu bai i no amamas long yu. Tasol olsem wanpela mama, kros bilong em bai pinis na em bai lukautim nupela pikinini bilong yu.

Sampela taim i gutpela long serim hevi bilong yu wantaim arapela meri. Yu gat wanpela pren o anti em yu ken toktok wantaim em. Na em i ken tokim mama bilong yu olsem yu gat bel gen? Yu pilim olsem wanem long tokim mama bilong yu yu yet? I tru olsem em i save kros long yu. Tasol sopo yu go bihainim sampela stretpela na gutpela rot na askim em long porgivim yu. Na tokim em olsem yu nidim luv na sapot bilong em.

Yu tok olsem yu no laikim boipren bilong yu moa. Olsem na taim em i lusim yu, yu bai i no inap wari. Ating nau yu bai luksave long long rong bilong yu. Na yu bai i no inap long slip wantaim wanpela man gen. Inap long taim yu bungim wanpela man i amamas long maritim yu na lukautim tupela pikinini bilong yu.

Mipela i ting olsem nau yu bai luksave long dispela hevi. Na long wankain taim yu luksave long pasin nogut yu bin mekim. Mipela pilim olsem yu bai luksave long rong bilong yu na kamap wanpela gutpela meri long bihainim taim.

Mi Laipain


Salim ol hevi na wari bilong yu i kam long LAIPLAIN, P.O.Box 6047, Boroko. Yu ken ringim mipela tu long telipon namba 260011. Mipela i no inap autim trupela nem bilong yu long hia.

# Lowest prices

Specials available until 27/02/94. Hurry while stocks lasts!!!

# erima

## SUPERMARKET



MADAM MACKEREL  
IN OIL 150Z WERE K1.35  
**K1.29**



NESTLE IDEAL MILK  
150MLS. WERE .62t  
**.55t**



NRB  
ASSORTED DRINKS  
1.25LTRS WERE K2.23  
**K2.09**



FRESH MILK 1LTR  
WERE K1.07  
**.99t**



ARNOTT'S  
SAO BISCUITS  
250G. WERE K1.20  
**K1.09**



TRUKAI RICE 1KG  
WERE .68t  
**.63t**




PABLO  
COFFEE 50GM  
WERE K1.49  
**K1.39**




TASTY BAKE BREAD  
680G.  
**.70t**



MCCAIN PEAS 500GM  
WERE K2.08  
**K1.89**




FARM  
FRESH SAVOYS  
T/P KG. WERE K3.48  
**K2.49**



RED APPLES  
WERE K2.49  
**K2.09 KG.**




ANCHOR BUTTER 113G  
WERE .35t  
**.33t**



MUTTON  
TRIMMING T/P  
KG. WERE K2.89  
**K2.29**

### TRADING HOURS

Monday 8:30 am to 6:30 pm  
Tuesday 8:30 am to 6:30 pm  
Wednesday 8:30 am to 6:30 pm



Thursday 8:30 am to 6:30 pm  
Friday 8:30 am to 7:00 pm  
Saturday 8:00 am to 6:30 pm  
Sunday 9:00 am to 1:00 pm.

# STOP PRESS

## Wes Nu Briten Fores Risos Onas Asosiesen (WNBFR0A)

**TOK SAVE I GO LONG OL PAPA BILONG OL FORES RISOS INSAIT LONG KANTRI NA OL NARAPELA MANMERI**

Mipela ol papa bilong ol fores risos insait long Wes Nu Briten bai pasim olgeta 20 timba bisnis insait long provins long Mas 1 sapos Fores Minista Tim Neville i no kam sindaun na toktok wantaim mipela long ol nupela Forest Lo.

Long ol planti kibung ol papa bilong graun i holim wantaim ol eksekutiv bilong mi (WNBFR0A), planti bilong ol papa graun i laikim mipela i mas pasim ol wok bilong katim diwai. Bihain long kibung wantaim ol lida na papa bilong fores risos long NGI rijon, mipela i toktok tu wantaim ol lida na papa bilong graun long Sauten na Momase rijon pinis long dispela samting. Ol dispela grup i sapatim stret tingting bilong WNBFR0A long ol dispela toktok.

Dispela samting i kamap long wanem Minista bilong Fores, Tim Neville i no harim toktok bilong mipela long holim wanpela bung wantaim ol papa graun bilong mipela. Na ol papa graun i ken givim tingting bilong ol long dispela nupela Forest Lo em gavman bai yusim stat long Mas 1. I gat 4-pela wik tasol i stap bai dispela lo i kamap tru, ol papa graun no wanbel long minista. Bilong wanem Minista i no soim laik bilong sindaun na toktok wantaim ol. Mipela i westim taim na mani long kam long Mosbi bilong kam sindaun na toktok wantaim minista. Tasol olgeta taim mipela i kam, Minista o ol mausman bilong em i nog at taim bilong toktok long mipela. Sapos dispela kain pasin i go het yet, Minista bai karim hevi sapos olgeta wok i pas.

Minista i mas save olsem ol dispela toktok mipela i laik toktok wantaim em i gat as na i no toktok nating. Taim sampela hap bilong dispela nupela Forest lo i gutpela na i stap bilong helpim industri na kantri, i gat ol sampela hap em i no gutpela long mipela. Wanem samting mipela i laik toktok strong em long rot bilong kisim mani o revenu sistem. Dispela i mekim na mipela i salim planti tok save long ol niuspepa.

Ating Minista i no luksave olsem timba industri long PNG i no save kamapim tasol K70 milien taim em i salim ol diwai. Industri i save kamapim K200 milien tu long sait bilong takis taim diwai i lusim kantri.

Dispela em i bikpela helpim tru i go long hanpaus bilong kantri. Dispela mani i no inap wokim go long strongim timba industri tasol. Mani ya bai go tu long helpim ol pipel insait long kantri long painim gutpela sindaun. I tru olsem taim gavman i wokim baset bilong dispela yia, timba industri tasol i givim bikpela mani tru we i kam long ol risos bilong kantri yet.

Sapos olgeta wok bilong katim diwai na salim i pas, dispela bai stapim rot bilong kantri long kisim moa mani. Dispela i no laik bilong ol papa graun long pasim wok. Tasol em i asua bilong wanpela man husat i no save harim tok: em Minista yet.


Ol wok bilong katim diwai insait long Wes Nu Briten tasol i planti moa long ol narapela hap bilong kantri. Na Stettin Bay Lumber kampani em i bikpela kampani tru insait long kantri. Sapos olgeta wok bilong katim diwai i pas, mipela ol papa graun i no inap lusim wanpela samting. Bilong wanem ol diwai bilong mipela bai stap yet wantaim mipela.

Insait long nupela forest lo na long ol toktok minista i mekim long ol niuspepa, as tingting bilong ol i lukluk long wanem samting bai kamap long ol diwai taim mipela i salim ol. Na dispela i bihainim polisi bilong gavman long wanem samting bai kamap bihain taim. Tasol long nau yet, Minista wantaim Nesanel Fores Asosiesen (NFA) i no mekim wanpela samting long bihainim stret dispela tingting na kantri bai inap lukim. Dispela i kamapim kain kain tingting namel long ol papa graun. Na ol i no save long wanem kain as tingting tru Minista i gat wantaim dispela nupela Fores Polisi.

I no gat wanpela man inap kisim nating ol diwai long bus bilong ol papa graun. Long wanem ol dispela samting em bilong ol yet em ol tumbuna bilong ol i givim ol.

Nau yet i luk olsem tingting bilong minista em long kisim olgeta wok bilong timba i kam aninit long em na dispela em i nogut tru. Ol papa graun i save kros long graun bilong ol i kamap tru sapos gavman i no harim tok bilong ol. Na mipela ol papa bilong ol bus na diwai i no laikim dispela pasin i kamap.

Em i no inap gutpela sapos dispela kain samting bilong kros long graun i kamap. Sapos minista i no harim toktok bilong mipela pastaim long Mas 1, 1994 ating bai dispela kros i kamap.



PETER HAROLD

Presiden- Wes Nu Briten Fores Risos Onas Asosiesen. (WNBFR0A)

*Kirap Wantaim Kakaruk, Nambawan, Wikenda na Grup Fe.*

# Air Niugini igivim moa HAP PRAIS TIKETS.

## Kirap Wantaim Kakaruk

Narapela taim yu raun, kisim nambawan flait long dei na savim 50% long tiket. Yu ken raun long ol narapela dei long wik, long "Kirap Wantaim Kakaruk" flait igo long narapela hap bilong kantri. Long kisim dispela spesol tiket yu mas stap moa long 7 pela dei long peles, igo inap long 30 dei tasol.

## Nambawan Fe, Nambawan Prais

Sapos yu laik go long ples na malolo, flai long Tunde, Trinde o Fonde na savim 50%. Yu ken stap long ples long 14 dei igo inap long 30 dei tasol. Yu yet makim taim yu laik flai. Tunde, Trinde na Fonde.

## Hap Prais Wikenda

Kisim liklik malolo na go lukim ol poroman, long spesol taim o stap wantaim wanpela long ol nambawan hotel/resot long kantri. flai long Fraide o Sarere na kam bek long Sande o Mande, 50% diskaunt long tiket. Spesol prais long ol haus silip na wanwan hotel/resot igat tu.

## Grup Fe Na Spesol Diskaunt

Ol spots klab, Ol wimens clab na ol kain bikpela grup. Yu nap sevim bikpela moni taim yu trevol wantaim grup igat 15 man/meri o moa. 20% diskaunt long wanwan tiket yu baim!! Na lida bilong grup bai kisim fri tiket, em nau, fri tiket!!

*Nau igat foapela wei yu ken flai wantaim Air Niugini...  
na sevim moni wantaim.*



# Air Niugini

*Offer subject to Government approval. Conditions apply*

*Lukim Air Niugini o narapela ples long bukim na stretim tiket.*



•Wigan Bears bilong June Valley ragbi tas kompetisen husat I bin pilal long las wik Sande na winim Sky Raiders long ol nokaut. *Photo: Ivara Laho*



• Ale Gole bilong Waga Sisters I was gut long Margaret bilong Eels long salim bal I go long main semi fainel bilong Waigani Op Sisen netbal. Waga Sisters i win 18-10 na bai bungim Wild Cats long prilimineri fainel. *Photo: Jack Ami.*



•Dispela em Hakala Raiders tim bilong Mahuru Sevans Tas Kom-petisen. *Photo: Jack Ami*



•Dispela em stall bilong Waigani Op Sisen Tas ragbi. Pilal I stap namel long Eels na Wild Cats. Eels I winim dispela maina semi fainel long 6-1. *Photo: Jack Ami*



•Pilaia bilong Malangan long Mosbi Sofbal resis Anna Kakot I redi tasol long paltim bai. Na long baksait em ketsa bilong Yunaited Bowie Konerus na sentrel ampala Anthony Simitap i was i stap. Malagan i win 11-12. *Photo: Jack Ami*



•Nesanel Spot Institiut long Goroka I paia long las Sande taim ol tim bilong ragbi yunien sevans i pilal long hap. *Photo: Sape Metta*



**POM WOMENS SOFTBALL ASSOCIATION INC.**  
1993/94 SEASON DRAW - SOUND TWO  
WEEK 19 - 19.02.94.

TIME	DIAMOND ONE		GRADE
0900	City Tigers vs POM Tech		C T. Simitap
1030	Yokomo vs Elcom		A. T. Simitap
1200	Royals vs United		A L. Duba
1330	Fairdeal Gazelle vs Fujitsu		A P. Chalapan
1500	Mazda Carps vs Shell Wantoks		A T. Simitap
1630	Globe Malangan vs Lotto Stars		A. A. Evald

TIME	DIAMOND TWO		GRADE
0900	Admiralty vs PNGBC Achiever		C L. Sorang
1030	NGI vs Chebu		B R. Misiel
1200			
1330	Elcom vs Norths		C C. Terra
1500			
1630	Fairdeal Gazelle vs Yokomo		B C. Terra

TIME	DIAMOND THREE		GRADE
0900	Royals vs Shell Wantoks		B L. Evald
1030	Fujitsu vs UPNG		AR C. Terra
1200	Mazda Carps vs Lotto Stars		AR N. Tata
1330	Globe Malangan vs Garamut Country		AR A. Moe
1500	Isuzu Karanas vs Tarangau		AR K. Paivu
1630	Chebu vs Norths		AR R. Misiel

BYE: Garamut Country

GRADE C

NOTE: • Isuzu (B) and United (C) have been dropped from the competition due to consecutive forfeits. Teams scheduled to play will be awarded match points for the remaining two games.  
• Only the top four teams will play in the finals. If two teams are equal, on the fourth place, percentages will be used to find the fourth spot.

**POM WOMENS SOFTBALL LADDER**  
AS OF 12.02.94.

'A' Grade	Points	Percentage
1. Globe Malangan	43	
2. Shell Wantoks	41	
3. Lotto Stars	37	147.436%
4. R.Q. Royals	37	133.84%
5. Yokomo	30	
6. Fujitsu	28	
7. Fairdeal Gazelle	26	81.0%
8. Mazda Carps	26	79.79%
9. Elcom (1 forfeit)	24	
10. United (1 forfeit)	22	

'A' Reserve	Points	Percentage
1. Norths	45	
2. Chebu	43	
3. Isuzu Karanas	40	
4. Tarangau	37	
5. Garamut Country	30	94.01%
6. Globe Malangan (1 forfeit)	30	81.73%
7. Fujitsu	30	81.15%
8. Mazda Carps	23	
9. UPNG	21	
10. Lotto Stars	21	

'B' Grade	Points	Percentage
1. NGI	32	
2. R.Q. Royals	31	
3. Admiralty	30	
4. Yokomo	23	
5. Shell Wantoks	22	
6. Chebu	20	
7. Fairdeal Gazelle (2 forfeits)	14	
8. Isuzu Karanas (5 forfeits)	13	

'C' Grade	Points	Percentage
1. City Tigers	38	286.076
2. Admiralty	38	234.48
3. PNGBC Achiever	38	196.154
4. Norths	30	
5. Elcom (1 forfeit)	23	
6. Pom Tech (1 forfeit)	22	
7. Garamut Country	21	
8. UPNG (2 forfeit)	18	
9. United (8 forfeit)	12	

**KIUNGA RUGBY LEAGUE PRE-SEASON DRAW**  
VENUE: TOWN OVAL

TIME	GRADE	CLUBS		
01.00	A	Magani	vs	Royals
02.30	A	Brothers	vs	Tigers
04.00	A	Souths	vs	United

TARANGAU BYE:

ROUND TWO: SUNDAY 20TH FEBRUARY, 1994.

01.00	A	Magani	vs	United
02.30	A	Souths	vs	Tigers
04.00	A	Brothers	vs	Tarangau

ROYALS BYE:

**PUBLIC SERVANTS VOLLEYBALL ASSOCIATION DRAWS**  
VENUE: SIR JOHN GUISE INDOOR STADIUM  
DATE: 19/02/94

ROUND: 11	Court: No 1	Time	Teams	Vs	Teams	Division	Referee
	169	9.00	NCDC	vs	Elcom	W	Vee Kay
	170	10.30	UPNG	vs	PTC	W	M. Gima
	171	12.00	Fire	vs	Lands	W	Ykolisa
	172	1.30	DEC	vs	NJC	W	Unatah
	173	3.00	NRI	vs	Sports Comm	W	M. Dicy

Court: No 2	Time	Teams	Vs	Teams	Division	Referee
174	9.00	Fire	vs	ATT General	M	Charlie
175	10.30	Lands	vs	Sports Comm	M	E. Oa
176	12.00	DEC	vs	NRI	M	K. Walo
177	1.30	Health	vs	UPNG	M	Kay Dee
178	3.00	NCDC	vs	Elcom	M	G. Wala

Court: No 3	Time	Teams	Vs	Teams	Division	Referee
179	9.00	Health	vs	Finance	W	M. Walo
180	10.30	ATT General	vs	Education	W	Magela
181	12.00	PTC	vs	NHC	M	Bobola
182	1.30	Finance	vs	Education	M	P. Vagi

**RABAUL SOFTBALL ASSOCIATION DRAW**

Saturday, February 19, 1994.

Time	Teams	Vs	Teams	Division	Diamond
10.30	Malagan	vs	B/Pythons	WB	3
12.00	NSC	vs	Raiders	WB	3
1.30	Raiders	vs	I/Hawks	WA	3
3.00	MSC	vs	Elcom	WA	3

10.30	Elcom	vs	Hoodsco	WB	4
12.00	B/Eagles	vs	Hoodsco	WA	4
1.30	PTC	vs	Malagan	WA	4
3.00	Kikila Cats	vs	NSC	WA	4

12.00	Raiders	vs	Hoodsco	MB	1
1.30	B/Eagles	vs	Elcom	MB	1
3.00	NSC	vs	Malagan	MB	1

12.00	B/Pythons	vs	Volex	MB	2
1.30	NSC	vs	Kikila Diggers	MB	2
3.00	Hawks	vs	Kikila Cats	MB	2

Sunday, February 20, 1994.

Time	Teams	Vs	Teams	Division	Diamond
12.00	Raiders	vs	Hoodsco	MA	1
1.30	B/Eagles	vs	Elcom	MA	1
3.00	NSC	vs	Malagan	MA	1

12.00	B/Pythons	vs	Volex	MA	2
1.30	MSC	vs	Kikila Diggers	MA	2
3.00	Hawks	vs	Kikila Cats	MA	2

• PTC Women's B on Bye  
MA - Mens A Grade  
WA - Women's A Grade  
WB - Women's B Grade  
MB - Men's B Grade

**KIUNGA RUGBY LEAGUE**

ROUND 2 DRAW 5  
SUNDAY FEBRUARY 20, 1994.

TIME	GR	TEAMS	VS	TEAMS
1.00pm	A	Magani	vs	United
2.30pm	A	Souths	vs	Tigers
4.00pm	A	Brothers	vs	Tarangau

POINTS LADDER  
MONDAY MAY 31, 1993

CLUB	A GRADE					
	P	W	D	L	F	A
Souths	10	8	-	2	240	136
Magani	10	7	-	3	240	166
Brothers	10	5	1	4	162	155
United	10	3	3	4	178	174
Ambangs	10	1	3	6	170	254
Royals	10	2	1	7	133	202

CLUB	RESERVE GRADE					
	P	W	D	L	F	A
Souths	8	8	-	-	144	58
Ambangs	8	4	-	4	88	85
Magani	8	3	1	4	86	99
Brothers	8	3	1	4	64	78
United	8	2	2	4	94	114
Royals	8	2	-	6	60	90

CLUB	UNDER 19					
	P	W	D	L	F	A
United	8	7	1	-	104	40
Brothers	8	4	1	3	51	66
Magani	8	2	3	3	58	56
Ambangs	8	2	2	4	62	72
Souths	8	2	2	4	40	48
Royals	8	2	1	5	30	75

**CLUB CHAMPIONSHIP**

Club	A	Res	U/19	Total
Souths	30	16	2	48
Magani	24	12	6	42
Brothers	27	6	3	36
United	12	15	8	36
Ambangs	9	12	2	23
Royals	6	0	3	9

**LEADING TRY SCORERS**

NAME	CLUB	TRIES
Cecil Iakoe	Magani	10
Agia Muruga	Magani	7
Joe Unage	Ambangs	6
Mara Kubu	Brothers	6
Albert Mindaka	United	6

**LEADING GOAL KICKERS**

NAME	CLUB	GOALS
David Mara	Souths	12
Mara Kubu	Brothers	8
Amandus Lawrence	Ambangs	7
Agia Muruga	Magani	5

**LEADING SCORES**

NAME	CLUB	TRIES	GOALS	P/GOALPTS
C. Iakoe	Magani	10	-	40
M. Kubu	Brothers	6	8	40
A. Muruga	Magani	7	5	38
N. Gamai	Brothers	5	2	25

**LAE SEVEN ASIDE DRAW FOR ROUND FIVE AND SIX**  
Sunday, February 20, 1994.

Time	Teams	Vs	Teams
1.30pm	Royals	vs	United
1.50pm	Brothers	vs	Tigers
2.10pm	Spiders	vs	Defence
2.30pm	Tarangau	vs	Panthers
3.50pm	Spiders	vs	United
3.10pm	Brothers	vs	Panthers
3.30pm	Royals	vs	Defence
3.45pm	Tarangau	vs	Tigers

Note: All games will be held at the Sir Ignatius Kilage Stadium and not Lae Rugby League ground which is at present undergoing maintenance and replanting of new grass.

**GOGODALA COMMUNITY SOCCER ASSOCIATION (18/02/94)**

Semi Finals (Pool 'A')				
Time	Teams	Vs	Teams	Divisions
9.00	Mase	vs	Gerehu	B
9.50	Kalu	vs	Pasiya	W
10.40	Kalama	vs	Kalu	B
11.30	Gerehu	vs	Mase	W
12.30	Mase	vs	Gerehu	A
1.30	Malebe	vs	Pasiya	A

(Pool 'B')				
Time	Teams	Vs	Teams	Divisions
9.00	Gordon	vs	Pasiya	B
9.50	Hohola	vs	Gordon	W
10.40	Winner	vs	Malebe	B
11.30	Winner	vs	Malebe	W
12.30	Kalama	vs	Kalu	A
1.30	Hohola	vs	Gordon	A

**PORT MORESBY MEN'S SOFTBALL ASSOCIATION**  
DRAWS Week 18 20/02/94

A grade Diamond 1			
1000-1115	Gazelle vs Fuji (B Grd)		R Misiel
1130-1245	Manolos vs Hawks		L Duba
1300-1415	Elcom vs NGI		M Pasok
1430-1545	B/Eagles vs Malangan		P Chalapan
1600-1715	Gazelle vs Fuji		A Evald

B grade Diamond 2			
1000-1115	Elcom vs NGI		L Sorang
1130-1245	B/Eagles vs Malangan		A Moe
1300-1415	MSC vs Karanas		L Sorang
1430-1545	Admiralty vs Karanas		R Misiel

C grade Diamond 3			
1000-1115	MSC vs Malangan		C Terra
1130-1245	H/Bay vs Fuji		A Evald
1300-1415	Manolos vs PNGBC		N Kimi
1430-1545	Chebu vs C/Tigers		A Moe

**GEREHU NETBALL DRAWS**  
RD 07 & 03

Saturday, February 19, 1994.

Time	Grade	Teams	Vs	Teams
10.00	B	Tigers	vs	Crusaders
10.30	B	Roosters	vs	Magani
11.00	B	Broncos	vs	Seagulls
11.30	B	Panthers	vs	Sharks
12.00	B	Country	vs	Raiders
12.30	A	Tigers	vs	Crusaders
1.00	A	Roosters	vs	Mag

# Ol yangpela yusim op sisen taim bilong wokim klasrum

## VANIMO RIPOT

BONNY ANDO i raitim

PLANTI spot klap insait long Wes Sepik provins i no sasve helpim ol komyuniti em ol i stap long en.

Dispela kain hevi i no bilong Wes Sepik tasol. Nogat. Em i stap tu long olgeta hap bilong kantri.

Long planti taim, ol spot klap i save tingting

long mekim wok bilong kisim tasol mani bilong helpim wok bilong spot. Sapos nogat, as bilong kamapim spot klap em long pilai spot tasol.

Long liklik ples Wutung insait long Vanimo, ol yangpela bilong hap i no tingting moa long pilai tasol. Tingting bilong ol i stap

tu long helpim komyuniti bilong ol.

Wanpela klasrum bilong komyuniti skul long dispela hap i kamap long hatwok bilong ol spot manki tasol. Na dispela klasrum i pinis na ol sumatin i wok long yusim.

Wok bilong dispela klasrum i no kostim ol wanpela mani. Olgeta samting i fri tasol.

Ol i yusim ol kapa na timba bilong ol olupela haus insait yet long

ples. Sampela samting i kam long ol haus na opis bilong olupela gavman stesin long Wutung. Ol bikman bilong ples yet i bin helpim ol wantaim ol arapela samting bilong wokim na pinisim dispela klasrum.

Man husat i go pas long dispela wok, Patrick Muliale i tok em i amamas tru na givim bikpela tok tenkyu i go long ol yangpela long gutpela wok bilong ol. Muhiale yet i bin

wokim plen bilong dispela klasrum na i go pas long sanapim dispela klasrum.

Em i tok bikos olgeta boi i harim tok na bihainim olgeta samting em i laikim long en, ol i pinisim dispela klasrum long sotpela taim tasol. Ol i pinisim dispela klasrum insait long 5-pela wik tasol.

Ol gret 5 sumatin bilong Wutung komyuniti skul i yusim nau dispela klasrum. Ol i bin opim long Sarere, 5 Februari.

Long taim bilong opim klasrum, moa long wan handed man, meri na pikinini i bin kamap.

Man husat i opim klasrum long dispela taim Asisten Seketeri bilong Edukesen long Wes Sepik, Ignas

Wunum. No gat arapela bikman moa bilong gavman i bin kamap.

Pastaim long Wunum i opim klasrum, em i givim bikpela tok tenkyu na amamas bilong em i go long ol yangpela long gutpela wok bilong ol. Em i tok dispela i bikpela samting bilong lukim olsem ol yangpela i givim op sisen taim bilong ol long wokim klasrum bilong helpim komyuniti.

Long wankain taim, em i askim tu olgeta papamama bilong Wutung komyuniti long wokbung wantaim na sapotim wok bilong komyuniti skul long hap bilong ol.

Wunum i bin givim liklik taim bilong toktok tu long kain rot bilong

skul em ol i yusim long las yia.

Em i tok gret 6.fainal eksem bilong las yia i bin hat tru. Olsem na planti sumatin i no bin winim pasmak bihain long eksem na i no go long haikul.

Dispela i kamap long wanem man husat i stretim dispela eksem i no bin stap long kantri bipo. Gavman i bin bringim em i kam long kantri bilong wokim ol eksem pepa bilong las yia.

Olsem na planti samting ol sumatin i lainim long en i no bin kamap long eksem pepa. Wunum i tok tu olsem dispela em i namba wan taim bilong ol lain husat i stretim ol eksem pepa i wokim olsem.



•Nupela komyuniti klasrum em ol yangpela man bilong ples Wutung long Vanimo insait long Wes Sepik provins i wokim. Long op sisen taim, ol i yusim long wokim klasrum na helpim komyuniti. Ol foto: Bonny Ando.

## Trotters na Warriors go insait long Inta Siti resis

RODNEY KAMUS i raitim

"ABANG KITEK" (liklik samting) em hap tok Madang Kalibobo Globe Trotters i salim long ol narapela tim husat bai pilai long Inta Siti Kap resis. Dispela hap tok ol i bin mekim long taim SP Holdings kampani i opim dispela resis long las wik.

Kalibobo Trotters i redi tasol long nekim Goroka Lahanis, Rabaul Guria, Mosbi Vipers, Hagen Eagles, Lae Bombers, Mendi Muruks na Kundiawa Warriors long resis bilong dispela yia.

Kalibobo Trotters wantaim Kundiawa Warriors em ol nupela tim bilong dispela resis.

Long taim bilong opim dispela resis, SP Holdings i givim mani inap olsem K95,000 bilong ranim dispela pilai.

Dispela K95,000 i namba wan hap mani em kampani i promis long givim bilong dispela resis. Ol i

bin tok orait long givim K300,000 i go long PNGRL long ranim Inta Siti Kap resis inap long tripela yia.

Insait long dispela K95,000 bilong dispela yia, K25,000 bai go long wok bilong apim nem bilong pilai ragbi lig insait long kantri, K40,000 bai go long baim kos bilong pilai long dispela yia na K30,000 em prais mani bilong ol tim husat i win.

Jenerel Menesa bilong SP Holdings, Ton Blum i tok em i amamas long lukim olsem ragbi lig i wok long kamap gutpela na strong moa insait long kantri.

PNGRFL vais presiden Kevin Murphy i tok dispela resis bai helpim yumi long kamapim ol gutpela Kumul pilaia husat bai redi taim tupela kantri i kam pilai hia long dispela yia.

Tupela kantri husat bai kam pilai long PNG em Nu Silan na Frans.

Murphy i tok PNG i no winim Frans yet longpela taim tru na dispela i wankain long Niu Silan tu.



•Long lephan i go long raithan em het tisa bilong skul, Dominic Soli, Asisten Seketeri bilong Edukesen Ignas Wunum na man husat i wokim plen bilong dispela klasrum, Patrick Muliale.

## Welpam soka resis bai stat long Sande

SAPOS olgeta samting i kamap stret, ol lain bilong Nu Briten Pam Wel Developmen bai kirapim pri sisen kik resis bilong ol long Sande, 20 Februari, 1994.

Ol ripot i kam long Kimbe insait long Wes Nu Briten i tok olsem 10-pela tim i soim laik pinis bilong pilai. Tasol i no olgeta yet i kamap na tok klia sapos ol bai pilai o nogat.

Olsem na long nau yet, asosiesen i no inap autim dro bilong kik long

Sande. Dro bai kamap tude o tumora samting.

Wanpela bikpela samting em asosiesen i laikim em long olgeta pilaia bilong ol 10-pela tim i mas go lukim dokta. Na dokta i mas givim ripot olsem ol i no gat bagarap na i orait long pilai.

Tok save pepa bilong asosiesen i tok klia olsem sapos i no gat pepa bilong dokta, sori tumas tasol bai man i no inap long pilai.

## Wau laik kirapim gen soka

ARI GUH DANDEE i raitim

OL olupela soka klap long Wau i tingting nau long kirapim bek pilai long dispela yia insait long Wau distrik long Morobe provins.

Wanpela ripot Wantok Niuspepa i kisim i tok olsem olupela soka klap i gat bikpela laik long kirapim gen das na soim ol stail bilong ol. Sampela bilong ol dispela olupela

klap em BFC, Waga United, Kurex na Sen. Francis.

Mausman bilong Wau Soka Asosiesen, Harvey Barnabas i tok olsem long wanpela kibung bilong ol long las wik Fonde, ol dispela olupela klab i tokaut olsem kik resis bilong soka i mas kamap gen long Wau.

Bihainim tingting na laik bilong ol olupela klap Barnabas i oganaisim wanpela pilai bilong luksave long laik.



•Bos bilong SP Holdings long Mosbi, Ton Blum i givim bikpela sais sek bilong K95,000 i go long vais presiden bilong Papua Niugini Ragbi Futbal Lig, Kevin Murphy. Foto: Jack Ami.

# Op sisen resis bilong ol lain Kange kamap narakain liklik

Gogodala statim komyuniti-soka resis bilong en

## HAGEN SOKA RIPOT

FRANCIS ULIAU i raitim

PLANTI wokman bilong ol kampani long Hagen i amamas tru olsem i gat wanpela kain resis bilong ol long amamasim ol yet.

Klostu olgeta hap bilong Papua Niugini i no gat kain resis olsem. Tasol long Hagen, i gat soka resis bilong 5-pela man tasol long makim wanpela tim.

Dispela resis i save kamap insait long bikpela haus bilong YMCA long Hagen. Wan wan tim bai gat 5-pela memba bilong en.

Presiden bilong Hagen Soka Asosiesen, Channel Kakeha i bin kirapim dispela resis long las yia.

Em i tok dispela resis i

kamap olsem wanpela op sisen pilai bilong ol. Na ol i kolim olsem op sisen '93-'94 resis.

I gat 8-pela klap i rejista na i wok long pilai insait long dispela resis. Ol dispela klap em Trukai, Boroko Motors, Elcom, Coca Cola, Pepsi, ESCO, DPM Makes na Sullivans.

Wan wan klap i gat tupela tim. Wanpela bilong ol Masters na arapela bilong ol Open. Resis bilong ol Masters em bilong ol wokman bilong ol kampani tasol. Orait dispela bilong ol Open i karamapim tu ol wokman wantaim ol ausait lain.

Presiden i tok dispela resis i bilong ol kampani wokman tasol olsem na ol tim tu i gat nem bilong ol kampani.

Bikpela laik bilong asosiesen nau em long pinisim dispela resis long pinis bilong mun Mas. Olsem bai ol inap kirapim sisen tru.

Long nau yet, ol lain bilong sofbal asosiesen i wok long yusim pilai graun. Olsem na ol kik i no inap kamap inap long taim em sofbal resis i pinis. Na dispela em sampela taim bihain long Ista Wiken.

Long kalenda bilong PNGFA bilong dispela yia, no gat wanpela bikpela tonamen o kik resis bai kamap long dispela taim. Olsem na i no gat wari long dispela. Ol pilai bilong Wol Kap resis tasol bai kamap.

Namba wan bikpela resis insait long kantri bai kamap long mun Jun. Dispela em kik resis bilong Nesenel Wimens Sempionsip long Mosbi. Na Hagen i gat bikpela laik tu bilong traimit bun gen bilong ol nambis meri long dispela

taim.

Channel i tok dispela em i namba wan 12 wiken nau bilong ol long holim dispela 5-a-sait soka resis. Na ol i save givim 20 minit long wan wan hap. Lo bilong pilai i tokaut tu olsem sapos wanpela pilai i sotwin, em i ken lusim pilai graun na ron i go ausait. Na kwiktai wanpela bilong em inap ron i go insait na kik.

Orait bihain long sampela taim, em i ken ron i go insait gen long pilai graun na brukim bun wantaim ol birua.

Dispela kain stail bilong pilai soka i stap long olgeta hap bilong wol. Tasol long Papua Niugini na planti arapela hap, no gat man i save tingting na soim laik tumas long kamapim kain kik resis olsem.

Na ating long Papua Niugini em Hagen em ol namba wan lain bilong kirapim ol 5-a-sait soka resis.

GODFRIED YASSAFAR i raitim

LONG dispela wik Sarere, kain kain tok-tok, tok pilai, singaut, lap, na amamas bai kamap long tupela pilai graun long Yunivesiti bilong Papua Niugini long Mosbi. Planti man, meri na pikinini bai kamap na bung long dispela taim.

Sapos i no gat ren long dispela taim, ating i luk olsem paia bai kukim stret dispela tupela pilai graun. Sapos i gat ren, i luk olsem ol bikpela tais wara bai kamap.

Watpo na ol dispela santing bai kamap?

Bikos Gogodala Komyuniti Soka Asosiesen (GCSA) long Mosbi bai holim ol semi fainal gem bilong en.

Hamas tim bai kik resis? Aio, planti tu ya.

Presiden bilong GCSA, Waliyato Clowes i tok olsem i gat 8-pela klap olgeta.

Wan wan bilong ol i gat tripela tim-A gret tim bilong ol man, B gret tim bilong ol man na wanpela tim bilong ol meri. Dispela i min olsem 24 tim olgeta bai soim stail na pawa bilong ol long soka.

Tasol tim bilong ol meri bilong Kalama klap i no inap kik resis. Bikos Misis Clowes i tok ol i no baim rejistresen fi bilong ol long taim sisen i stat i kam inap nau. Olsem na em

yet (Clowes) wantaim ol opisal bilong em i rausim dispela tim bilong ol meri long kik.

Em hia nem bilong dispela 8-pela klap: Mase, Gerehu, Pasiya, Kalu, Kalama, Malebe, Gordon na Hohola.

Misis Waliyato i tok long bipo, 4-pela top tim tasol i save go insait long semi fainal. Na bihain ol wina i save salens i go na tupela tim tasol i save go insait long gren fainal. Na tu em i tok long ol yia i go pinis, ol klap i save kik resis long kisim tropi tasol.

Long dispela sisen, ol klap i kik resis long winim mani. Bikos long dispela as, em yet wantaim ol opisal bilong em i brukim dispela 8-pela klap i go long tupela grup-pul A na pul B.

Gogodala Komyuniti Soka Asosiesen i bilong ol pipel bilong Westen provins em ol i stap long Mosbi.

Long olgeta yia, bihain long ol sisen bilong spot i pinis. GCSA i save holim kik resis bilong en.

Clowes i tok as tingting na ol i bin statim dispela kik resis em long mekim ol lain bilong ol i stap fit. Em i tok ol i gat Waliya ragbi lig klap bilong ol man, Waliya netbal tim bilong ol meri na Waliya soka klap bilong ol man.

"Mi amamas tru long ol opisal bilong mi. Bikos taim mi bin kamap presiden long 1992/93 sisen na tu long 1993/94 sisen, ol opisal i mekim wok bilong ol. Ol i bin wok-bung gut tru na ranim ol wok bilong GCSA," Clowes i tok.

Em i laik olsem long dispela wik Sarere, olgeta pilaia na sapota bilong wan wan klap i mas kam na bung long pilai graun pastaim long 9 klok.



Nupela pes bilong 1994...Ol lain boi bilong Difens ragbi lig klap i bilas gut tru na redi nau long kukim 1994 ragbi lig sisen long Mosbi. Planti biknem pilaia bilong ol i stap yet long klap. Olsem na ol i gat gutpela sans bilong winim pilai. Foto: Jack Ami.

# Ol boi pawahaus holim yet pawa bilong las yia

## WABEG SOKA RIPOT

PRIMIA tim bilong las yia, Elcom i wok long kukim yet ol arapela tim bilong Wabeg Soka Asosiesen long resis bilong ol.

Long taim pri sisen resis i stat tasol long las wiken, Elcom i soim stret olgeta lektrik pawa bilong em na kukim olgeta waia bilong ol lain tisa na komyuniti sevis wokman bilong TeachCom.

Long las yia, dispela tupela tim i bin bung long gren fainal na Elcom i winim pilai, 2-1.

Wanpela mausman bilong Elcom tim, Ananias Popo i tok olsem ol boi bilong pawahaus i amamas tu olsem midfil pilaia bilong ol long las yia i kam bek pinis bilong kik wantaim ol. Em i bin go

stap long Hagen na nau i go bek pinis long Wabeg.

Na long las wiken, em i soim tru stail bilong em long lukautim midfil na pilai wantaim bal i go inap long fultaim taim ol i bagarapim sindaun bilong TeachCom, 4-1.

Insait long dispela pilai, TeachCom i bin soim tru pawa bilong ol long namba wan hap long banisim ol straika bilong Elcom. Mekim i go na bihain long namba wan hap, ol TeachCom i bin go pas long skoa, 1-0.

Tasol long namba tu hap, ol boi bilong pawahaus i kamap gen na kilim olgeta paia bilong ol tisa na komyuniti sevis wokman. Na ol i sutim 4-pela gol long dispela taim.

Popo i tokaut tu olsem long pri sisen resis, 5-pela klap tasol husat i rejista i wok long pilai. Ol dispela klap husat i wokim tim bilong ol sinia man, junia man na meri em TeachCom, Kumuls, Elcom, Lutheran Youth, na Royals.

Ol narapela husat i no rejista yet tasol i givim nem pinis em Moku, Skwam na Wabeg Haikul.

Em i tok afiliesen fi bilong ol klap em K100 na wan wan pilaia rejistresen fi em K25 long ol sinia man wantaim meri na K12.50 long ol junia pilaia.

Las de bilong baim olgeta fi em long las de bilong pri sisen resis.

Ol junia pilaia i karamapim ol dispela lain boi husat em krismas bilong ol i stat long 16 yia na i go daun.

# Saints laik bungim olgeta yangpela bilong Lae wantaim

## LAE SOKA RIPOT

WOK soka long Lae i no samting bilong pilai na win tasol. Nogat. Em i mas kamap bilong wokbung na amamas tu.

Dispela kain tingting nau i senis insait long ol lain bilong Saints soka klap. Ol dispela lain i laik bungim nau olgeta yangpela man na meri bilong olkain lotu insait long Lae siti.

Maski nem bilong klap i nupela,

no gat wanpela narapela samting i senis. Bipo ol i save kolim dispela klap olsem Katolik Yut. Tasol nau nem i senis i go long Saints.

Insait long wanpela hap tok save pepa bilong em, kepten bilong Lig divisen tim bilong Saints, Iso Mathew i tok ol i bin senisim nem bikos ol i laikim bungim olgeta yangpela bilong olkain sios wantaim. Na i no bilong lotu Katolik

tasol.

Em i tok, "Long dispela yia, mipela tingting long as bilong Saints soka klap. Mipela laikim olgeta yangpela bilong wanem lotu insait long siti long kambung wantaim na pilai."

Mathew i tok Saints i no bilong ol lain Katolik tasol. Nogat. Em i bilong olgeta lain lotu.

"Olsem na mi gat bikpela laik na as tingting bilong dispela long bungim olgeta yut na tu long wok misin.

"Na tu mi laik tok save long olgeta olpela pilaia bilong bipo husat i stap long wanem kona o i stap yet long siti, trening i bin stat long tripela wik i go pinis. Olsem na mi laikim yupela olgeta long kamap."

Mathew i tokaut tu long dispela taim olsem i no longtaim bai klap i holim kibung bilong en.


Long las yia, Saints o Katolik Yut olsem ol i bin kolim long dispela tim, i bin kik long namba wan divisen. Ol i pilai strong i go inap long taim ol i bungim Elcom long

gren fainal na winim ol.

Bihain long dispela, ol eksekutiv bilong Lae Futbol Asosiesen (LFA) i kisim ol na putim ol wantaim Elcom long lig divisen resis.

Long wankain taim tu, presiden bilong Saints, Aaron Mungalon i tok long las wik olsem dispela senis em ol bai wokim long klap bai soim tu pasin belgut long sponsa bilong oi, PSS Sekyuriti.

Papa bilong dispela kampani em i wanpela memba bilong Yunaited Sios.



*Goroka ragbi...Long Goroka nau i gat resis bilong 7-a-sait ragbi yunien. Em i save kamap long olgeta Sande long pilai graun bilong Nesenel Spot Institut. Moa foto insait. Foto: Sape Metta.*

## Olpela lig sta bilong Hailans rijon

SAPE METTA i rattim

SAPOS yu raun long Kainantu taun na yu laik tok tok long ol olpela stail ragbi pilaia, bai yu harim dispela nem Jorifa Tisa Yubiko.

Bilong wanem? Bikos em i liklik long sais na em tasol i wanpela pilaia husat i save makim Kainantu long ol bikpela intenesenel pilai long ol yia i go pinis.

Ol narapela olpela Kumul pilaia em Dekot Koki, Napoleon Bangkoma na Ayuta Ayako.

Tasol Yabuko i no pilai olsem wanpela Kumul liklik. Em i save makim Kainantu long Hailens Son long 1977 i kam inap 1986 taim em i lusim pilai long givim rot long ol narapela pilaia.

Yabuko i gat 32 krismas na em i wanpela komyuniti skul na haikul tisa. Long wok bilong em tasol na ol i givim em dispela pilai nem Tisa.


Tingting bilong em long pilai i stat long 1970 taim em i wanpela liklik manki na save karim su bilong ol sinia pilaia i go long fil na lukim pilai.

Dispela tingting bilong em long pilai i mekim na em i stap long fil long pilai wantaim ol junia tim.

Em i pilai gut na ol i surikim em i go antap long makim Kainantu senis sait long 1976. Tasol em i surik i go antap yet na makim Hailens Son long 1977.

Em i holim namba 7 bilong Hailens Son i stap inap 1986 taim ol Son resis i pinis.

Yabuko nau yet i no amamas bilong wanem Kainantu Winfield Lig resis i nogat nau. Kainantu i wanpela liklik taun tasol ragbi i save bringim planti man i kam inap long 1992 we i nogat gutpela wok bilong edministresen na ragbi i pinis.



• Olpela stail Kumul pilaia bilong Goroka na Hailans son, Jorifa Tisa Yubiko.

Tasol tingting bilong Yabuko i no pinis. Ol narapela bikpela man long taun olsem Tau Amevo, Wera Mori na olpela Kumul Dekot Koki taim ol i traim hat tru long kirapim bek ragbi long Kainantu long dispela yia. Hailens Gol bai redi long sponsorim Kainantu resis long dispela yia.

### • Wiken SPOT DRO...lukim pes 25

• Painim moa pototo??? Opim i go long pes 24

# KOKOPO SOKA GAT HEVI

...bikpela wok stap long han bilong nupela eksekyutiv

FRANCIS ULIAU  
i rattim

OL lain bilong Kokopo Soka Asosiesen bai statim kik resis bilong ol long Mas 4, 1994.

Long dispela wik na narapela wik, ol bai redim tasol pilai graun na ol wan wan tim bilong kik long resis.

Presiden bilong Kokopo Soka Asosiesen (KSA), Peter Saragum i tok pastaim long ol pilai i stat, ol bai holim wan-

pela bikpela kibung bilong olgeta memba bilong asosiesen na ol lain husat i laik kik long sisen bilong dispela yia.

Em i tok i gat planti samting bilong toktok bai kamap long kibung. Olsem na em i laikim olgeta klap long salim ol mausman bilong ol i go long kibung.

Kibung bai kamap long pinis bilong dispela mun.

Saragum i tokaut tu olsem long nau yet i

gat sampela liklik hevi bilong stretim pastaim.

Namba wan hevi em long pilai graun bilong holim ol kik resis.

Em i tok long ol yia i go pinis, Kokopo Soka Asosiesen i save yusim Kokopo So Graun long holim ol kik resis bilong en. Tasol long 1993, ol lain bilong Is Nu Briten Ragbi Futbal Lig i bin kisim dispela pilai graun.

Olsem na soka asosiesen i bringim olgeta gem bilong en i

go long pilai graun bilong Katolik Misin Vunapope.

Tasol long hap, asosiesen i bungim hevi bikos i no gat banis na ol i painim hat tru long kisim mani long dua.

Namba tu bikpela hevi em Kokopo Soka Asosiesen i bungim nau em olsem i no gat gutpela referi asosiesen i stap long hap.

Saragum i tok long 1993 sisen, asosiesen

i bin lusim bikpela mani tru bilong baim ol gutpela ekspirians man long lukautim ol pilai. Long wanem i no gat gutpela referi asosiesen i stap bilong lukautim ol dispela kain wok.

Namba tri samting i stap long wok edministresen bilong asosiesen.

Long 1993 sisen, olgeta man husat i kisim wok bilong soka opis em i ol nupela lain tasol. Na ol i no klia

tumas long wok bilong ranim asosiesen.


Olsem na long stretim ol dispela hevi, ol bikman bilong Kokopo Soka Asosiesen bai bung gen long pinis bilong mun Februari na askim ol bos bilong Kokopo So Graun long yusim pilai graun long hap.

Long wankain taim, Saragum i tok long askim presiden bilong Kokopo Soka Referi Asosiesen, Charles Rangamat long

kirapim gen dispela asosiesen.

Olsem na bilong mekim ol wok i isi, Kokopo Soka Asosiesen bai kisim tasol 8-pela klap bilong kik long dispela sisen. Wan wan klap i mas gat tim bilong kik long: A gret, B gret na resis bilong ol meri.

Sapos olgeta samting i ron gut, Kokopo Soka Asosiesen i gat bikpela tingting bilong salim ol skwat bilong em i go resis long ol bikpela resis i





Hepi Niu Via Olgeta !!

# REBO

TUPELA BRATA SANAP NA LUK LUK I STAP,, OL I NO SAVE EM REBO TASOL IKAM...



EM TUPELA TASOL YAH! EM NAU!

HEY? EM KANU BILONG PAPA YAH! TASOL EM HUSAT I KARIM IKAM!

NOGUT PAPA IKAM PAINIM UUM YAH!


REBO IKAM KLOSTU NA EM SINGAUT...



HEY! TAU! ARERE! EM MI YAH, REBO!

REBO !?!

TAIM BRATA I LUKSAVE LONG REBO, OL I GIVIM SIKSTI I GO LONG EM...




HOI! KSIYAH!

BIG, BRO! IKAMBEK PINIS!!

REBO! REBO! AEE! LONG-TAIM TRU, YAH!

REBO LUKIM TUPELA RON IKAM NA EM KALAP I GO DAUN...



TASOL TUPELA BRATA IKAM PINIS NA OL I APIEM EM...



HOI! KSI, YAH!

HA! HA! HA! WELKAM BEK, HOM!!

HA! HA! HA!

"NA PALAIM EM GO DAUN GEN LONG WARA..."



DAMPIM EM I GO DAUN!!

EM NAU! FILIM NAU?!


HA! HA! HA! LIKLIK SAM-TING!!



Mipela Ol Felosip of Nesinol Baibel Sios i kirapim wanpela Baibel Trening Senta long Badili. Em i wanpela nupela we bilong lainim buk Baibel. Sapos yupela i laik harim sampela tok moa long dispela skul, orait salim pas long FNBC, Box 72, Badili, NCD o ringim mipela long 23 1832

Hepi Betde i go long

NIKITA D. ULIAU



husat bai winim 2-PELA KRISMAS long 19 Febueri, 1994.

Betde Gritings i kam long kandreman Jimmy na Peter long SP2 Hoks, Anti Kayu & Awa Giamsa, pren bilong yu Lawlah na Nancy long Godens, Nicky, Oliver na Xavier wantaim ol kandre ya Max, Jacob, Peter, Michael na Pascal long Gee Bareks, Ronnie, Natasha na Develyn long Kaugere, Pupu Henry, raskol Doco na ankol Sobo.

Ol wanwok bilong Daddy tu i laik tok Hepi Betde!! Las tru em bikipela kiss bilong Mummy Eliz na ol tumbuna long Lae na Wewak long yu.

## FRI BAIBEL KOS YU KEN KISIM SKUL LONG SALIM PAS

Salim nem na edres long: WORLD BIBLE SCHOOL, Dept. PNG4 P.O. Box 9346, Austin, TX 78766 USA

# BELLTEK

MANUFACTURERS AND SUPPLIERS OF CHEMICALS AND EQUIPMENT

INDUSTRIAL CLEANING

scrubber

Brush or pad

Mops

Glomet polish

New Floor striper

Tempo

multi-clean detergent

FANTASTIC

**NOW IN RABAU!**

CONTACT SONNY KARBRETTE ON PHONE 92 1966



**BELLTEK CHEMICALS PTY. LTD.**  
 P.O. Box 2358, Boroko, Papua New Guinea.  
 POM : Ph: 25 7855 Fax: 25 0949  
 LAE : Ph: 42 3065 Fax: 42 5829

## MADANG TOWN INTERIM COMMISSION



### WOKHAT LONG KAMAPIM SMATPELA TAUN

Madang Taun Interim Komisn (MTIC) long Janueri yet i wokhat long kamapim wanpela wok tru long traime na klinim na mekim Madang taun i kamap naispela na smatpela.

Ol manmeri husat i save stap long taun na ol narapela i mas traime na bihainim lo bilong Komisn na noken tromoi pipia o mekim pipia.

Yupela mas putim pipia bilong yupela long ol pipia dram. Mipela i askim tu olgeta manmeri long was gut long ol samting em Komisn i wokim arere long nambis, ol diwai na kokonas arere long Modilon Rot. Na tu ol pipel i mas putim ai long ol lain husat i save bagarapim ol samting na kamautim ol diwai nambaut na holim pasim ol.

Komisn i laik tokaut long olgeta manmeri husat i silip long taun olsem anit long lo bilong Komisn na pablik helt Act, 'olgeta manmeri i mas klinim eria long haus bilong ol' i go inap long baret arere long bikrot na ol i mas katim gras i go daun'.

Ol bisnis haus na ol narapela haus i stap arere long rot i mas luksave long dispela na bihainim. Bilong wanem MTIC i no nap mekim dispela wok bilong ol.

Ol haus i gat aibiskus plawa i stap long ol i mas katim ol sota na mekim ol i luk stail na ol i mas stap wankain tasol olgeta taim.

Sapos MTIC i traime hat tru long klinim gut taun, ol manmeri long taun i mas wok bung wantaim ol na lukim olsem ol eria bilong ol i klin na ol gras i mas sot. Bilong wanem nogut ol moskito na ol narapela samting i bringim ol kainkain sik i kam.

Yu mas amamas olsem yu stap long wanpela smatpel na klinpela taun.

Kam na helpim MTIC na wok wantaim mipela long klinim ol eria bilong yupela na mekim taun i luk nais na yu bai stap long en.

Komape long tokorat bilong ekting taun clerk: **JAMES UNA**

**I gat PAWA!**



**SUPA SWIT MOA**  
 The Taste of Paradise

## Boi Bundi fri-raid i go long Mosbi

**BIKPELA SOKA PILAI I KAMAP LONG WANPELA LIKLIK PLES LONG BUNDI...**  
 OL SAUTS I SALENSIM OL NOTS... SUPA SWIT MOA TU IGO LUKIMA PILAI...

**PILAI I STRONG TRU NA WANPELA PILAIA I BRUKIM LEK BILONG EM...**  
 OOH AAH! SNAP!

**WANTU REFERI I PASIM GEM...**  
 GEM AHT! AAH! LEK I BRUK! YAH! AEE! YU BASARAP TRU!! BAI MI GO SINGAIT LONG REDIO NALI!!

**OL I GO SINGAIT LONG REDIO TASOL TRANSMITA I BAGARAP...**  
 BUNDI KOLIN BEIS HOSPITAL! SALIA HELIKOPTA I KAM! OVA!... NOGAT NOIS NAH! OH-NO! TRANSMITA I MAS BASARAP YA! CRACK!

**TASOL HIRO BILONG YUMI I STAP KLOS TU TASOL NA STRETIM WARI BILONG DL...**  
 NOKEN WARI TU MAS!

**OLGETA I AMAMAS TRI NA TOK TENKIU TRI LONG SUPA SWIT MOA!**  
 TENKIU SUPA SWIT MOA! YU NAMBAWAN! SMOL TINGS! WOW!

**INO LONG TAIM NA TUPELA KAM KAMAP LONG PORT MORESBY JENERAL HOSPITAL...**  
 EM NALI! POMA JENERAL HOSPITAL!

**BAI YUMI MEKIM WANPELA SARDIS YUMI KARUA EIA IGO, BAI YUMI KAM KAMAP LONG ED. POS LONG 4 PELE DE OLGETA. OL MAUNTEN NA WARA BAI, PASIM YUMI YA!**  
 "BAI MI KARUA EIA I GO LONG MOSBI JENERAL HOSPITAL NA OL DOKTA BAI STRETIM EM!"

OL LAIN LONG BUNDI I NOGAT WE TRU LONG HELPIM DISPELA PILAIA... REDIO I BAGARAP NA PLES I LONG-WE TRU... LAKI TRU NA S.S.M I STAP, LAIP SEVA!!

# MUSIK NA TELEVISEN

PAPUA NIUGINI



## Dokta bilong musik wok long Tabubil

**GODFRIED YASSAFAR**  
i raitim

LONG las wik Trinde, Februari 9, mi bihanim wanpela redio niusman bilong kantri Jemeni i go lukluk raun long Ok Tedi main long Tabubil. Nem bilong dispela niusman em Thomas Kruchem.

Taim mitupela i go kamap long Tabubil, mitupela i bungim wanpela man long Tabubil ples balus. Dispela man i putim wanpela blakpela singlis.

Antap long dispela blakpela singlis em i putim wanpela saket. Em i putim tu wanpela longpela blupela jin trausis. Long lek bilong em, em i putim tupela gumi su ol i kolim gambut. Man ya i putim tu wanpela aiglas i luk olsem bilong ol bikpela saveman ol i kolim profesã.

Mi wantaim pren bilong mi Thomas i sekan long em pinis na wanpela wokman bilong Ok Tedi i tokim mitupela olsem dispela man em Dokta Chris Roberts. Em i no dokta bilong stretim ol sikmanmeri. Nogat. Em i kisim namba olsem dokta bikos em i wanpela bikpela saveman bilong wok musik.

Dokta Chris i bilong kantri pren bilong mi Thomas i kam long en.

Dokta Chris Roberts i save stap wantaim ol pipel long hap bilong

Not Tabubil. Na em i save stadi na tu lainim ol singsing tumbuna bilong ol.

Dokta Roberts i gat wanpela lapun pren bilong em. Nem bilong man ya em Kasok Bayokim. Em i bilong ples Bullem.

Lapun Bayokim i wok long lainim Dokta Roberts long ol singsing tumbuna bilong ol

pipel long Not Tabubil. Bihain bai Dokta Roberts raitim gut ol dispela singsing.

Em i tok bihain long em i stretim gut olgeta singsing, Ok Tedi kampani bai helpim em long painim wanpela printing kampani. Na ol bai prinim ol dispela singsing long wanpela buk.

Dokta Roberts i tok

klostu olgeta samting pinis nau. Na long arapela tupela mun, em bai bungim olgeta singsing wantaim. Na salim i go long printing kampani. Long Krismas, olgeta wok na buk i redi long ol manmeri i baim.

Ok Tedi kampani bai givim mani bilong prinim dispela buk.



• Redio niusman bilong kantri Jemeni Thomas Kruchem i wok long askim Dokta Chris Roberts sampela kwesten. Dispela em taim Mista Kruchem i go kamap long wanpela liklik ples long Not Tabubil ol i kolim Aiangabib em Dokta Roberts i stap long en.

Photo: Godfried Yassafar


## I KAM LONG Ela Motors OL WIL BILONG NESEN

### AMERICAN TOP FORTY AS AT 29/01/94

CUR.	TITLE	ACT NAME
1.	Hero	Mariah Carey
2.	All For Love	Adams/Stewart/Sting
3.	Please Forgive Me	Bryan Adams
4.	Breathe Again	Toni Braxton
5.	Again	Janet Jackson
6.	All That She Wants	Ace Of Base
7.	Because The Night	10,000 Maniacs
8.	Linger	Cranberries
9.	The Sign	Ace Of Base
10.	Choose	Color Me Badd
11.	I Can See Clearly Now	Jimmy Cliff
12.	Said I Loved You..But I Lied	Michael Bolton
13.	Mr Vain	Culture Beat
14.	Found Out About You	Cin Blossoms
15.	The Power Of Love	Celine Dion
16.	Amazing	Aerosmith
17.	What Is Love	Haddaway
18.	Miss You In A Heatbeat	Def Leppard
19.	Shoop	Salt-N- Pepa
20.	Life (Every Body Needs Somebody)	Haddaway
21.	Dreams	Gabrielle
22.	I'd Do Anything For Love	Meat Loaf
23.	Can We Talk	Kevin Campbell
24.	Queen Of The Night	Whitney Houston
25.	Because Of Love	Janet Jackson
26.	Jessie	Joshua Kadison
27.	Will You Be There	Heart
28.	No Rain	Blind Melon
29.	Daughter	Pearl Jason
30.	Now And Forever	Richard Marx
31.	Higher Ground	UB40
32.	Having A Party	Stewart With Special Guest
33.	Dreamlover	Mariah Carey
34.	Mary Jane's Last Dance	Tom Patty And The Heartbreakers
35.	Without You	Mariah Carey
36.	Rock And Roll Dreams	Meat Loaf
37.	Cantsloop	Us3
38.	Everyday	Phil Collins
39.	All About Soul	Billy Joel
40.	The River Of Dreams	Billy Joel

## EMTV TELEVISEN

THURSDAY 17TH FEBRUARY, 1994		FRIDAY 18TH FEBRUARY, 1994		SATURDAY 19TH FEBRUARY,	
5.27	STATION OPEN	11.27	MEDITATION WITH PASTOR WALO ARNI	1.27	MEDITATION WITH PASTOR WALO ARNI
5.30	ITN NEWS (G)	11.30	STATION CLOSE	1.30	STATION CLOSE
6.00	TODAY SHOW (G)				
8.00	SESAME STREET (G)				
9.00	STATION CLOSE	5.27	STATION OPEN	8.57	STATION OPEN
10.57	STATION RE-OPEN (G)	5.30	ITN NEWS (G)	9.00	THE XVI OLYMPIC WINTER GAMES
11.00	THE XVII OLYMPIC WINTER GAMES	6.00	TODAY SHOW (G)	11.30	GILLETTE
1.30	MIDDAY SHOW (G)	8.00	SESAME STREET	12.00	WIDE WORLD OF SPORTS
3.00	KIDS KONA (G)	9.00	TBA		
	SESAME STREET	10.00	THE XVII OLYMPIC WINTER GAMES	4.00	BONANZA (G)
4.00	KIDS KONA	1.30	MIDDAY SHOW (G)	5.00	BEYOND 2000 (G)
	FAT CAT (G)	3.00	KIDS KONA (G)	6.00	NATIONAL EMTV NEWS
4.30	TOP CAT (G)	4.00	FAT CAT & FRIENDS (G)	6.30	HEY HEY IT'S SATURDAY (G)
5.00	GHOSTWRITER (G)	4.30	TOP CAT (G)	8.30	NCDC NEWS (G)
5.27	EMTV TOK SAVE	5.00	GHOSTWRITER (G)	9.00	BURKE'S BACKYARD
5.29	EMTV NEWS BREAK	5.27	EMTV TOK SAVE	10.00	THE XVII OLYMPIC WINTER GAMES
5.30	HOME AND AWAY (G)	5.29	EMTV NEWS BREAK	12.27	MEDIATION WITH PASTOR WALO ARNI
6.00	NATIONAL EMTV NEWS	5.30	HOME AND AWAY (G)		
		6.00	NATIONAL EMTV NEWS	12.30	STATION CLOSE
6.30	A CURRENT AFFAIR (G)	6.30	A CURRENT AFFAIR (G)		
7.00	SALE OF THE CENTURY (G)	7.00	THE NEW SALE OF THE CENTURY (G)	6.47	STATION OPEN
7.30	LOTTO DRAW (G)	7.30	NEIGHBOURS (G)	7.00	BUSINESS SUNDAY (G)
7.35	NEIGHBOURS	7.55	EMTV TOK SAVE	8.00	SUNDAY (G)
7.57	EM-TV TOK SAVE (G)	8.00	RUGBY LEAGUE	10.00	INTER-STATE CRICKET
8.00	RZZ (G)		1st quarter final	1.00	18 FOOT SKIFF RACING
9.00	RUGBY LEAGUE	10.03	RESCUE 911 (G)	1.30	CRICKET (G)
	Newcastle vs Balmain	11.00	RUGBY LEAGUE	3.00	RUGBY LEAGUE (G)



3rd quarter final  
5.00 BONANZA (G)  
6.00 NATIONAL EMTV NEWS  
5.30 RUGBY SEVENS INTERNATIONAL  
6.30 60-MINUTES  
7.30 RUGBY LEAGUE  
4th quarter final  
8.30 THE XVII OLYMPIC WINTER GAMES  
10.30 CHIT CHAT WITH SIR PAULIAS MATANE  
10.35 CHURCHES MAGAZINE PROGRAMME  
11.27 MEDITATION WITH PASTOR WALO ARNI  
11.30 STATION CLOSE

## PNG TOP TWENTY

AS AT 12/02/94

NO.	SONG	ARTIST
1 (1)	Emi No Isi	Basil Greg
2 (3)	Mis Out Tam	G. Telek
3 (4)	Askere	Hollie Maia
4 (2)	Chako Chako	Chako Chako
5 (7)	Honiara	Basil Greg
6 (5)	Kir Ta Prove	Kokotatts
7 (6)	Swit Smile	Vuvu Vibration
8 (8)	Data Tut	Festlight
9 (14)	Plau Rejected	Kopex
10 (13)	Luluk Tamavatur	Barike
11 (11)	Sutim Toktok	Barike
12 (12)	Nono Peren Pas	Jack Boi/Wamsi
13 (9)	Rosie Lalokau	JT& Siule Hoods
14 (12)	City Meri	Kanini Bros
15 (17)	Bolbol La Kiave	Emfor Band
16 (18)	Some People	Riot Squad
17 (16)	No Compromise	Max Manimbi
18 (0)	A Bul Wantok	George Telek
19 (15)	MBing Lure	JR Devils
20 (20)	Ifagome	Frank Pala

• Ratings based on requests on Radio Kalang and not cassette sales.

# ELA MOTORS - OL WIL BILONG NESEN



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.